

近代中國史料叢刊第十八輯  
沈雲龍主編

錢敏肅公（調甫）奏疏

錢鼎銘著

文海出版社印行

新奏 鍾生 與月 與日 與時 與地 與水 與火

1890/12

光緒元年五月二十九

日內閣奉

上

諭河南巡撫錢鼎銘由部


曹洵擢封圻自到河南以

來辦事實心克稱厥職前



因患病請假調理當經賞  
假一月茲聞溘逝悼惜殊  
深錢鼎銘著照巡撫例賜  
卹任內一切處分悉予開  
復應得卹典該衙門察例

具奏伊子內閣中書錢溯  
者著加恩賞給主事生員  
錢溯時著加恩賞給舉人  
服闋後准其一體會試用  
示篤念蓋臣至意欽此



上


光緒元年七月二十六

日內閣奉

諭曾國荃奏已故大員政績卓著請將事實宣付史館一摺已故河南巡撫錢

鼎銘前在江蘇原籍辦理  
團防並隨同李鴻章勦辦  
賊匪料理糧餉事宜諸臻  
妥協嗣歷官直隸河南於  
吏治民生均能盡心籌辦

洵屬遺愛在民著照所請  
即將該故撫事蹟宣付國  
史館立傳以彰忠蓋欽此



上

光緒二年十一月二十


日內閣奉

諭沈葆楨吳元炳奏已故  
巡撫有功原籍請予諡建  
祠一摺已故河南巡撫錢



鼎銘政績懋昭業經降旨  
賜卹並宣付國史館立傳  
茲據該督等奏稱該故撫  
前在本籍辦理團練有功  
桑梓著准其於江蘇太倉

州原籍捐建專祠至其由  
上海前赴安慶軍營請援  
籌餉濟師功績尤著並破  
格加恩准其子謚以示優  
異該部知道欽此



諭賜祭文

皇帝諭賜原任河南巡撫錢  
鼎銘之靈曰鞠躬盡瘁臣  
子之芳蹤賜恤報勤國家  
之盛典惟開府懋昭夫政

績斯飾終宜薦以馨香爾  
原任河南巡撫錢鼎銘性  
行純良才猷通敏賢書領  
薦教鐸宣勤旋司筭算於  
農曹更佐軍籌於吳會鸞


綸迭沛用酬轉餉之功豸  
繡榮膺遂掌明刑之職備  
屏藩於畿輔教養兼施移  
節鉞於中州恩威並濟眷  
隆專閩方冀遐齡感切騎



箕忽聞溘逝覽遺章而悼  
惜崇祀事以褒揚念篤蓋  
臣賞延後嗣更頒祭葬以  
慰幽靈於戲寵錫重壚庶  
沐匪躬之報名垂青史聿

昭不朽之榮爾如有知尚  
克歆享





御賜碑文


朕惟封疆展績端資柱石  
之臣冊府書勲聿櫛旂常  
之典眷成勞於夙夜望重  
中州表偉烈於丹青光昭

崇碣爾原任河南巡撫錢  
鼎銘品行端方才猷峻卓  
早膺鄉薦振木鐸於海濱  
旋佐度支校版圖於農部  
不愧治平之目超擢監司

無慚弼教之風時陳臬事  
迨開藩於畿輔職效旬宣  
宜建節於河陽威資鎮撫  
時則瘡痍未復俟休養以  
生全爾迺教養兼施洵實

心而任事方冀毒縣牙風振  
倚畀惟隆何期箕尾星騎  
淪殂遽告覽遺章而軫悼  
沛卹典以褒崇旣酌椒漿  
更頒芝檢謚為敏肅禮備

哀榮於戲青史騰聲闔澤  
欽承鳳綵丹珉絢采祥雲  
永護螭碑



175



國史館列傳

錢鼎銘江蘇太倉直隸州人父寶琛湖北巡撫自有傳鼎銘道光二十六年舉人三十年考取景山官學教習咸豐三年大挑二等以教職用時粵匪洪秀泉等竄據江甯等府

上命寶琛辦理本籍團練事宜鼎銘隨同襄辦尋上海匪徒劉麗川作亂青浦奸民周立春相繼起陷嘉定鼎銘與嘉定舉人吳林募勇隨官軍復其城擒周立春誅之敘功歸本班遇缺即選四年選贛榆縣訓導六年捐升主事分戶部九年丁父憂十年江



欽

差大臣兩江總督曾國藩駐軍安慶去上海千里聲息

甯踞賊分竄陷常州蘇州松江太倉各郡縣蔓延及

浙江杭嘉湖等府江蘇巡撫薛煥趨保上海時

不通鼎銘建議謂宜移上游之兵取建瓴之勢適  
團練大臣龐鍾璐等議乞援於楚軍無敢應者鼎  
銘請以身任遂乘番舶溯江而上兩岸賊卡林立  
礮子洞船腹鼎銘不為動徑達曾國藩軍營陳東  
南百姓沾危狀且言上海中外互市要地百貨駢  
集權稅所入足餉數萬人若棄之資賊則東南無  
轉機矣往復數千言繼以痛哭曾國藩亦為泣下

遂許濟師先是薛煥遣將入楚募勇一萬二千人  
已在途矣曾國藩以所募之勇皆各營所汰不可  
用至是令鼎銘迎軍截散之鼎銘馳風雪中遇諸  
漢口簡精壯九百人餘衆悉遣歸無譁者鼎銘還  
上海與龐鍾璐等議以洋艦潛師疾濟即日籌餉  
銀十八萬兩僦輪船五艘親率赴皖時曾國藩奏  
令按察使李鴻章統淮軍五千人援上海同治元  
年三月鼎銘迎軍東下五月李鴻章署江蘇巡撫  
奏調鼎銘隨營差委

詔如所請閏八月淮軍勦賊破之以功擢直隸州知州並

賞戴花翎二年以克復嘉定金山奉賢川沙南匯五城經

李鴻章疏請獎勵

命以知府分發省分補用三年七月官軍奪楓涇西塘八月克江陰燬寶帶橋賊壘遂復蘇州十一月克無錫金匱並浙江嘉善平湖乍浦海鹽各城拔平望鎮解奔牛之圍鼎銘俱有功德

旨以道員分發省分儘先補用三年克常州宜興荆溪及浙江嘉興府城

賞按察使銜並

賞給二品封典五年八月加布政使銜時粵匪蕩平李鴻

章移淮軍北剿捻逆檄鼎銘駐清江浦轉運糧仗  
鼎銘常覘賊所嚮先期儲糗芻寄頓圩寨以供軍  
用初

上命各省督撫留心查訪有盡心民事政績可紀者臚列  
事實具奏至是署兩江總督李鴻章以鼎銘應疏  
稱其操行貞篤條理精密同治元年來皖乞師首  
定援滬之策隨軍攻剿籌備軍需始終無誤上年  
委辦勦捻各軍糧餉軍火通籌全局緩急得宜調  
和軍民輿情翕服實屬久歷艱苦最為出力之員  
疏入



命軍機處記名六年揔首賴汶洗自山東敗竄連防戒嚴

鼎銘馳商提督黃翼升等分軍扼勦擒其渠江北次第肅清七年七月漕運總督張之萬奏言鼎銘識量淵懿議論宏通於營務地方利弊言之鑿鑿上年初建分扼六塘之議客軍心志不齊難與言守鼎銘設法聯絡實力贊成軍火餉需轉輸不絕各營無匱乏之憂防局因之益固迨賴逆突過六塘鼎銘隨同守運勞瘁不辭嗣辦理支應征軍及安插降衆諸事措置裕如實屬調度有方才堪濟變為司道中不可多得之員得

旨優敘八月李鴻章疏言鼎銘轉運軍火一舟一車搏節  
妥慎商民感其惠吏胥畏其廉軍士服其信在事  
七年之久時時以大局為重性情忠懇經理密實  
見值講求吏治儻蒙

恩擢用藩臬必於地方有裨直隸總督曾國藩復以鼎銘  
才大心細堪膺重任疏薦八年正月

命發往直隸以道員補用五月授直隸大順廣道十一月  
升按察使時畿南各屬苦旱鼎銘方辦賑務曾國  
藩奏請俟事竣再行交卸

允之九年五月入

覲

召對二次

賜克食八月擢布政使十年永定河決鼎銘稟商總督李

鴻章奏撥司庫銀二十萬兩並截留南漕備賑詳  
定章程十則一嚴覈戶口一慎選紳董一赴津運  
米官給腳價一以銀易錢俾便行用一先期給票  
以便稽查一擇要設廠以均遠近一留賑款以備  
春荒一興工作以資傭趁一酌給紳董經費一嚴  
定委員賞罰十一月升河南巡撫十一年六月豫  
皖交界捻黨竊發鼎銘檄河北鎮總兵崔廷桂馳

勦擒匪首李四聾仔等斬之餘匪悉平又獲固始縣著名匪棍陳遇廷請就地正法

從之九月以河南人文日起鄉試同考官不敷分校奏請添設二員俾得從容校閱下所司議行十月奏新漕未能兌運本色略言河南兵燹之後連年災歉閭閻元氣未復本年麥秋僅止中稔夏秋雨澤過多各州縣田禾被淹秋穫實形歉薄加以陝甘軍務未平各處防勦軍糈多在河南設局採買轉運是以價值愈昂米糧愈缺若再責令各州縣起運本色不特十數萬石之米驟難辦解且糧價必至



益增民食軍糈更形竭蹶兼以西征各餉河工用款均屬刻不容緩遇有支解無可籌撥之時尤不能不借折漕以資周轉仍請折銀解部十二月奏勘明豫省被旱之河北三府及河南南陽光州等處被水之開歸陳許汝甯各屬新舊糧賦難於並徵請分別展緩以紓民力均如所請行十二年二月奏言通籌河南庫款每年丁耗房雜各稅僅入銀二百十餘萬兩而豫軍餉銀河工用款合以西陲各路協餉本省旗綠河各營兵餉各官養廉及一應雜支歲需銀四百三十餘萬兩不敷過半懇

將歷年積欠漕折分別解留又奏河南連年歲歉糧缺價昂全辦本色不免兵民交困查咸豐十年以前辦理漕折每石折銀一兩二錢五分統計解部庫銀二十餘萬兩今擬自十二年為始請將漕糧仍辦折色其每年定解部庫銀兩總於次年六月以前悉數清解庶於倉庫餉需均有裨益下部議行四月奏陳練軍情形先是河南額設三鎮馬步兵一萬三千九十七名各按營地分塘坐汛鼎銘以河南西路防兵未撤邊隅伏莽未淨武備不可一日稍弛而練勇既滋繁費且聚散靡常難以

經久綠營則散處四方徵調未能應時兵將各不相習臨時難期得力因就本省額兵每鎮抽練步兵一營馬兵一營三鎮共馬步六營每營步兵五百名馬兵二百五十名挑選精壯兵丁膽健馬匹各擇衝要適中之地挖壕築牆逐日訓練營哨各官取樸誠勇敢之士一應軍營積習盡行革除明定賞罰令於所管境內不靖地方更番出巡至是辦有成效破獲匪盜各案甚多復具疏以

聞鼎銘又以河南水利年久失修鑿賈魯河故道並濬勺金河丈八溝餘濟河永豐渠等處以資灌溉之利



七月疏言賈魯一河發源於滎陽密縣之間合京  
索須鄭諸小水來源本不甚旺其游沙填塞最多  
之處地名十八里橋凡上下十有八里名為古淺  
號稱難治一由流沙充滿挑之不能盡出一由其  
地較下游高低懸絕水易瀉而難留一由自省以  
南六十里之蘇橋至尉氏縣白潭以北之紅石橋  
上下七十餘里民田坡水皆向南行從不匯入河  
中水勢有消無長有此三弊雖水大之時上下游  
皆漲而此十八里中時時淺阻三弊中沙壅尤甚  
求補救之法莫若兩岸改用極坦之坡迤邐而下

自不致旋挑旋圮兩岸舊有大隄遺址將挑出之  
沙遠徙於大隄之外再行補築土垣栽植柳樹自  
可禦沙不致慮其復入此外朱仙鎮以上舊隄殘  
缺補築高厚十八里橋以下淺狹處一律加挑首  
尾凡一百八里正月開工五月工竣六月開壩南  
至周家口北至朱仙鎮又西北至鄭州之京水寨  
一律通暢上游州縣無水滂之災下游商船有暢  
行之益奏入

上題之十一月以孟津縣屬之閻灣等五村莊並鐵樹鎮  
地方河水衝塌所有被災貧民懇先行撫卹一月

並查勘成災分數籌議加賑蠲緩十三年五月請蠲免虞城縣被雹地方錢糧十分之四均得

旨允行九月因御史鄧慶麟奏軍務肅清省分拏獲盜匪請照舊例由該管上司覆核辦理鼎銘遵

旨議覆略言豫省民情强悍時虞伏莽潛滋命盜各案輕重不同人命固當慎重而懲一儆百此中保全不少况除莠所以安良其計出於一時之權宜其效見於一方之綏靖若遽改歸舊制長途解勘久稽顯戮轉恐別生事端擬請嗣後如有拏獲各匪餘孽及滋事游勇並騎馬明火糾搶拒捕之犯仍准



諭旨就地正法以昭炯戒疏入下部議行鼎銘復以豫民  
於獲訊後錄供通臬聽候覆審明確恪遵前奉  
戶鮮蓋藏抵任後頒發章程飭各牧令勸民按地  
出穀就鄉分倉擇里中公正紳耆董其事官則有  
督責之權而不假吏胥之手至是通省積穀九十  
三萬石有奇疏言設遇歉收時分別借糶由紳耆  
綜覈出入官不責以簿冊之具文民則為耳目所  
共悉使民間不以為官物而視如其家之困困窮  
窘也奏入報

聞光緒元年三月疏言

京師為天下根本河南居天下之中大河環其西北  
實為

京師藩籬南汝歸陳舊為捻蹤出沒之所自張曜宋  
慶兩軍奉

命西征本省遂無大兵鎮壓庫儲匱乏不能更募新兵見  
雖整頓練軍而馬步僅止七營第能近捕匪徒不  
足遠資征勦中原一片平行空虛無恃萬一事機  
猝發遂成坐困藩籬之備既疏根本之憂益大查  
西征之兵金順張曜額爾慶額各率所部先後出  
關兵力已足分布擬將宋慶所統全部調回潼關

扼紮則西可以顧秦隴北可以蔽晉燕河南亦可恃以為備矣

詔如所請並

諭令會商該提督擇要駐紮將疲弱勇丁量為裁汰以節糜費又奏言衛輝府屬之考城縣原隸歸德府自乾隆四十八年蘭陽李六口壩工合龍將該縣城移建黃河北岸改隸衛輝管轄及咸豐六年銅瓦廂決口黃河改道北流考城轉居河之東南距衛輝二百四十里該府督察稽查勢難遙顧凡考城縣解勘及文報往來每遇風雨濟渡維艱於官



事民事均有窒礙請仍改隸歸德又以光山縣地處邊界民刁多訟甚為難治請改為要缺在外揀調均下部議行時山東荷澤等處河決巡撫丁寶楨駐石莊戶督辦壩工鼎銘稔其工險預儲糶料百垛越境濟之因是合龍五月以疾奏請

賞假一月尋卒護理河南巡撫劉齊銜奏言鼎銘以京曹倡議乞師出入鋒鏑中痛哭定策遂佐成肅清江表之功其後湘淮統兵將帥蕩諸巨寇又悉賴其籌餉贍軍之力迨服官直隸所至必剔抉利弊殫竭心力尤為先後督臣曾國藩李鴻章所推重

自授豫撫以來創練軍積穀水利數大政皆著成效凡整飭吏治戢除奸暴籌濟軍需靡不實事求是惟日不足從無勞苦艱難之色因致思慮傷脾火鬱內結既而外感風熱火毒成瘍遂至不起易箒時復以河工地方諸務倦念不置絕無一語及私疏入

諭曰河南巡撫錢鼎銘由部曹洊擢封圻自到河南以來辦事實心克稱厥職前因患疾賞假一月茲聞溘逝悼惜殊深錢鼎銘著照巡撫例賜卹任內一切處分悉予開復應得卹典該衙門察例具奏伊子內閣

中書錢溯者著加恩賞給主事生員錢溯時著加恩賞給舉人准其一體會試用示篤念蓋臣至意八月河東河道總督曾國荃奏言鼎銘以部曹在籍辦團防時值蘇常淪陷僅餘上海彈丸之地番舶互市珍貨填集粵賊垂涎百計圖竄朝不保夕鼎銘獨創議赴皖乞師與曾國藩論列山川形勢及蘇常可取狀慷慨請援繼以痛哭曾國藩感其誠乃議移進鎮江之師先赴上海之急疏請李鴻章統師東下遂以水陸各軍埽蕩松太進克蘇常論者謂東南大局轉關實係於此嗣李鴻章督師勦捻



委以餉事鼎銘躬為餽運纖悉必親官軍每遇匱乏輒賴以濟又調和諸將親若弟昆李鴻章勦平巨捻深資其力旋授大順廣道洊擢藩臬每履一任殫心民事日以清理積訟為務勒限審結官無宿獄是時直隸頻遭水患鼎銘詳請分別賑濟手定章程十則拯救凶荒剔除積弊使直省飢民忘為凶歲巡撫河南以來愈加奮勉張曜宋慶兩軍西征隴右歲支協餉百萬以外鼎銘竭蹶經營視若家事惟其心無畛域之見故豫軍得效尺寸之功至其抽練本省之兵整剔綠營之弊無事則支

棚築壘扼要分防有事則秣馬宿糧更番赴調部  
臣下其式於各直省仿照舉行至今稱便復倡興  
水利勸種稻田乘河南歲稔之年勸民積糧以備  
災祲創建游梁書院以惠四方學者於祥符所屬  
黑堙地方增建石壩五座上以抵禦黃溜下以屏  
蔽省垣士民莫不謳頌又籌備糶料連檣飛解東  
省以濟荷澤要工共成合龍之慶凡此皆鼎銘攷  
攷圖治之實蹟也請

旨宣付史館

從之尋

賜祭葬二年兩江總督沈葆楨等奏言鼎銘生平政績  
昭著其乞師一事保全危局恢復全省厥功尤偉  
請

特予諡典並准於太倉州原籍建立專祠

諭曰已故河南巡撫錢鼎銘政績懋著業經降旨賜卹  
並宣付國史館立傳茲據該督等奏稱該故撫前在  
本籍辦理團練有功桑梓著准其於江蘇太倉州原  
籍捐建專祠至其由上海前赴安慶軍營請援籌餉  
濟師功績尤著並破格加恩准其予諡以示優異尋  
予諡敏肅子溯耆主事溯時舉人

撫臣因病出缺疏

河南布政使臣劉齊銜跪

奏為撫臣因病出缺循例由驛馳陳請

旨迅賜簡放以重職守恭摺仰祈

聖鑒事竊撫臣錢鼎銘前因感受風熱頸邊患一瘡瘍

日夜作痛曾經專摺陳請

賞假調理並委臣代拆代行在案詎發摺後病勢益劇  
多方醫治迄難見效瀕危之際伏枕哀鳴聲稱世  
受

國恩不能再圖報效嗚咽流涕口授遺摺交臣呈遞於



五月二十一日子時出缺當將巡撫關防並

王命旗牌等件敬謹封固存庫伏念該故撫臣夙抱公

忠勲績甚偉當粵逆淪陷東南諸郡時該故撫臣

以京曹家居倡議乞師出入鋒鏑中詣安慶痛哭

定策遂得佐成肅清江表之功其後湘淮統兵將

帥蕩平諸巨寇又悉賴其籌餉贍軍之力迨服官

畿輔所至必抉剔利弊殫竭心力尤為先後督臣

曾國藩李鴻章所推重自蒙

恩簡授豫撫以來創練軍積穀水利諸大政行之皆著

成效凡夫整飭吏治戢除奸暴籌濟軍需靡不實

事求是惟日不足從無勞苦艱難之色而其思慮傷脾火鬱內結病之所致蓋基於此一旦外感風熱火毒成瘍遂致不起臣屢往看視孜孜求治至易箒時尤復以河工地方諸務惓念不置絕無一語道及私事其長子溯耆優貢生內閣候補中書在京當差次子溯時附生孫三人繹槃綏槃繩槃均隨侍在署身後蕭然殊堪悽惻現在河臣防護大汎親駐河干臣與署臬司任道鎔糧道段廣瀛署開歸道劉成忠督同府縣妥為照料一應公事查照成案由臣暫行代辦遇有咨部及文移稿案



仍用布政使印信俾免稽延所有河南巡撫員缺  
緊要相應請

旨迅賜簡放以重職守並將遺摺附呈  
御覽為此循例恭摺具奏伏乞

皇太后

皇上聖鑒謹

奏

禮部遵查卹典疏

禮部謹

奏為請

旨事光緒元年五月二十九日內閣奉

上諭河南巡撫錢鼎銘由部曹洊擢封圻自到河南以來辦事實心克稱厥職前因患病請假調理當經賞假一月茲聞溘逝悼惜殊深錢鼎銘著照巡撫例賜卹任內一切處分悉予開復應得卹典該衙門察例具奏等因欽此欽遵到部臣等查定例內開二品官病故

恩予卹典者給予全葬銀四百兩一次致祭銀二十兩  
遣官讀文致祭祭文交內閣撰擬二品以下官不請諡  
特予者遵

旨辦理各等語今原任河南巡撫錢鼎銘病故欽奉  
諭旨照巡撫例賜卹應照例給予全葬銀四百兩一次  
致祭銀二十兩

遣官讀文致祭祭文交該衙門撰擬照例不請諡恭俟  
命下臣部行文各該衙門遵照辦理為此謹

奏請

旨

請宣付史館疏

河道總督一等威毅伯曾國荃跪

奏為故河南撫臣政績卓著臚列事實請

旨宣付史館恭摺具陳仰祈

聖鑒事竊河南撫臣錢鼎銘因病出缺已蒙

優詔軫惜

褒卹有加凡屬臣工同深欽感臣查錢鼎銘志趨閔遠

操守潔清始以部曹在江蘇原籍辦理團防時值

蘇常淪陷僅餘上海彈丸之地江浙難民麇集一

隅番舶互市珍貨填委粵賊垂涎百計侵犯情形

危殆幾若朝不保夕矣官紳日盼強兵為援而終  
無由致師以達城下者獨錢鼎銘謂宜資上游之  
兵取建瓚之勢創議赴皖乞師是時臣軍已克安  
慶臣兄曾國藩駐紮皖城李鴻章運籌帷幕錢鼎  
銘乘坐輪船溯江西上兩岸賊卡林立礮子洞穿  
船腹而過錢鼎銘一不為意逕達安慶軍營見曾  
國藩李鴻章相與論列山川形勢與夫賊情變幻  
及蘇常可取之狀慷慨請援繼以痛哭曾國藩感  
其血誠嘉其偉識乃與李鴻章議定移進鎮江之  
師先赴上海之急錢鼎銘回至滬上籌備餉銀十



八萬兩雇輪船五隻復來迎師曾國藩疏請李鴻章統師東下遂以水陸各軍掃盪松太進克蘇常賊勢由是瓦解地方因之肅清論者謂東南大局轉關實繫於此嗣李鴻章督師勦捻委以餉事錢鼎銘躬司餽運纖悉必親捻蹤飄疾瞬息千里官軍晝夜窮追疲於奔命錢鼎銘仰承李鴻章規畫覘賊所嚮先期儲備糗芻寄頓圩寨官軍每遇匱乏之時輒賴以濟又能調和諸將彼此交歡親若弟昆李鴻章勦平東西巨捻深資其力曾國藩移督畿疆奏調錢鼎銘赴直差委已嘗還陳梗概稱



薦其賢旋蒙

聖恩簡授大順廣道洊擢藩臬兩司每履一任殫心民事日以清理積案為務勒限審結官無宿獄數月之間囹圄豁然當是時也直隸頻遭水患天津河間諸郡受災尤重錢鼎銘詳請督臣截留南漕籌撥藩運兩庫銀二十餘萬兩分別賑濟手定章程十則拯救凶荒剔除積弊遂使直省飢民流離易復幾忘其為凶歲也而錢鼎銘適奉巡撫河南之命自以身受

朝廷不次之恩愈加奮勉受篆以來相其重輕而制

之宜度其緩急而為之備查豫省歲入之款不過二百萬有奇而張曜宋慶兩軍西征隴右歲支月餉乃在百萬以外錢鼎銘督同藩司劉齊銜竭蹶經營視若家事殫全力以供軍每先期而應急肅州旣拔規復關外出師日遠飛輓愈勤惟其心無畛域之見故豫軍皆得自效尺寸之功也至其抽練本省之兵整剔綠營之弊無事則支棚築壘扼要分防有事則秣馬宿糧更番赴調部臣下其式於各直省仿照舉行至今稱便又復倡興水利勸種稻田修復賈魯河故道以及勺金河丈八溝清

河餘濟河永豐渠等處凡屬便民灌溉者一體設  
法疏濬又乘豫省歲稔之年勸民間積穀近百萬  
石以備災祲又創建游梁書院以惠四方之來學  
者又籌畫另款督率開歸道任道鎔於祥符所屬  
黑垆地方增建石壩五座上以抵禦黃溜下以屏  
蔽省垣士民莫不謳頌又籌備糶料連檣飛解東  
省以濟荷澤要工共成合龍之慶凡此皆錢鼎銘  
孜孜圖治之實蹟也臣昔在江南軍次稔知該故  
撫留心經濟識度過人今歲奉

命治河始與共商政務亦嘗親見其講求吏治實事求

是自奉儉約而有廢必興嚴絕苞苴而推惠及下  
守正而不失之苛精覈而不流於刻竊冀其年力  
富强天資忠亮方幸足補時艱羣資表率不意偶  
染微恙遽殞良材殊堪悼惜臣雖履任未久而相  
知最深聞見甚確茲據豫中官紳詳述政績合詞  
請奏臣未敢壅於上聞謹繕摺臚列具

奏合無仰懇

聖慈可否准將該故撫事實

宣付國史館以備採擇之處出自

天恩伏乞



皇太后

皇上聖鑒訓示謹

奏



請予諡建祠疏

兩江總督臣沈葆楨  
江蘇巡撫臣吳元炳 跪

奏為原任河南巡撫前在籍時功績卓著據情懇  
恩予諡准於原籍捐建專祠恭摺奏祈

聖鑒事竊據蘇省紳士前太常寺少卿楊泗孫等呈稱  
已故河南撫臣錢鼎銘係江蘇太倉州舉人於咸  
豐十一年冬以戶部主事在籍時髮逆竄踞蘇常  
江南郡縣相繼淪陷上海一隅勢岌岌不可支前  
督辦團練大臣侍郎龐鍾璐與諸紳士議請援於  
前兩江督臣曾國藩大營乃具文函備餉請分兵

東援故撫慨然請行即日登舟徑抵安慶謁見曾國藩備陳東南百姓阽危狀且言上海中外互市要地榷稅所入足餉數萬人若棄之資賊則東南無轉機矣反復數千言繼以痛哭曾國藩亦為泣下許以濟師今大學士直隸督臣李鴻章時方募勇將援鎮江乃

奏令移嚮上海濟以親兵兩營故撫復與諸紳士議僦洋艦潛師疾濟遂備西國輪船五艘絡繹上迎親率之赴皖而所募各營已集始得刻期東下方乞師安慶也是時滬中遣將赴楚募勇萬二千人

曾國藩以所募皆各營汰遣徒耗軍食命往截散之故撫於風雪中馳往遇之漢口簡所募九百餘人以歸餘悉遣散無譁者故撫兩次往來安慶所過賊壘林立躬冒危險師至上海主轉餉及添募製造一切二年之間收復蘇浙諸郡縣肅清江表推念故撫冒險乞師始事之功實多嗣曾國藩李鴻章督師勦捻委以餉事故撫駐清江浦躬親輸輓覘賊所向先期儲備始終無匱缺賴逆敗竄運防戒嚴故撫馳商前水師提督黃翼升陞任江西巡撫劉秉璋分兵扼要擒渠解脅淮揚得安厯保

至布政使銜道員用旋由曾國藩  
奏調赴直補授大順廣道升藩臬兩司旋蒙

簡授河南巡撫光緒元年五月二十一日在任積勞病故

欽奉

諭旨照例賜卹並經東河督臣曾國荃奏請宣付史館  
立傳伏查該故撫於乞師一事力任艱鉅克保全  
局以勞定國功不可泯應請奏懇

聖恩准將該故撫錢鼎銘予諡建祠以彰忠蓋等情前  
來臣等復查已故原任河南巡撫錢鼎銘當咸豐  
十一年蘇常盡為賊窟該故撫慷慨乞師得以移



兵滬上保全危局恢復全省厥功甚偉迨後轉戰行間專資輸輓用是士飽馬騰所向克捷嗣膺

簡命巡撫中州旋以在任積勞病故所有直隸河南政績

業經東河督臣曾國荃奏懇

恩施宣付史館在案伏查上年福建巡撫王凱泰在任病故經福州將軍文煜閩浙督臣李鶴年及臣葆楨先後奏蒙

聖恩予諡並准建立專祠今該故撫錢鼎銘生平政績昭著在人其乞師一事尤為鄉里所稱頌茲據紳士等臚陳請奏臣等不敢壅於上聞合無仰懇



天恩俯准將已故河南巡撫錢鼎銘

特予諡典並准於太倉州原籍捐建專祠以順輿情除  
分咨禮部河南撫臣查照外理合恭摺具陳伏乞

皇太后

皇上聖鑒訓示謹

奏

禮部鈔錄諡號咨

光緒三年三月初七日

禮部咨祠祭司案呈內閣鈔出原任河南巡撫錢鼎銘諡號奉

御印鈐出敏肅欽此欽遵到部相應鈔錄諡號清漢字樣移咨該撫遵照可也

計開

敏肅才猷不滯曰敏身正人服曰肅

--	--	--	--

71

請予諡建祠呈

具呈江蘇紳士前太常寺少卿楊泗孫等呈為已故大員功績卓著陳乞

奏請予諡建祠以彰忠蓋而順輿情事竊已故河南巡撫錢鼎銘於咸豐十一年冬以戶部主事在籍時髮逆竄踞蘇常久江以南郡縣相繼淪陷吳中官吏士民皆趨保上海彈丸一隅地處下游無險可扼賊烽四逼勢岌岌不支營勇半係招集潰散不足任戰守民團未可久恃 前督辦團練大臣侍郎龐鍾璐與在滬諸紳士建議請援於 前兩

江總督部堂曾國藩大營以保危局而上游軍事  
方亟道梗音阻會聞收復安慶乃具文函備餉請  
分兵東援謀可任其事者故宦慨然請行計自滬  
至皖遵海沿江千餘里節節賊境惟輪船可達乃  
即日登舟抵安慶謁 前兩江總督部堂曾國藩  
備陳東南百姓阽危狀且言上海中外互市要地  
百貨填集權稅所入足餉數萬人若棄之資賊則  
東南無轉機矣反復數千言繼以痛哭 前兩江  
總督部堂曾國藩初以兵少不足分且慮濱海僻  
遠聲援不相及難之至此亦為泣下始許濟師今



大學士直隸總督部堂李鴻章時在幕府方募  
淮勇將援鎮江乃

奏令移嚮上海濟以親兵兩營始得成軍故宦復與  
吳中諸紳士議滬上危迫若大軍由陸路轉戰而  
下恐需時日非籌鉅資僦洋艦潛師疾濟勢不及  
待乃共商請於大吏顧夷情反覆時有沮其議者  
故宦慷慨激發持之甚堅議乃定遂備西國輪船  
五艘絡繹上迎親率之赴皖而所募各營已集師  
行有日矣復力陳舟行利便始得刻期東下方乞  
師安慶也是時滬中遣將赴楚募勇萬二千人

前兩江總督部堂曾國藩以所募皆各營汰遣徒  
耗軍食命往截散之故宦於風雪中馳往遇之漢  
口簡所募九百人以歸餘悉遣散無譁者 前兩  
江總督部堂曾國藩益奇其才移師之議遂決故  
宦兩次往來安慶所過賊壘林立躬冒危險獨鎮  
定如常不動聲色師至上海主轉餉及添募製造  
一切入則參贊戎機出則籌畫饋運復能調和諸  
將協力同心用是所向克捷二年之間收復蘇浙  
諸郡縣肅清江表論者謂東南大局轉關故宦始  
事之力居多嗣 前兩江總督部堂曾國藩 大

學士直隸總督部堂李鴻章督師勦捻委以餉事  
捻蹤飄忽官軍追逐常一二千里不得息故宦駐  
清江浦躬親輸輓覘賊所向先期儲備始終無匱  
缺賴逆敗竄運防戒嚴故宦馳商前水師提督  
黃翼升陞任江西巡撫部院劉秉璋分軍扼要  
擒渠解脅淮揚得安前兩江總督部堂曾國藩  
大學士直隸總督部堂李鴻章先後疏薦其賢  
歷保至布政使銜道員用旋由前兩江總督部  
堂曾國藩

奏調赴直差委補授大順廣道擢升藩臬兩司簡放

河南巡撫其歷官政績已蒙 河東河道總督部  
堂曾國荃

奏請宣付史館得

旨允行 泗孫等無庸贅述惟念乞師一事故宦力任艱  
鉅得保全局以勞定國功不可泯 泗孫等誼關桑  
梓稔知其事之始末伏查光緒元年十月 福建  
巡撫王凱泰積勞病故經 福州將軍文煜 浙  
閩總督部堂李鶴年 兩江總督部堂沈葆楨先  
後

奏蒙



恩准予謚並於福州臺灣建立專祠故宦功績卓著用  
敢援案詳陳環請入


奏

特賜謚典並於原籍江蘇省建立專祠似與例案相符

伏乞

大公祖大人鑒察施行





錢敏肅公奏疏目錄

卷一

奉 旨補授直隸按察使謝 恩摺

恭報接受直隸臬篆摺

再行補刻  
關俟見原稿

傳解革員張光藻劉傑起程赴津日期遵 旨覆

奏摺

奉 旨補授直隸布政使謝 恩摺

恭報接受直隸藩篆摺

奉 旨補授河南巡撫謝 恩摺

恭報接受河南撫篆摺

恭謝兼兵部侍郎銜摺

請展緩兵馬錢糧奏銷摺

報解東三省俸餉及整裝銀兩摺

奉撥吉林黑龍江官兵整裝銀兩摺

增培河武二縣沁河隄工銀兩請動款給發摺

籌撥新疆各餉摺

請以遺缺府英瑞委署開封府知府片

撥解甘餉暨豫師軍營協餉片

撥解烏城臺站銀兩片

會拏皖豫交界匪徒李六李四龔仔摺

馳報兵團獲勝生擒匪首李四聾仔摺

會同河督請以留省另補知縣李澍補商邱縣知

縣摺

籌撥景廉軍營協餉片

南陽左營暨確山營守備仍以儘先守備文盛花

榮桂請補摺

卷二

捕獲匪首李六地方肅清附保出力人員懇 恩

獎勵摺

豫省庫儲支絀專協各餉未能依時措解請 旨

敕部籌議摺

籌解豫師軍營協餉摺

請將匪棍陳遇廷就地正法並將節婦胡氏 敕  
部旌表摺

豫省十一年新漕懇請仍徵折色摺

請 敕加正陽縣 城隍神封號並 頒匾額摺  
請將例 貢永棗展緩一年片

豫省鄉試請添設房官摺

請以歸德左營游擊呂振河升補河南營參將摺  
查明舊案軍需支用各款開單存案摺



訛明惡棍馬勞梆請就地正法摺

查明陣亡知府王榮烈顏懷忠援案請諡摺

籌撥哈密軍餉片

查明勦除皖豫匪徒拏獲李六等要犯懇將出力

官紳分別獎勵摺

附保南陽鎮總兵趙鴻舉前信陽協副將降補游

擊尹嘉賓片

籌撥烏魯木齊餉銀摺

起解東三省積欠俸餉摺

節孝李彭氏割臂療姑援案請旌片

籌解 盛京 鳳凰樓木植運腳片

籌撥伊犁協餉片

地方營汛緝捕出力請予獎勵摺

籌撥西征餉項摺

籌撥烏魯木齊景廉及西甯豫師軍營協餉片

奉撥烏城臺站銀兩片

剿除李六股匪附保武員仍懇照原請獎勵摺

張宋兩軍添設轉運片

恭謝 恩賞福字一方摺

南陽府官紳防剿出力續請獎勵摺

卷三

南陽左營確山營守備兩缺另揀儘先守備王箱

張徵請補摺

通籌庫款懇將歷欠漕折分別解留並酌議新漕  
仍請折色摺

河北釐務酌加整頓片

省會知府請以現署之英瑞擬補摺

省會知縣請以杞縣知縣查以謙調補摺

考城營守備請以蔡友彬補授摺

河陝汝道廣隆請暫緩引 見片

解還神機營墊放善慶軍營餉銀片

解還神機營武成永固礮位片

兵馬錢糧奏銷仍請展緩摺

查明參員劉慶恩並無實蹟惟措置未宜應請交

部議處摺

孝女汪陸氏剜臂療親懇請旌表摺

籌撥烏魯木齊景廉軍營協餉片

籌撥西甯豫師軍營協餉片

豫省規畫練軍陳報大概情形摺

報解黑龍江官兵資裝銀數摺



籌解庫倫軍餉摺

籌解張曜軍營駝隻銀兩摺

籌撥巴哈科布多餉銀片

撥解吉林冬圍經費片

續解盛京鳳凰樓木植運腳銀兩片

請以開封府鹽捕同知陳希謙調補浙川廳同知

摺

籌解伊犁科布多餉銀片

籌撥烏魯木齊景廉軍營餉銀及巴里坤修房專

款片



南陽左營暨確山考城營守備各缺仍請以王箱

張徵蔡友彬補授摺

請以守備張湘補授撫標右營守備摺

豫省軍需用款請分起報銷摺

續解西甯豫師軍營專餉片

撥解 普祥峪 菩提峪萬年吉地工餉摺

新選商城縣知縣曹賢書請留省察看摺

籌撥新疆協餉並瀝陳豫省支絀情形摺

已革副將冒充營員需索車馬審明定擬摺

卷四

豫省練軍會同地方文武員弁搜捕南山匪徒趙

殿盈等訊明正法並請酌保數員摺

參劾庸劣不職候補知縣王元緒等分別革職改

教摺

籌款挑濬賈魯河工竣舟楫通行摺

賈魯河上游一律通暢片

豫省各屬水利通飭籌辦擇要修濬摺

續解西甯豫師軍營專餉片

鄉試人數較多添蓋棚號片

懇將前借漕項歸於軍需項下報銷片

南陽左營確山考城營守備各缺詳細查明仍請  
以王箱等分別補授摺

撫標右營守備請仍以張湘補授摺

恭報越南國貢使過境日期摺

補題繕進鄉試題名錄摺

嚴飭練軍更番巡哨片

河工緊要請暫挪榮工加價銀兩摺

河岸沖塌逼近 漢陵設法守護並現議估修摺  
請將誑欠逞兇被控脫逃之總兵蔣德華先行革

職勒緝究辦摺

報解黑龍江官兵資裝銀兩摺

河岸冲塌勘明孟津縣屬被淹災民先行撫卹摺  
籌解奉省官兵俸餉片

續解吉林冬圍經費片

續解西甯豫師軍營專餉片

嚴飭搜捕李六案内餘匪按名弋獲正法現在邊

圍綏靖摺

飭委臬司紹誠會同候補道劉成忠勘估 漢陵

工程片

毅軍西征運費請免造報細數片



詹事府詹事袁保恒之祖母郭氏年屆百歲籲懇

援案 恩施摺

奉撥山東堤工銀兩請 敕部改撥摺

恭謝 恩賞福字摺

請以儘先守備李得明補撫標左營守備摺

查明請保各員懇照原保獎勵摺

籌撥巴里坤餉銀片

撥解哈密專餉片

卷五

已故道員袁保慶在籍歷著戰功請附祀袁甲三



陳州專祠摺

查明鄉試年老諸生摺

勘明籌辦孟津河岸工程片

委員護送越南使臣回國片

張景芝繼妻孟氏殉夫自盡援案請旌片

汜水縣民因糧票索費糾眾滋事分別查辦摺

恭報出省閱伍起程日期摺

遵撥烏魯木齊餉銀摺

籌撥西征糧臺餉銀運費摺

續撥西甯豫師軍營專餉片

起解積欠東三省俸餉銀數摺

龍神靈顯請加封號摺

續撥新疆協餉銀兩摺

查閱南陽歸德鎮各營事竣旋省趕辦秋審摺

兵馬錢糧奏銷仍請分別展緩摺

起解奉省賑濟銀兩摺

籌撥巴里坤哈密兩城專餉銀兩摺

籌議嵩毅兩軍先後出關需餉浩繁請旨飭部

先就正餉糧料運費按月酌加大數指省協撥

摺

豫省庫儲入不敷出請將奉撥各路協餉暫予停  
緩片

籌撥黑龍江官兵整裝銀兩片

籌解黑龍江賑濟銀兩片

勘明虞城縣風雹情形暨申檀寺等村莊成災分

數懇 恩蠲緩摺

請以卽補都司訥勤補襄城營都司摺

拏獲在逃匪首梁文秀照案定擬正法摺

各屬捐辦兵勇棉衣循案請獎並現飭停止摺

裁撤豫銳營防勇片

卷六

豫省十二年新漕仍請辦理折色摺

籌解西甯豫師軍營專餉片

河陝汝道員缺遵章以候補道尹耕雲酌補摺

陳報出省查閱河北河陝各營起程日期片

飛蝗過境嚴飭搜捕遺孽及地方先旱後澇情形

摺

遵 旨籌議匪盜就地正法章程體察情形尙難

改歸舊制摺

審明汜水縣刁徒夏振青等挾制官吏分別按律



定擬摺

山東樂陵縣知縣張熙瑞前在河南邙縣任內倡

捐草料請予獎勵片

請銷去前南陽縣知縣李瀛察看字樣片

請裁撤河北等處釐局片

遵 旨查閱通省營伍情形摺

兼校練軍片

壽婦于氏年屆百齡五世同堂請 旨旌表摺

道員張汝瀛在原籍奉 旨建祠請列入祀典摺

請以懷慶府知府馬先登調補省會知府摺



籌議嵩毅兩軍正餉已竭全力支應實難量爲增

撥請將肅州墊辦糧料各款指撥歸還摺

瀝陳豫庫匱乏實在情形各路協餉仍請准予停

緩改撥摺

勸辦積穀民捐民儲以備荒歉摺

請將濬縣知縣陳寶豐革職片

壽婦于氏更正冊結片

創議豫省練軍章程並呈馬步隊營制口糧清單

摺

撫標親兵二營改照練軍章程片

豫庫入不敷出已將十二年漕折銀兩動應急需  
現擬另籌補解摺

遵 旨酌保搜捕南山匪徒出力文武各員懇予  
獎勵摺

請將參將玉壽王大鵬等補參將都司守備各缺  
摺

恭謝 御賜福字摺

查明虞城縣被風被雹夏邑等縣被蝗及被淹被  
旱各屬業經分別蠲緩來春勿庸接濟摺

恭奉 哀詔驚知 大行皇帝 龍馭上賓披瀝

悲忱戀悃籲懇 躬節哀摺

懇將前借鹽漕銀兩歸軍需項下動用報銷片  
續撥西甯豫師軍營專餉片

卷七

同治四年以前舊案交代無著虧項請扣廉歸補摺

請留大枝勁旅以作中原活兵摺

請以游擊孔廣思補歸德鎮左營游擊摺

請以都司龔從岱補南陽鎮襄城營都司摺

捐修滎陽縣城工請廣學額並獎敘官紳摺

豫省本年新漕委難辦運本色仍請折銀解部摺  
 河臣喬松年因病出缺請旨簡放並代遞遺摺

摺  
 請將考城縣仍隸歸德府並將考城縣改爲簡缺  
 光山縣改爲要缺摺

陳請  陞見摺

請以汝陽縣知縣鞠捷昌調署祥符縣片  
 降調臬司興奎俟提勘秋審事畢卽飭交卸片  
 續解西甯專餉片

兵馬錢糧奏銷撥案請緩摺



覆奏襄城營都司員缺仍以龔從岱請補摺

開歸道任道鎔委署臬司片

籌撥景廉新疆軍餉片

籌撥出關運費片

感受風熱兼患瘡瘍懇 恩賞假調理摺

遺摺



奉

旨補授直隸按察使謝

恩摺

奏爲恭謝

天恩籲懇

陛見仰祈

聖鑒事竊

臣

接奉督

臣

行知十一月二十八日內閣奉

上諭直隸按察使著錢鼎銘補授欽此當卽恭設香案

望

闕叩頭謝

恩訖伏念臣起家儒素賦質庸愚由舉人戶部主事奔走戎行渥膺薦擢本年五月奉

旨補授直隸大順廣道九月由籍到省奉檄赴官閱時尙淺從政多疎方期展十駕之勤欲勉効六廉之治乃分符魏博未酬

簡畀之恩而陳臬邦畿遽拜遷除之

命捐糜莫報感悚難名伏查直隸稱繁劇之區臬司攬刑名之總如臣樛昧深懼弗勝惟當時惕冰淵答涓埃於

聖世差幸近瞻雲日慄咫尺於

天威擬將任內經手事件料簡就緒一俟新任受代卽  
當趨赴

闕廷展覲

天顏恭求

訓示庶幾仰承

聖誨粗識明刑弼教之方俯竭愚忱稍申墜露輕塵之

報所有微臣感激下忱籲懇

陛見緣由理合繕摺具陳伏乞

皇太后

皇上聖鑒訓示謹

奏

同治八年十二月十四日

傳解革員張光藻劉傑起程赴津日期遵

旨覆奏摺

奏爲傳解革員起程赴津日期遵

旨覆奏仰祈

聖鑒事竊臣於七月十二日承准軍機大臣傳諭同治

九年七月十一日奉

上諭已革天津府知府張光藻已革天津縣知縣劉傑  
著錢鼎銘卽行派員解往天津聽候質訊等因欽此  
欽遵當卽派員分投查傳旋知張光藻劉傑兩員  
一赴順德一赴密雲又經加派委員馳往守提迅



速解津嗣於十七日奉本月十六日

上諭著錢鼎銘懍遵前旨將該革員等立即解津其起解日期並著由該臬司迅速覆奏等因欽此臣復立派幹弁飛騎兼程分路迎提因尚無起解的期未敢遽行覆奏旋於二十一日已刻奉本月二十日  
上諭仍著懍遵前旨星夜派員前往將該革員等迅解天津不准藉詞託病等因欽此即於是日午刻據順德府知府任道鎔飛稟自接臣初次嚴劄即力催該革員於十八日帶病起行又據十七日派出武弁馳報十九日在柏鄉縣途次接遇委係力疾趲

程並據原派解員候補知縣張光鏞等稟同前由復經臣派保定府通判吳保琛馳往望都縣一帶嚴飭革員張光藻及歷派各解員由便捷小路兼程前往不准繞道省城以期迅速至劉傑一員二十一日亥刻據密雲縣知縣唐鉞原派委員候補知縣王霖稟稱押解該革員於二十二日星馳赴津不敢延誤除仍嚴飭原派各員押同趕緊趲行並飛稟督臣曾國藩查核具奏外所有查傳革員起解日期理合遵

旨覆奏伏乞

皇太后

皇上聖鑒謹

奏

同治九年七月二十三日

奉

旨補授直隸布政使謝

恩摺

奏爲恭謝

天恩仰祈

聖鑒事竊臣於本月二十日接奉督臣曾國藩行知同

治九年八月初四日內閣奉

上諭直隸布政使著錢鼎銘補授欽此臣跪讀之下感

悚交增謹卽恭設香案望

闕叩謝



天恩伏念臣起家儒素識淺才疏上年冬月由大順廣道首被

寵命擢授臬司本年五月趨詣

闕廷疊蒙

召對聆

聖慈之訓誨荷

簡畀之優隆清夜捫心感慚無地乃抵任甫逾夫兩月而

新綸復迓於

三霄尤非夢想所敢期抑豈捐糜所能報竊思直省藩



司統轄百四十州縣職任旬宣地居首要理財察  
吏責重事繁澄敘勾稽均非易易如臣禱昧深懼  
弗勝惟有益勵冰兢實心實力將應辦事宜隨時  
稟商新任督臣李鴻章認真經理並督飭所屬激  
發天良努力趨公以冀稍酬

高厚鴻慈於萬一所有微臣感激下忱謹繕摺叩謝  
天恩伏乞

皇太后

皇上聖鑒謹

奏

同治九年八月二十一日

恭報接受直隸藩篆摺

奏爲恭報

微臣

接篆日期仰祈

聖鑒事竊

臣

昨奉督

臣

行知本年八月初四日奉

旨補授直隸布政使當經恭摺叩謝

天恩遵將臬司任內交代趕緊清釐完結於八月二十

八日准調任浙江布政使

臣盧定勳將

敕印文卷移送前來

臣

恭設香案望

闕叩頭謝

恩祇領任事伏念

臣

以菲材首被

寵命擢授臬司涓埃未報復蒙

簡畀藩條臣雖愚鈍敢不破除積習奮勉趨公於察吏  
安民籌餉練軍諸務固當加意考覈通盤區畫近  
年庫儲支絀尤必嚴防滑蠹認真釐剔以期滴滴  
歸源况現值督臣曾國藩與新任督臣李鴻章先  
後赴津奉

命會辦事件除遇有緊要公務隨時稟商辦理外其餘  
省中一切事宜臣更當督飭所屬隨到隨辦矢慎  
矢勤斷不敢稍形怠忽藉以仰酬

高厚生成之至意所有微臣接篆日期理合恭摺具  
奏伏乞

皇太后

皇上聖鑒謹

奏

同治九年九月初一日





奉

旨補授河南巡撫謝

恩摺

奏爲恭謝

天恩籲請

陛見事竊臣於本月十三日由督臣行知接准部咨內

開同治十年十一月初三日奉

上諭李鶴年著補授閩浙總督河南巡撫著錢鼎銘補

授欽此臣跪讀之下謹卽恭設香案望

闕叩謝

天恩伏念臣起家儒素識淺才疏由道員首被

恩綸擢授直隸臬司旋擢直隸布政使到任以來甫逾

一載兢兢釐剔寸效毫無遽蒙

簡畀封疆重任受

恩逾渥報稱愈難聞

命震驚罔知攸措竊思河南地方居疆域之中界連秦

晉屏蔽幽燕統轄九府四直隸州政務殷繁形勢

曠衍頻年陝邊未靖時須兼顧西防且與江蘇之

徐州安徽之潁亳山東之曹郡湖北之襄棗隨黃

壤地交錯從前爲捻匪出沒之區現雖一律肅清

而兵燹之餘伏莽未靖練軍籌餉察吏安民在在均關緊要如臣禱昧深懼弗勝惟有籲懇

聖恩准臣入都瞻仰

天顏親承

訓示庶初肩鉅任獲有遵循稍免隕越如蒙

俞允查新任藩司孫觀到任需時臣藩司任內未完事

件應卽趕緊清釐由督臣李鴻章先行委員署理

以便臣交卸起程赴

闕請

訓所有微臣感激依戀下忱謹先繕摺叩謝

天恩伏乞

皇太后

皇上聖鑒謹

奏

同治十年十一月十五日



恭報接受河南撫篆摺

奏爲恭報微臣接印任事日期叩謝

天恩仰祈

聖鑒事竊臣於本年二月十三日趨詣

闕廷恭覲

天顏仰蒙

召見二次

聖慈優渥

訓誨周詳欽感微衷莫名依戀三月初二日

陛辭後束裝起程繞道津門與督臣李鴻章面商直豫

兩省練軍事宜茲於四月初八日行抵河南省城  
准升任撫臣李鶴年委署開封府知府黃汝楫撫  
標中軍叅將穆特布賚送巡撫兼提督關防一顆  
暨

王命旗牌文卷等項前來臣卽恭設香案望

闕叩頭祇領任事伏念臣以道員荷

特達之知未及一年洊擢兩司復蒙

簡畀封疆重任

鴻施稠疊駑策悚惶惟有於練軍河工等事懍遵

聖訓盡心整頓民生吏治加意講求斷不敢稍涉因循

亦不敢過事操切以期上答

高厚生成於萬一再臣經過直隸各屬民情靖謐入河  
南界糧價中平二麥並已秀茂可卜有秋足以仰  
慰

宸厪所有微臣感激下忱並接印任事日期理合繕摺  
恭謝

天恩伏乞

皇太后

皇上聖鑒謹

奏

金海月之序正名一

同治十一年四月初九日

一四

恭謝兼兵部侍郎銜摺

奏爲恭謝

天恩仰祈

聖鑒事竊准吏部咨以微臣蒙

恩補授河南巡撫應否兼兵部侍郎銜奏請

欽定奉

旨照例兼銜欽此臣當卽恭設香案望

闕叩頭敬謝

聖恩伏念臣蒞蘆下士樗櫟散材荷蒙

特達之知



簡畀封圻之任感增鼇戴方慙未報於涓埃戒懷鵠濡

復迓

申頌於

綸綍日贊勤宣夙夜六卿之位重槐班夏官職典兵樞

九法之教先芟舍自

天寵賚伏地悚惶臣惟有益竭駑庸倍加黽勉覈吏治

而兼籌武備慎徵調於牙璋儆干楨而並論書升

儲材能於爪士蒐茲軍實勵乃戎司以冀仰答

高厚鴻慈於萬一所有微臣感激下忱理合繕摺恭謝

天恩伏乞

皇太后

皇上聖鑒謹

奏

同治十一年四月十五日



請展緩兵馬錢糧奏銷摺

奏爲兵馬錢糧奏銷勢難隨同地丁奏銷彙題援案  
奏請展緩恭摺仰祈

聖鑒事竊照豫省兵馬錢糧奏銷向係隨同地丁造冊  
具題自軍興以來庫款支絀旗綠各營兵餉不能  
應時支發上年始將同治六年兵餉發清造報並  
於歷辦地丁奏銷時請將兵餉奏銷

奏准展緩在案茲屆同治十一年奏銷之期據布政  
使劉齊銜詳稱本年應將七年兵餉奏銷挨次接  
辦惟上年支發各營兵餉時因七八兩年均積

欠若僅將舊欠給發則新招兵丁必待數年始能  
食餉是以先儘九年新餉給發並按季帶發舊欠  
以卹兵艱由前撫臣咨行各鎮營知照在案迄今  
七年以後兵餉尚未支發完竣勢難依限造報擬  
請將七年至十年兵馬錢糧奏銷展緩至支發清  
楚再行挨案造報等情請

奏前來臣復查該司所詳委係實在情形除飭將積  
欠各該年兵餉次第清發再行挨案造報外所有  
同治七年至十年兵馬錢糧奏銷懇請展緩緣由  
理合恭摺具



奏伏乞

皇太后

皇上聖鑒訓示謹

奏

同治十一年四月二十八日



報解東三省俸餉及整裝銀兩摺

奏爲報解東三省俸餉及整裝銀數日期仰祈

聖鑒事竊查河南省地丁項下於同治九年八月奉撥  
吉林官兵整裝銀五萬兩又於同治十年七月在  
積欠東三省俸餉項下奉提銀五萬兩均卽速籌  
委解赴

盛京戶部交納等因當經前撫臣李鶴年飭據藩司  
於十年十一月間按款各解銀一萬兩交納

奏報在案臣到任後清查豫省奉撥應解各款原擬  
督司寬爲籌解迨綜核司庫收支款目備悉其入

金匱要略卷之九十一  
少用繁實難周轉是以歷年奉撥京協各餉均有  
遲欠其入不敷出情形亦經前撫臣節次臚陳久  
邀

聖明垂鑒茲復飭據藩司劉齊銜竭力騰挪於同治十  
年地丁項下再解奉提東三省俸餉銀一萬兩吉  
林官兵整裝銀一萬兩定於五月初六日委員管  
解起程前赴

盛京戶部交納等情請奏前來除繕咨給領起程並  
飭將下餘銀兩趕緊續籌委解外所有現據委解  
東三省俸餉等款銀數日期理合恭摺具

奏伏乞

皇太后

皇上聖鑒謹

奏

同治十一年五月初八日





奉撥吉林黑龍江官兵整裝銀兩摺

奏爲奉撥吉林黑龍江官兵整裝銀兩全數起解日期恭摺具陳仰祈

聖鑒事竊照同治十一年四月二十三日承准軍機大臣字寄四月十七日奉

上諭戶部議奏吉林調赴肅州官兵應給軍裝等項銀兩請於河南地丁項下撥給銀一萬二千五百兩黑龍江出征官兵應需整裝銀一萬一千八百四十六兩零請於河南驛站存贖項下撥給等語按照該部撥給數目趕緊委員解赴盛京戶部交納等因欽此

欽遵轉行在案伏查豫省庫款固屬萬分支絀惟奉撥前項整裝銀兩爲征繕要需尤應尅期措解以利師行茲據布政使劉齊銜按察使紹誠詳稱遵於地丁項下籌備銀一萬二千五百兩又於驛站存贍項下籌備銀一萬一千八百四十六兩定於五月初六日委員管解起程赴

盛京戶部交納等情請奏前來除繕給咨牌飭領起解外所有奉撥吉林黑龍江官兵整裝銀兩全數起解日期理合恭摺具

奏伏乞

皇太后

皇上聖鑒謹

奏

同治十一年五月初八日





增培河武二縣沁河隄工銀兩請動款給發摺  
奏爲增培河武二縣沁河隄工擬將原估徐保等工  
節省銀兩辦理尚有不敷籲懇

天恩俯准動款給發以竟要工恭摺仰祈

聖鑒事竊查懷慶府屬河內武陟二縣沁河隄岸自咸  
豐三年以來經費支絀十餘年未經大修兩岸隄  
身間段殘缺或數十丈或百餘丈不等上年沁流  
盛漲險工林立當經前撫臣李鶴年於勘估徐保  
方陵漫口摺內聲明隄身卑薄之處甚多若不擇  
要培修難禦來年盛漲擬俟另估奏報等情在案

嗣徐保等處湯口合龍飭據懷慶府督同河內縣  
歐陽霖勘得該縣沁河南岸自負背村起至馮莊  
大壩止計工三十三段北岸自鄔頭村起至小堂  
前止計工十四段需銀一萬五千二百九十三兩  
零又督同署武陟縣駱文光勘得該縣沁河南岸  
自石荆起至方陵止計工十三段北岸自傅村起  
至龍王廟止計工六段並添土壩七道需銀一萬  
四千一百七十三兩零以上各工均由道咨司核  
明實係撙節估計減益求減並無絲毫浮冒至原  
估徐保方陵漫口工程約需銀三萬兩嗣經前撫

臣李鶴年再三釐剔徐保止用銀一萬兩方陵止用銀五千八百餘兩共節省銀一萬四千餘兩原擬將節省之銀留爲培隄之用茲查河武二縣培隄共需銀二萬九千四百餘兩前案節省全數撥支尚不敷用據布政使劉齊銜河北道綸恩會詳

呈請

奏明發款辦理等情前來臣查增培沁隄向係借動庫款工竣在於河北三府屬攤征還項茲攤征名目已於咸豐五年奉

旨永遠禁止而工程緊要民力維艱未便遷延致滋貽



誤相應奏懇

天恩准將此案培修隄工照數動支徐保等工節省銀兩辦理尚不敷銀一萬五千三百餘兩仰乞

聖慈俯准一併飭發俾要工得以及時趕辦環沁居民

感沐

皇仁實無既極除動用銀兩仍俟工竣飭造細數清冊同徐保等工用款分別核實彙案報銷外所有勘估培隄銀數動款給發辦理緣由理合恭摺具

奏伏乞

皇太后

皇上聖鑒訓示謹

奏

同治十一年五月二十七日





籌撥新疆各餉摺

奏爲遵

旨籌撥新疆各餉數目起解日期恭摺奏祈

聖鑒事竊豫省於同治九十兩年先後奉

旨飭於積欠新疆協餉項下撥解烏里雅蘇台專餉銀

十萬兩撥解巴里坤哈密兩城兵餉銀十萬兩等因

欽此欽遵各在案茲據布政使劉齊銜呈稱前項奉撥銀兩原應如數籌解曷敢稍事延緩惟因豫省餉源支絀庫儲匱乏籌解實屬爲難現經竭力設措於庫存十一年丁地項下動銀二萬兩以一

萬兩撥解烏城以一萬兩撥解巴哈兩城均於五月初六日發交委員候補知縣張清彥領解起程遵照

諭旨前赴察哈爾都統衙門交納以憑轉解前進分濟要需具詳請

奏前來臣查豫省兩軍在外歲需餉銀百萬有餘西事孔亟絲毫不能遲欠兼之各路協餉均須籌解通計每年所入除丁地而外別無進款司庫委形拮据惟軍餉緊要亟應勉力供支除再由臣飭司趕籌續解外所有遵撥烏城及巴哈兩城各餉數

日起解日期理合繕摺具

奏伏乞

皇太后

皇上聖鑒訓示謹

奏

同治十一年五月二十七日





請以遺缺府英瑞委署開封府知府片

再前奉

上諭開封府知府員缺緊要著於通省知府內揀員調補所遺員缺著英瑞補授欽此先經前撫臣行司詳委候補知府黃汝楫署理開封府印務附片陳明在案該員自署任以來公事尚無貽誤茲因另有差委交卸其開封府員缺臣督同兩司在於現任知府內逐加揀選一時實乏合例堪以調補之員所遺印務仍應遴員接署查英瑞業經到省察看該員樸誠靜細足資表率且久分刑部行走曾派

秋審處坐辦於刑案事宜尤爲熟悉以之委署開  
封府知府印務可期得力仍俟署任後察看果能  
勝任再請補授據藩臬兩司會詳前來除批飭檄  
遵外爲此附片具陳伏乞

聖鑒訓示謹

奏

同治十一年五月二十七日

撥解甘餉暨豫師軍營協餉片

再豫省前奉

諭旨提撥甘餉銀八萬兩並欠解西甯辦事大臣豫師軍營協餉經臣到任後飭司迅速籌解茲據布政使劉齊銜呈稱本年二月間西征糧臺委員曹文芳赴河南禹州採買羸頭谷由司庫撥借銀三千兩現於庫存十一年丁地項下籌動銀七千兩連前撥兌共合銀一萬兩作爲甘餉又於十一年丁地項下籌動銀一萬兩作爲豫師軍營協餉均於五月十九日發交西征糧臺提餉委員候補知縣

何桂昌照數領解起程回臺交納分濟要需具詳  
請

奏前來 臣覆核無異理合附片具陳伏乞

聖鑒訓示謹

奏

同治十一年五月二十七日



撥解烏城臺站銀兩片

再臣於同治十一年四月初八日准軍機大臣字  
寄奉

上諭烏城臺站需用較多該部請於山東河南兩省同  
治十一年征收地丁項下各撥銀二萬五千兩卽著  
迅速解交察哈爾都統衙門轉解烏里雅蘇臺以資  
應用勿稍延緩等因欽此欽遵當卽由臣檄司迅速  
籌解去後茲據布政使劉齊銜呈稱遵於同治十  
一年地丁項下先行湊集銀一萬兩於五月初六  
日委員管解起程前赴察哈爾都統衙門交納以



金華書局影印  
三  
憑轉解具詳請

奏前來臣覆核無異除再嚴催續解外所有遵撥烏  
城臺站銀兩數目起解日期理合附片具陳伏乞  
聖鑒訓示謹

奏

同治十一年五月二十七日

會拏豫皖交界匪徒李六李四龔仔摺

奏爲皖豫交界匪徒拒捕經臣添派兵勇並咨會鄰

省一體堵拏務獲懲治以靖地方恭摺仰祈

聖鑒事竊照皖豫兩省毘連之固始商城霍邱等縣犬

牙相錯奸宄易藏捻匪蕩平以來伏莽未盡翦除

光固一帶本有前任撫臣李鶴年派防兵勇臣到

任後卽據署固始縣知縣胡慶駟稟稱土匪李六

在霍固交界地方派飯訛搶經臣飭派叅將汪印

千帶領駐紮襄城防兵前往商固會同該管地方

官嚴密查拏去後茲據叅將汪印千游擊彭萬里

署固始縣知縣胡慶騮稟稱探得匪徒李六勾結安徽霍邱縣李四龔仔糾聚固境之裴家沖花葉山等處隨各帶兵勇前往捕拏於五月二十三日夜間馳抵鎖口迤南地方遇匪格鬪當經殺斃匪黨數名該匪等暗伏林箐之中開放槍礮致傷兵團乘間竄逸二十九日追至黎家集復格殺巨匪王二學生等三十餘名生擒巨匪潘四等十三名匪首李六帶傷東竄現在霍境之葉家集附近佔踞民寨派飯劫奪又訪得李四龔仔一名李昭仁係已革提督李世忠分居族弟平日向不安分現



因李世忠前赴金陵遂與李六勾結佔踞李世忠族姪李德橫莊園得有大銅礮槍藥據李世忠之子李顯謀稟稱已通知李世忠速卽回歸計拿李昭仁卽李四龔仔送究各等情並據該管鎮道州稟報前來臣查李六等互相煽結爲害閭閻迨經兵勇查拿復敢糾眾抗拒實屬形同悖逆現雖受創東竄亟應捕治以盡根株當經照會南陽鎮總兵趙鴻舉帶兵前往並將駐紮襄城隊伍全數調赴固始以厚兵力復因河北鎮總兵崔廷桂前在宛南緝捕刀匪素稱得手星夜函致該總兵令其

金海青之志正夕一  
馳往督率相機剿捕務期速就殲除以靖地方而  
慰

宸厯除已飛咨安徽撫臣英翰壽春鎮總兵郭寶昌派  
隊一體堵拿外所有皖豫交界匪徒拒捕經臣添  
派兵勇會合剿捕緣由理合繕摺馳

奏伏乞

皇太后

皇上聖鑒訓示謹

奏

同治十一年六月初九日



馳報兵圍獲勝生擒匪首李四聾仔摺

奏爲豫省兵團會合皖軍擊匪獲勝生擒匪首李四聾仔現仍合力搜捕以期盡絕根株恭摺具陳仰祈

聖鑒事竊臣前將固始土匪李六與安徽霍邱縣匪徒李四聾仔卽李昭仁勾結拒捕當經添派兵勇會同地方官剿捕獲勝一面咨會鄰省堵拏並函令河北鎮總兵崔廷桂馳往督辦各緣由於本月初九日馳

奏在案臣拜摺後卽飛催崔廷桂星夜渡河該總兵

已於初十日到省與臣會商機宜卽刻帶兵前進連日接據叅將汪印千遊擊彭萬里署固始縣知縣胡慶騮商城縣知縣李德重稟稱該匪於六月初一日由葉集竄回固境李家圍盤踞當經該叅將等督率兵練圍攻格斃匪黨三十餘名生擒盧花仔高聚寶等八名將李圍賊巢平燬搜出槍礮子藥旗械多件餘匪向南駛竄初三日追至商城縣境之張家堂地方適皖省提督牛師韓副將徐思忠叅將朱天慶均各帶兵馳到當將張家堂大廟四面兜圍合力攻擊該匪將廟牆挖穿礮眼抵

禦官軍初四日二更以後匪眾被攻情迫由西北衝出開放大銅礮藥發礮炸豫皖各軍乘勢截擊格殺甚多計豫軍槍斃匪黨四十餘名並將匪首李四聾仔卽李昭仁及頭目吳長林張上銀等七名登時擒獲餘匪零星四散現仍督率追捕等情馳報前來臣查李六聚眾滋擾實恃李四聾仔爲狼狽之勢李四聾仔旣經擒獲則李六勢孤膽寒稽誅不久惟必早爲弋獲方可淨絕根株除再嚴飭帶兵將弁及該地方官等會合皖省兵勇搜拏李六及餘匪悉數務獲外所有兵團獲勝生擒匪

首李四龔仔等辦理緣由理合繕摺馳陳伏乞

皇太后

皇上聖鑒訓示謹

奏

同治十一年六月十四日



會同河督請以留省另補知縣李澍補商邱縣知縣摺

奏爲揀員請補要缺知縣以裨地方恭摺仰祈

聖鑒事竊照商邱縣知縣周劭報捐離任准吏部知照係同治十一年四月初五日行文按照限減半計算應扣至四月十九日爲開缺日期業經截缺造報在案查例載知縣應調缺出俱令於現任人員內揀選調補如無合例堪調之員准以候補人員題補如候補無人亦准於應升人員內揀選題升又新章內開題調缺出仍照例於現任人員內揀





題補汲縣知縣因防堵聯莊會匪出刀保奏奉

旨以直隸州用欽此調補淮甯縣知縣咸豐九年十二月因案調省旋經奏結飭令回任同治元年以辦理團練出力保奏奉

旨賞戴藍翎欽此三年十二月因人地未宜奏請開淮甯縣缺留省遇有相當缺出酌量補用七年題補南陽縣知縣因該員前在汲縣任內有未完錢糧革職降調兩案處分開復日期係在南陽縣出缺之後奉部議駁嗣委署理商邱縣知縣印務於十年七月十二日到任該員老成穩練辦事實心現

金海月公選正卷一  
署斯缺辦理裕如且曾歷任繁缺以之補授商邱  
縣知縣實堪勝任惟調缺請補與例稍有未符第  
人地實在相需例得專摺奏請據藩臬兩司會詳  
前來合無仰懇

聖恩俯念員缺緊要准以留省另補知縣李澍補授商  
邱縣知縣實於地方有裨如蒙

俞允該員係留省另補知縣請補知縣銜缺相當毋庸  
送部引

見亦毋庸查開叅罰謹會同河東河道總督臣喬松年  
合詞恭摺具

奏伏乞

皇太后

皇上聖鑒訓示謹

奏

同治十一年六月二十日







籌撥景廉軍營協餉片

再臣前奉

諭旨景廉現擬採買駝隻及籌撥軍裝等項需款甚急著於該省欠解新疆軍餉及景廉軍餉內無論如何爲難先行籌撥銀六七萬兩迅速解至察哈爾收存解交景廉應用等因欽此欽遵當卽飭司籌撥去後茲據布政司劉齊銜呈稱豫省欠解餉銀除五月間委員解過專餉一萬兩外前奉催提業將豫庫支絀萬分情形詳請咨復在案茲奉上諭先行籌解銀六七萬兩遵卽竭力設措於庫存本

年丁地項下動銀二萬兩於七月初九日發交景  
廉軍營催餉委員都司郭永慶許登科領解起程  
前赴察哈爾都統衙門交納轉解等因具詳請

奏前來臣覆查無異所有起解數目日期理合附片

陳明伏乞

聖鑒訓示謹

奏

同治十一年七月十六日

南陽左營暨確山營守備仍以儘先守備文盛花

榮桂請補摺

奏爲南陽鎮標左營守備確山營守備各員缺仍懇  
以儘先守備文盛花榮桂補授恭摺仰祈

聖鑒事竊查南陽鎮標左營確山營各守備缺出前經  
前升撫臣李鶴年以儘先守備文盛花榮桂請補  
嗣准兵部咨覆文盛儘先名次在後其名次在該  
員之前者尚有二十餘員何至均於此缺不宜遽  
以名次在後之文盛請補核與定章不符至儘先  
守備花榮桂請補確山汎守備查該員名次亦屬



在後應均毋庸議等因於同治十一年五月初五日具奏奉

旨依議欽此知照到臣自應遵照辦理伏查南陽鎮標左營及確山營守備兩缺均係推缺現當整頓營伍之際未便稍事遷就致滋貽誤隨經逐加遴選儘先名次在前各員非未諳營務卽人地生疏均於此二缺不甚相宜惟查有儘先守備文盛年力正強熟諳營務儘先守備花榮桂年壯技優差操勤勉以該弁等請補南左營確山營守備各缺均堪勝任從前歷有似此奏准成案臣因爲地擇人

起見理合聲明仰懇

天恩俯准仍以儘先守備文盛補授南陽鎮標左營守  
備儘先守備花榮桂補授確山營守備實於營務  
地方兩有裨益除將該員等履歷送部外相應恭  
摺具陳伏乞

皇太后

皇上聖鑒訓示謹

奏

同治十一年七月三十日





捕獲匪首李六地方肅清附保出力人員懇

恩獎勵摺

奏爲官軍追捕匪首現將李六一犯擒獲餘匪搜除  
淨絕地方一律肅清籲懇

天恩俯准將在事尤爲出力人員給予獎勵恭摺仰祈  
聖鑒事竊 臣前將皖豫匪徒滋事陸續派隊前往剿捕  
迭次獲勝生擒匪首李四龔仔訊明正法餘匪殲  
除略盡仍飭嚴拏李六務獲等情於六月初九十  
四等日先後馳

奏在案時值南汝光道傅壽彤引

見回豫當卽飭令馳赴光固一帶會同南陽鎮總兵趙鴻舉河北鎮總兵崔廷桂督率文武員弁搜緝餘匪購拏首逆節經捕獲悍黨鄔際仔等多名訊供李六蹤跡迄無定向復經嚴飭勒限捕拏去後茲接該鎮道及在事員弁稟報據稱李六自被官軍擊敗之後率其死黨竄入皖豫毘連之枸杞嶺金剛臺皂口一帶深山踰伏該鎮道等派令叅將汪印千游擊彭萬里等分率各隊四路進搜復經署固始縣知縣胡慶騶勸諭寨團同心協緝並於各要路密伏勇練星羅碁布該匪等自知不能遠遁

晝則隱藏深谷夜則露宿懸崖該處疊嶂重巖林深箐密兵勇等攀藤附葛四面逼圍匪黨情急潛於山後樵徑滾坡竄逸官兵得信尾追於本月初一日追及潁州地界該匪一經出山沿途裹脅勢將復熾驟遇官兵膽敢逞兇回鬪叅將汪印千游擊彭萬里等預撥馬隊包抄截其去路各領步隊直前奮擊當經槍斃匪黨三十餘名匪勢不支向南奔馳又復回竄我軍緊躡於初二日追至固始縣境東北二十五里之吳家集地方適署固始縣知縣胡慶騮率領勇團踵至合擊又斃匪黨數十



名殘眾追殺立盡當將匪首李六登時擒獲訊認  
明確具報前來伏查自臣抵豫之始卽慮皖豫交  
界伏莽未清當派叅將汪印千率領駐防襄城勇  
隊拔赴光固與前經河北鎮臣崔廷桂派駐固始  
之游擊彭萬里會同地方官弁巡查彈壓此次李  
四聶仔李六等勾結滋事若非該叅將及該地方  
官等伺其萌芽甫動急起剿除難保不致蔓延釀  
成大股且李四聶仔四路勾結匪徒響應李六實  
恃爲羽翼若非黎集之勝我軍血戰逆折凶鋒張  
堂之戰會合皖軍將李四聶仔立時拏獲難保該



匪等不絡繹麇聚勢且日張旬日之間未必卽能  
撲滅論功行賞當臣前次報奏之時卽擬摘敘戰  
功籲請

恩施獎勵惟因李六一犯未獲是以責令嚴拏並添派  
大員督率辦理茲賴

聖主福威首犯先後就擒地方一律安靜在事人員或  
指揮調度或力戰勤劬數月以來始終不懈均有  
微勞足錄合無仰懇

天恩俯准將記名提督河北鎮總兵崔廷桂  
賞給正一品封典鹽運使銜南汝光道傅壽彤

賞加按察使銜總兵銜副將用之儘先叅將汪印千擬請免補副將以總兵用副將銜儘先游擊彭萬里擬請以叅將仍留河南儘先補用同知用署固始縣知縣胡慶騮擬請俟補缺後免補同知以知府補用出自

逾格鴻慈再南陽鎮總兵趙鴻舉因辦理軍政經臣先期飭令回宛是以未經附保合併聲明除其次出力人員由臣分別覈實請獎外所有官軍拏獲李六餘匪淨絕地方肅清懇

恩獎勵緣由謹繕摺由驛馳陳伏乞

皇太后

皇上聖鑒訓示謹

奏

同治十一年八月初一日



豫省庫儲支絀專協各餉未能依時措解請

旨敕部籌議摺

奏爲豫省庫儲匱乏入不敷出專協各餉未能依時

措解請

旨敕部籌議恭摺瀝陳仰祈

聖鑒事竊臣前於籌解西征協餉及新疆西甯烏魯木

齊等處軍營餉項當將豫庫支絀情形歷次隨摺

奏陳在案同治十一年六月二十八日奉

上諭豫師奏西甯軍餉緊要各省月撥專餉截至本年  
四月底止共欠銀四十七萬兩本年僅據兩淮報解



銀六千兩遵照部定章程請將玩誤甯軍專餉之藩  
司議處並請飭山東等省迅解欠餉等語報解不及  
二成之河南布政使劉齊銜著先行交部議處以示  
薄懲並著兩江總督江蘇山東河南各巡撫嚴飭藩  
運各司限一月內將積欠西甯專餉先行提撥一半  
迅速解交西征糧臺轉解嗣後仍當源源接濟不得  
再有蒂欠以重軍食欽此欽遵當經臣嚴飭依限趕  
籌速解去後茲經布政使劉齊銜於本年丁地項  
下動撥銀二萬兩業交西征糧臺催餉委員領解  
起程回臺交納轉解豫師軍營以應急需由臣另

摺具奏並據該藩司詳稱豫省自軍興十餘年供支軍餉司庫早已悉索無餘迨七年肅清以後張宋兩軍赴甘協剿所需餉項及軍裝一切仍由豫省支給每歲共需銀一百三十五萬餘兩加以京餉工需旗綠河各營減成兵餉各官養廉一應雜支共一百三十餘萬兩又加固本軍餉東三省餉銀常年甘餉西路各營協餉一百五十七萬餘兩統計每年出項已將及四百三十萬兩之多至司庫入款以丁耗爲大宗近年災歉頻仍蠲緩民欠之外征解僅得二百萬兩房雜各稅約十餘萬兩

捐輸則早經停止釐金又爲數甚微所可藉資周轉惟漕糧改辦折色一款迭因軍餉河工急需借動遂致未能盡行解部此外別無來源出入相懸之數已逾二百萬應解之款自以京餉爲先其次則本省黃河工需張宋兩軍月餉均係急款萬難延欠至於各路協餉亦關緊要惟總須本省有餘款可挪方能濟他省之不足所以各路專協餉項不能依時如數措解實緣庫儲支絀等情具詳請奏前來臣向在軍營習知前敵需餉情形不容刻緩到任以來遇有催提撥解各款無不督飭藩司儘



力攢湊截至本年七月計已解過四十一萬四千餘兩比八九十三年撥解之數目較多卽庫儲之支絀愈甚現值西陲未靖

宵旰焦勞所有專協各餉自應勉力籌解以期迅奏膚功非但該藩司職任度支責無旁貸臣受

恩深重具有天良但能設法支挪萬不敢稍涉延緩無如出入情形相懸若此倘再緘默不言徒使西軍有協餉之多無得餉之實萬一貽誤大局則臣等負罪愈深再四思維有籲懇

天恩俯念豫省兩軍在外雖當肅清之後實與本省用

兵無異

敕部從權籌議將各路專協各餉或暫行改撥或量加減緩一俟張宋兩軍凱撤本省無需軍餉每歲多此壹百數十萬兩帑銀即可分撥各路餉需應時措解若以現在情形而論實屬無可勉籌即使臣等重膺譴責亦與軍務無裨用特冒昧瀝陳祇候聖諭遵行臣無任悚切屏營之至所有豫省庫儲匱乏入不敷出專協各餉未能依時措解請

旨敕部籌議緣由理合繕摺具

奏伏乞



皇太后

皇上聖鑒訓示謹

奏

同治十一年八月二十日



籌解豫師軍營協餉摺

奏爲遵

旨籌撥西甯辦事大臣豫師軍營協餉起解數目日期  
恭摺具陳仰祈

聖鑒事竊臣前奉

上諭西甯軍餉緊要著嚴飭藩司限一月內將積欠西甯專餉先行提撥一半迅速解交西征糧臺轉解等因欽此欽遵當卽飭司籌解去後茲據布政使劉齊銜詳呈豫庫匱乏各情現於萬分爲難中就庫存同治十一年丁地項下先行挪撥銀二萬兩於本

月十三日發交西征糧臺催餉委員何桂莊領解起程回臺交納轉解以應急需詳請具

奏前來臣查豫庫情形實屬萬分拮据除由臣另奏

請

旨敕部籌議外所有現撥豫師軍營協餉起解數目日期理合繕摺具陳伏乞

皇太后

皇上聖鑒訓示謹

奏

同治十一年八月二十日



請將匪棍陳遇廷就地正法並將節婦胡氏

敕部旌表摺

奏爲著名匪棍惡跡多端訊明供認謀搶節婦威逼  
致死等情請

旨就地正法並將該節婦

敕部旌表以維風化而昭炯戒恭摺奏祈

聖鑒事竊臣恭膺

簡命巡撫豫疆屬當兵革之餘敦龐未復亟應以除暴  
安良移風易俗爲首務查有固始縣著名匪棍陳  
遇廷素與小哥哥會匪裴四條腿楊勞小疊劫巨盜

王廷揚胡三元周二老芳等結識往來恣行不法  
爲鄉民所畏懼當飭署固始縣知縣胡慶騮訪拏  
審訊並據查明該匪棍從前私自設卡抽釐拒捕  
刃傷勇役挾嫌仇殺孫培元一家七命率眾逼搶  
孀婦致死各情均各有案可稽供證確鑿呈請從  
嚴懲辦經臣檄委南汝光道傅壽彤於查拏李六  
之時就近親提研鞫以成信讞茲據該道稟稱匪  
棍陳遇廷當捻匪滋擾之時結黨橫行素爲地方  
之害鄉民畏其仇復未經指告現經覆訊數次其  
仇殺孫培元一家七命雖該犯堅不吐實而原證

趙彩仔供極明確至圍搶孀婦吳胡氏威逼自縊一案則據供稱同治十年十月間起意謀奪縣民吳長春之弟吳長隆遺妻胡氏與姪爲妻胡氏立志守節不肯改嫁因往喻繼昌家避匿該犯復率領多人將喻繼昌家圍住喻繼昌乘夜將胡氏轉送至劉得全寨內藏躲該犯又率領多人將劉得全寨圍守三日三夜以致胡氏情急自縊等情供認不諱並據吳長春喻繼昌吳連科供證相符稟請具

奏前來臣查陳遇廷一犯當捻亂之時惡跡多端本



屬罪無可追乃自肅清以後又復起意糾眾圍困  
民寨三晝夜之久致令守節之婦投繯自盡罪惡  
顯然實屬目無法紀臣未敢稍存拘泥相應請  
旨將該匪棍陳遇廷就地正法並將該節婦胡氏  
敕部照例旌表以洽輿情而昭炯戒出自  
聖明天斷除取具該氏族鄰冊結送部外所有請  
旨辦理緣由謹繕摺具奏伏乞

皇太后

皇上聖鑒訓示謹

奏



同治十一年八月二十日



豫省十一年新漕懇請仍徵折色摺

奏爲豫省連歲歉收元氣未復並因鄰省採辦軍食糧缺價昂本年新漕勢難征運本色懇請仍照歷屆成案折銀解部恭摺仰祈

聖鑒事竊照漕糧正供例應征兌本色以副京倉支放豫漕改徵折色以來已非一屆臣到任後留心體察私糞本年如值豐收糧多價減即可規復舊制斷不敢因援成案率請折征茲屆十一年新漕啟徵之期臣與該管司道通計闔省情形復加體察仍有萬難兌運本色之勢緣豫省兵燹之後連年

災歉閭閻元氣未復戶鮮蓋藏本年麥收僅止中  
稔夏秋雨澤過多各州縣田禾被淹雖未至連片  
成災而秋穫實形歉薄加以陝甘軍務未平各處  
防剿軍精多在豫省設局採買轉運是以價值愈  
昂米糧愈缺若再責令各州縣起運本色不特十  
數萬石之糧驟難辦解延誤堪虞且糧價必致增  
而又增民食軍精更形竭蹶兼之豫省庫儲匱乏  
前曾覩瀝實情瀆陳

宸聽所有西征各餉河工用款均屬刻不容緩遇有支  
解無可籌撥之時尤不能不借折漕以資周轉再



四籌思惟有援案仍請折銀解部方有把握而無窒礙據布政使劉齊銜署糧儲道尹耕雲會詳請奏前來合無籲懇

天恩俯准將豫省十一年新漕仍照歷屆成案折銀解部庶於京倉庫款可免滯延而民食軍糈亦有裨益至各州縣折解銀數仍請照上屆奏案杞縣等三十三州縣每石折解銀三兩除二兩解部外以八錢充本省軍餉二錢爲公費祥符等十四州縣每石折解銀二兩八錢除二兩解部外以六錢充軍餉二錢爲公費內黃等六縣係屬著名苦缺每

金匱要略卷二  
石折解銀二兩以示體恤除俟明年察看情形能  
否徵運本色另行核辦外所有本年新漕仍請辦  
理折色緣由理合繕摺具陳伏乞

太后

皇上聖鑒訓示謹

奏

同治十一年九月初十日

請

敕加正陽縣城隍神封號並頒匾額摺

奏爲

神靈顯應保衛城池據情懇請

敕加封號頒賜匾額恭摺奏祈

聖鑒事竊據布政使劉齊銜轉據汝甯府知府覺羅溥  
泰正陽縣知縣張寶禧詳由該縣紳士候選知縣  
袁守成舉人黎鴻猷等稟稱咸豐三年六月捻首  
王黨雷六等率眾突撲縣城適值北隅城垣因雨  
沖塌數丈該匪乘夜猛攻守城文武督眾抵禦正

在危急忽見城西一帶樹林內燈光驟明旗幟無  
數旗上隱約有顯佑伯字樣卽正陽城隍前明之  
封號也城上開放大礮匪眾敗退翌日獲賊訊據  
供稱所見相同知有神助是以竄逸等語仰見

聖朝洪福百靈効順籲懇

欽頒匾額並加封號以彰靈應等情具詳請

奏前來臣查城隍正神載在祀典茲復特著顯應保

衛城池應請

頒發御書匾額一方並

敕加封號以順輿情而答



神貺謹繕摺具陳伏乞

皇太后

皇上聖鑒訓示謹

奏

同治十一年九月初十日



請將例

貢禾棗展緩一年片

再豫省例

貢禾棗自兵燹之後棗樹毀傷迭經前任各撫臣

奏請展緩嗣因軍務救平樹木培植漸見生長同治

九十兩年循舊採辦由升任撫臣李鶴年恭

進各在案茲屆本年採辦之期據布政使劉齊銜詳  
據永城縣稟稱該縣各鄉新種棗樹枝條穉弱結  
實本卽不繁本年夏季雨多風大樹株多被壓折  
及致結實又受蟲傷查驗闔邑情形相同實屬難

以採辦等情具詳請

奏前來臣因九十兩年既經採辦何以本年不能循舊當經飭司並令中軍叅將各派員弁分投密查據稱前往該縣按驗各鄉棗樹多被風壓間存棗實俱有蟲蝕痕迹情形屬實合無籲懇

天恩俯准將例進永棗展緩一年俟來年棗實繁茂再飭照常呈進事關方

貢斷不容稍有諉飾除飭司取具各結外理合附片具陳伏乞

聖鑒謹



奏

同治十一年十月十六日



豫省鄉試請添設房官摺

奏爲豫省人文日起鄉試士子較多懇請添設房官以資校閱而昭慎重恭摺仰祈

聖鑒事竊維各省鄉試掄才大典額設內簾房官分校試卷以期簡拔真材豫省從前鄉試不滿萬人是以前例設同考官十二房足敷校閱近年以來士子

涵濡

德化文教益興兼以迭荷

恩綸加廣學額多士觀光志切人數日增因貢院號舍不敷於上屆庚午科經前撫臣督飭司道會同紳

士相地添建新號三千餘間連舊號共計一萬五千間是科應試者至一萬四千餘人之多較歷前屆幾增三分之一每房分卷約至千餘批閱評衡刻無休暇該簾官等固不敢稍存草率第恐日後人數愈增勢必竭蹶弗遑不足以昭慎重據在籍紳士前江甯布政使王庭蘭布政使銜前湖南按察使倉景恬等公懇援照四川湖北成案添設同考官兩房自明年癸酉科爲始以資分枝等情呈由該府縣詳經藩司劉齊銜核請具

奏前來臣覆查四川於同治甲子科湖北於庚午科



均以增建號舍奏請添設房官奉

旨允准河南情事相同應請比照四川湖北兩省成案

籲懇

天恩將河南鄉試同考官添爲十四房俾得從容校閱  
簡拔無遺以期仰副

聖主嘉惠士林之至意理合恭摺具

奏伏乞

皇太后

皇上聖鑒訓示謹

奏

同治十一年十月二十八日

請以歸德左營游擊呂振河升補河南營叅將摺  
奏爲揀員請補叅將員缺恭摺仰祈

聖鑒事竊 臣前以河南營叅將金齡因病出缺當經  
題報並聲明所遺員缺豫省現有應補之員請歸外  
補在案查河南營叅將一缺雖屬推缺管轄本屬  
及汝州十三汛地並兼轄嵩縣營守備差務殷繁  
巡緝操防在在胥關緊要現當整頓營伍之時未  
便稍事遷就致滋貽誤隨於候補叅將內逐加遴  
選非人地生疏卽保舉名次在後均於此缺不甚  
相宜茲查有儘先叅將現任歸德左營游擊呂振

河於同治二年經團練大臣毛昶熙會同前撫臣張之萬因克復盧廟案內保奏奉

旨河南儘先游擊呂振河著俟補遊擊後以叅將儘先升用欽此旋於八年八月補授今職在任三年操防緝捕均各認真該員心地樸誠能耐勞苦以之升補河南營叅將實堪勝任且儘先名次在前與例相符合無仰懇

天恩准將儘先叅將現任歸德左營遊擊呂振河補授河南營叅將實於營伍地方兩有神益除履歷咨部外相應恭摺具



奏再所遺歸德左營游擊一缺豫省現有應補人員  
應請扣留外補合併

奏陳伏乞

皇太后

皇上聖鑒訓示謹

奏

同治十一年十月二十八日



查明舊案軍需支用各款開單存案摺

奏爲查明舊案軍需實在收支及墊發各總數遵

旨開單恭摺

奏報仰祈

聖鑒事竊照同治三年七月初十日奉

上諭同治三年六月以前各處辦理軍務未經報銷之  
案准將收支款目總數分年分起開具簡明清單奏  
明存案免其造冊報銷又八月二十日奉

上諭同治三年六月以前各處軍需用款准照新章奏  
報事屬創始其中款目繁多應如何分年分起覈實

開報之處着該大臣督撫各就實在情形先行妥議  
章程具奏等因業經前撫臣飭據報銷局司道詳議  
具奏奉

旨戶部知道單並發欽此由部咨覆照辦並歷次奏報  
在案茲據軍需報銷局詳稱遵查咸豐三四年間  
豫省髮捻各逆往來竄擾經前順天府府尹楊需  
暨按察使銜牛鑑及前撫臣陸應穀英桂先後督  
帶兵勇分駐各處防剿各行營糧臺收支軍需數  
目又咸豐六年歸陳等處設局捐賑所收米麥奏  
明歸入軍需及歸陳兩府守城勇糧並散放貧民



口食動用款數均據糧臺委員造送到局該局司道督飭局員查照奏定章程逐款勾稽覈實刪減各將應銷實數開報又軍需局及各州縣歷年支發本省外省滿緣各營進征歸伍官兵征防壯勇應需鹽糧馬乾採買芻糧騾馬製造軍裝軍火暨撥解餉項辦理軍需報銷文武委員薪水廉俸書役飯食一切雜支及各營縣捐輸勇糧兵差糧料車輛等項銀錢總數現亦一併查開清單並聲明同治三年六月以前軍需動用應報各款均已悉數查報完竣等情請

奏前來 臣覆查所開各案軍需均在同治三年六月以前應遵

旨免其造冊除將欠發之數照章辦理外所有悉數查明舊案軍需支用各款理合分案開具清單恭摺奏請存案伏乞

皇太后

皇上聖鑒謹

奏

同治十一年十月二十八日

訊明惡棍馬勞梆請就地正法摺

奏爲積惡擾害閭閻肆行糾劫訊明罪犯多端擬照  
新章請

旨就地正法以儆兇頑而昭炯戒恭摺奏祈

聖鑒事竊照河南衛輝府屬之滑濬一帶民俗素稱悍

鷙兼與直東兩省毘連匪徒勾結滋蔓堪虞臣到

任以來卽飭該地方官等嚴密訪拏以期除暴安

良潛移末俗查接管卷內有濬縣土棍巴革千總

馬勞梆卽馬治幘又卽馬梆安經前任撫臣李鶴

年據河北鎮總兵崔廷桂督率營縣訪獲解省究



辦茲據署按察使糧鹽道段廣瀛督同署開封府知府英瑞等訊實該犯糾搶客民伍清財煙土得贓一百二十兩以上按律擬發近邊充軍係職官犯罪從重實發黑龍江當差遇

赦不准援減正在擬辦間疊據淇縣民張好祥李存仁汲縣捐職徐連璧等各以該犯馬勞梆挾嫌圖賴挖眼剝腳以及誣欠逼毆等詞先後控訴當經提驗張好祥徐連璧被毆成篤屬實復據訪聞該犯私鑄小錢偽造假銀通匪窩賊截搶客商霸占良女惡跡多端滑濬湯淇等處紳民無不切齒緣該



犯兇暴素著被害之家畏其尋仇報復隱忍不言現因訪獲在案始敢出名呈懇惟該犯異常刁狡延不承招而眾口矢稱毫無疑義洵爲積惡非尋常搶劫案犯可比若僅科以發遣不足以儆兇頑而洽輿論援引同治八年奏定嚴懲匪徒新章具詳請

奏前來臣覆查該犯惡跡昭著且係職官已屬法無可貸加以通匪窩賊擾害閭閻當此地方甫就肅清伏莽未靖之時若不從嚴懲治何以示儆將來且其罪犯多端均各供證確鑿非僅出自訪聞既

據該司等詳請援照新章辦理臣未敢稍存拘泥相應請

旨將該犯馬勞梆就地正法以昭炯戒出自

聖明天斷臣爲除暴安良殺一警百起見所有擬辦緣由理合繕摺具陳伏乞

皇太后

皇上聖鑒訓示謹

奏

同治十一年十一月十六日

查明陣亡知府王榮烈顏懷忠援案請謚摺

奏爲查明業經議卹之陣亡知府功績卓著遺愛在民援案籲懇

天恩予謚以彰忠節而順輿情恭摺奏祈

聖鑒事竊查前河南候補知府王榮烈由附貢生候選知縣疊因剿匪出力保升知府咸豐十年奉

旨交軍機處記名簡放並

賞給銳勇巴圖魯名號八月追賊至汝湯縣界官莊地方突遇援賊萬餘將我軍圍裹該故員血戰竟日力竭陣亡經前撫臣慶廉奏奉



諭旨加贈太僕寺卿

賞雲騎尉世職並准於汝甯府及官莊建立專祠又候補知府顏懷忠於咸豐六年由陳州府通判調署鹿邑縣印務值張落刑大股捻匪攻撲鹿邑該員率眾固守力保危城旋調大營以軍功保升知府

賞戴花翎咸豐九年三月在皖境汴河地方剿賊疊獲勝仗嗣因兵單賊眾受槍陣亡曾經奏奉

恩旨從優照道員例議卹等因各在案仰見我國家酬忠之典至優極渥茲據汝陽鹿邑紳士復羅舉該二員戰功政績呈請奏懇



加恩予諡由該管府縣詳經布政使劉齊銜核請具

奏前來臣查

賜諡向有一定品秩該故員等官僅知府與易名之例未符惟查前湖北荆門直隸州知州李棟安陸府知府金雲門廣東從化縣知縣李福培等死難均經奏准

予諡有案王榮烈顏懷忠在豫久歷戎行戰功卓著所在士民追念謳思且該二員臨敵捐軀情形慘烈合無籲懇

天恩俯准援案

賜諡其顏懷忠一員兼請於任所及原籍准其捐建專祠並將隨同顏懷忠剿賊立功先經陣亡之河南候補府經歷陳謨一併附祀以彰忠節而順輿情  
出自破格

鴻慈謹繕摺具

奏伏乞

皇太后

皇上聖鑒訓示謹

奏

同治十一年十一月十六日

籌撥哈密軍餉片

再豫省奉撥哈密軍餉四萬兩節經由臣飭司趕籌措解茲因哈密委員來豫採辦軍裝應用據布政使劉齊銜呈稱在於同治十一年丁地項下先行籌動銀四千兩於十月十九日發交委員都司高林照數收領採辦並再籌撥餉銀一萬兩俟該都司採買製造齊備照數領解前赴察哈爾都統衙門交納轉解以濟急需等因具詳請奏前來臣查此次豫省籌撥哈密軍餉共一萬四千兩理合附片具陳伏乞

聖鑒謹

奏

同治十一年十一月十六日



查明剿除皖豫匪徒拏獲李六等要犯懇將出力  
官紳分別獎勵摺

奏爲查明剿除皖豫匪徒並將李四龔仔李六等首  
要各逆先後拏獲正法全境肅清在事尤爲出力  
官紳核實繕具清單籲懇

恩施獎勵恭摺仰祈

聖鑒事竊照本年五月間皖豫交界匪徒滋事經臣駱  
驛派隊前往會合皖軍當將全股撲滅復先後拏  
獲李四龔仔李六等首要各逆歷經

奏明並將統帶文武大員及地方官隨摺保請獎勵

已蒙

恩准各在案伏查李六李四聶仔狼狽爲奸互相勾結  
潛約潁毫壽泗一帶匪徒陰謀起事蓄志已久迨  
經訪聞緝捕其時人數業已眾多遂肆行蠢動臣  
疊次嚴諭各統將惟以迅速剿除爲事是以黎集  
張堂之戰各在事文武官紳均能奮不顧身冒暑  
鏖戰各歷三四晝夜之久乃使凶鋒大挫全股撲  
滅向或稍緩須臾各路匪徒麇集必致蔓延焚掠  
滋害閭閻分剿聚殲大煩兵力及至李四聶仔就  
擒李六竄身荒谷該文武官紳等又各分投設伏

合力搜拏鑿險縋幽風飡露宿於阻絕無人之地  
捕剿數月旋因該逆脫逃復分隊馳追四路堵截  
更番死鬪併力兜圍卒將該首逆李六擒獲餘匪  
翦除淨絕全境肅清是此次奏功之速實因該員  
弁等親冒矢石戮力所致臣身爲疆吏詳悉戰事  
情形未敢壅於上達故於前次奏報卽經聲明在  
事出力人員容臣核實請獎以期仰副  
聖主嘉績賞功無微不錄之至意茲據該鎮道等核實  
呈請具

奏前來臣復細加核減擇其尤爲出力員弁繕具清



單恭呈

御覽合無籲懇

天恩俯准獎敘以勵戎行而勸速效出自  
逾格鴻慈除咨獎各員另核辦理外所有剿除皖豫匪  
徒淨盡並擒獲首要各逆在事尤爲出力官紳核  
實分別請獎緣由謹繕摺馳陳伏乞

皇太后

皇上聖鑒訓示謹

奏

同治十一年十一月十七日



謹將查明剷除皖豫匪徒並先後擒獲李四龔仔  
李六等首要各逆全境肅清在事尤爲出力官紳  
核實繕具清單恭呈

御覽

計開

副將銜撫標左營儘先叅將王大鵬擬請俟補缺  
後以副將遇缺儘先補用

候補遊擊楊振邦擬請

賞加副將銜

儘先都司張夢林擬請以遊擊留豫儘先補用

儘先都司李步湯擬請以游擊儘先補用

遊擊銜儘先都司羅景燾儘先都司吳名揚均擬請免補都司以遊擊仍留原標遇缺儘先前補用並

賞加副將銜

升用都司龔從岱擬請以都司留豫歸撫標遇缺儘先前補用並

賞加游擊銜

撫標都司王連三擬請以游擊仍歸原標儘先補用

儘先守備高廷瑞王長勝均擬請以都司儘先補用

守備銜儘先千總李春魁擬請以守備留豫補用  
並

賞加都司銜

候選同知丁建勳同知銜直隸州用候補知縣席元鑾均擬請

賞戴花翎

候選知縣胡松年擬請仍以知縣分發省分補用  
遊擊銜儘先都司尹彥鏢擬請

賞戴藍翎

候選詹事府主簿崔正鼎擬請以通判分省歸軍

功候補班前先補用

選缺後以通判歸候補班前先補用候選州同何

保榮擬請免選本班以通判分發省分仍歸候

補班前先補用

知縣用候補縣丞多彬擬請免補本班以知縣歸

候補班前先補用

候補布庫大使高紹祺擬請俟選缺後以通判歸

候補班前先補用並



賞戴藍翎

遇缺卽選吏目張豫升擬請仍以吏目留豫遇缺  
前先卽補並

賞戴藍翎

分缺先選用典史潘慶熊擬請免選本班以主簿  
分發省分歸候補班前先補用

試用未入流吳秉義擬請以典史歸候補班前先  
卽補並

賞戴藍翎

已革嵩縣營把總儘先守備劉占順擬請開復原

官仍留豫省補用

以上二十三員均帶隊在於張堂地方力戰三晝夜立將李四輩仔拏獲並擒斬要逆多名數月之間搜捕餘匪淨絕迨李六就擒之時該員弁等均經在事洵屬異常出力理合登明

武進士王安國藍翎儘先守備葛新周均擬請以都司儘先拔補

撫標藍翎守備魏雲標擬請以都司仍歸原標儘先補用並

賞換花翎

候選同知傅岷孫擬請以同知分發省分歸候補班前儘先補用

六品銜遇缺前先補用知縣汪嘉言擬請俟補缺後以同知直隸州儘先補用

提舉銜試用通判汪坦候補布庫大使劉葆森均擬請歸候補班前遇缺儘先補用

同知銜湖北試用知縣朱有寬擬請仍以知縣留於湖北歸候補班前儘先補用

都司銜儘先守備吳景春擬請仍以守備歸河南撫標儘先補用

南陽鎮標荆關營西坪汛千總張卓起擬請以守  
備在任候升

六品藍翎儘先卽補驍騎校存善擬請以防禦儘  
先卽補

歸德鎮標左營儘先千總侯效顏歸德鎮標右營  
儘先千總夏占魁歸德鎮標永城營儘先千總  
王廷揚藍翎五品銜南陽鎮標候補千總崔伯  
田儘先千總陳玉崑均擬請以守備仍歸原標  
儘先補用

分發試用縣丞沈尚賓湖北試用府經歷汪元澂



均擬請俟補缺後以知縣儘先補用

候選縣丞孫潤章擬請仍以縣丞留於河南歸候  
補班補用

以上十九員均於黎集帶隊接仗斬擒夥要各  
逆多名涉險入山分路設伏搜捕匪黨冒暑奔  
馳數月之久卒將首逆李六拏獲勞績卓著理  
合登明

分發河南試用典史康奉琦擬請免補本班以鹽  
大使分發省分歸候補班前先補用

文童尹儒珍擬請以典史留豫歸候補班前先補

用

六品軍功東河先儘主簿焦鳴崗擬請俟補缺後  
以縣丞在任歸先儘前班候補

候選主簿李蔭普擬請俟分省後歸儘先班前補  
用

知縣用候選縣丞吳元善擬請

賞加州同銜

舉人汪煥墀擬請以知縣歸部不論雙單月選用  
遇缺選用訓導周純熙擬請

賞加國子監典籍銜

千總李駿聲擬請以守備歸河南撫標儘先補用  
千總丁鳳卜吳燿魁均擬請以守備儘先補用

監生蔡文元擬請以從九品歸部選用

以上十一員均各率領鄉團力助官軍躬冒矢  
石數月之久迭獲勝仗擒斬要逆並隨同拏獲  
李六搜捕餘匪鄔際仔等多名皆屬尤爲出力  
理合登明





附保南陽鎮總兵趙鴻舉前信陽協副將降補游擊尹嘉賓片

再記名提督南陽鎮總兵趙鴻舉前於李六等滋事之始卽帶隊馳往督剿嗣因辦理軍政暫回南陽經臣於前摺聲敘在案查該總兵在固之時會同河北鎮總兵崔廷桂南汝光道傅壽彤統率各將弁等實力剿除肅清全境所有調度協合機宜深資得力又記名提督前信陽協副將降補游擊尹嘉賓經臣派往隨同崔廷桂督隊剿捕每戰必先陣斬要匪多名洵屬奮勉出力合無仰懇

天恩俯准賞給趙鴻舉軍功隨帶加二級開復尹嘉賓  
降補處分仍以提督

簡用出自

鴻施謹附片具陳伏乞

聖鑒訓示謹

奏

同治十一年十一月十七日

籌撥烏魯木齊餉銀摺

奏爲奉撥烏魯木齊餉銀起解銀數日期恭摺具陳

仰祈

聖鑒事同治十一年七月二十三日奉

上諭定安派撥馬步隊二千名赴烏助剿所有製辦軍裝及採買駝隻共需銀十七萬五千兩著於應解烏魯木齊餉銀內先籌撥銀四萬五千兩解交綏遠城歸定安支用等因欽此欽遵當經行司籌解去後茲據布政使劉齊銜呈稱奉撥烏魯木齊餉銀四萬五千兩本應隨時如數起解惟因豫省庫款支絀



奉撥西征軍餉並京協要款以及本省旗綠營餉  
工需暨一切應支急用共需銀四百四十餘萬而  
司庫全年入款尚未及半入不敷出顧此失彼實  
屬措置爲難第採辦駝隻軍需緊要不得不力籌  
撥解現於庫存同治十一年丁地項下籌動銀一  
萬兩於十一月二十三日發交委員候補知縣呂  
烈駿領解起程前赴綏遠城將軍衙門交納以濟  
急需等情具詳請

奏前來臣查豫省庫儲入不敷出前曾瀝奏上達  
宸聰其支絀情形久在



聖明洞鑒惟以軍需緊要不得不勉爲籌解共濟時艱  
所有奉撥解交定安支用烏魯木齊餉銀起解數  
目日期理合繕摺具

奏伏乞

皇太后

皇上聖鑒謹

奏

同治十一年十一月二十七日



起解東三省積欠俸餉摺

奏爲起解積欠東三省俸餉銀數日期恭摺仰祈  
聖鑒事竊查奉省用款不敷抵放於同治十一年五月  
奉提河南積欠項下銀五萬兩卽籌撥解赴

盛京戶部交納等因咨行遵照在案茲據布政使劉  
齊銜詳稱豫省歷年奉撥黑龍江吉林打牲烏拉  
各款名目旣多銀數亦鉅因司庫入不敷出致未  
按款清解現奉提撥積欠俸餉則黑龍江等三省  
欠餉均在其內自當量爲分撥免致顧此失彼茲  
在於地丁項下籌措銀三萬兩定於十一月二十

日委員管解起程前赴

盛京戶部交納聽候酌量分撥各省應用等情請  
奏前來除發給咨牌飭領起解外所有奉撥積欠東  
三省俸餉現籌起解銀數日期理合恭摺具

奏並請

敕下盛京將軍奉天府府尹先期派員酌帶弁兵抵關  
迎護前進以昭慎重而免疏虞伏乞

皇太后

皇上聖鑒訓示謹

奏



同治十一年十二月二十七日

藏文書目

三



節孝李彭氏割臂療姑援案請旌片

再據河南候補道薛華坤候補知府卓景濂等稟稱查有四川同鄉現任河南尉氏縣知縣李鉤之母李彭氏係四川廣安州人於道光元年氏年十九歲歸李鉤之父李同春爲繼室時同春之母李劉氏在堂前室所遺二子俱幼彭氏事姑以孝相夫教子均恪盡婦職結縭七載李同春病劇彭氏割臂療治同春病故李鉤年止四齡家甚貧苦賴彭氏紡績治生仰事俯育道光十年李劉氏患病危殆復經彭氏潛割臂肉和藥以進姑病尋愈里

白雲山房  
卷之二  
三  
黨聞之羣相驚歎今李鉤服官迎養彭氏在署年  
已七十歲計守節四十四年恭遇

聖朝德化凡有青年守節年齒與例相符者無不

特沛恩施賜予旌表該氏含冰茹蘖久傳嘉行於里閭

職等維梓與桑彌切增榮於志乘因共造具冊結

稟懇援案奏請旌表建坊等情前來臣查同治五

年浙江黃巖縣教諭吳善城妻吳潘氏因姑病割

臂和藥又同治十年直隸漕運通判丁崇欽之妻

丁錢氏因姑丁鮑氏患病割臂和藥均經先後奏

奉



諭旨准其旌表在案茲李鉤之母彭氏以二十五歲守節至四十餘年已與旌表之例相符且其割臂療姑尤屬至孝出於天性核與吳潘氏等情事相同相應援案籲懇

天恩准其一體旌表建坊以彰節孝而維風化除冊結咨部外理合附片具陳伏乞

聖鑒謹

奏

同治十一年十一月二十七日

金每三月之ヲ正ノ二

号

籌解

盛京

鳳凰樓木植運腳片

再前准部咨奉撥河南地丁銀二萬兩恭備

盛京

鳳凰樓金柱木植運腳應用行令解赴

盛京戶部交納等因遵照在案茲據布政使劉齊銜  
詳稱遵於地丁項下先行籌措銀五千兩定於同  
治十一年十一月二十日委員管解起程前赴  
盛京戶部交納等情請

奏前來除給咨牌飭領起解外所有奉撥木植運腳  
現籌起解銀數日期謹附片陳奏伏乞

聖鑒謹

奏

同治十一年十一月二十七日



籌撥伊犁協餉片

再臣前奉

上諭因榮全奏酌定官兵口分請飭部豫撥經費三十萬兩並畫分新疆月餉當諭令戶部酌度辦理茲據該部奏稱部款不敷開放豈能復向外撥惟伊犁需餉緊迫亦係實情亟應寬爲籌備請於山西山東河南應解本年地丁京餉項下各畫撥銀五萬兩均係有著之款等語著卽嚴飭迅速如數籌撥解至綏遠城交定安接續轉運科布多由托倫布保英知照榮全迎提伊犁塔爾巴哈臺等城提用等因欽此欽遵

當經行司籌解去後茲據布政使劉齊銜呈稱在於徵收同治十一年地丁銀內京餉項下籌措銀五萬兩於十一月二十四日委員管解起程前赴綏遠城將軍衙門交納等情詳請具

奏前來

臣

覆查無異理合附片奏陳伏乞

聖鑒謹

奏

同治十一年十一月二十七日

地方營訊緝捕出力請予獎勵摺

奏爲地方營訊緝捕勤能請將尤爲出力各員弁量予獎勵以昭激勸恭摺具陳仰祈

聖鑒事竊查豫省自髮捻各匪蕩平以後地方雖係一律肅清而軍興旣久伏莽尚多荒僻之區及各屬沿邊一帶匪匪藏奸此拏彼竄各州縣緝捕稍鬆卽虞竊發蓋以近年秦隴用兵時有潰逃游勇往來豫境勾結搶掠實爲地方行旅之患臣到任以來體察情形嚴飭各州縣營汛認真搜緝復派得力將弁會同地方官分投兜捕陸續擒獲著名要



犯訊取確供率皆積年慣匪或曾投捻股拒敵官兵或曾充游勇犯事逃亡結黨爲盜當飭該管府州於覆訊後按照新章就地正法以昭炯戒半年以來地方漸就綏靖堪以仰副

聖主除暴安良之至意伏查政令之興必資賞罰地方竊盜各案逾限不獲文武員弁旣應照例撤叅則緝捕勤能勞績攸著之員自應量予獎勵以資觀感而策後效現經臣詳加察核該文武員弁中除尋常獲犯及名數不多者概予刪減外其始終勤奮屢次拏獲要犯多名之署祥符縣事杞縣知縣



查以謙擬請交部從優議敘同知銜襄城縣知縣  
高敬熾同知銜伊陽縣知縣繆萼聯均擬請以同  
知直隸州在任候補儘先千總新鄭汎把總毛有  
鳳桐栢汎千總王萬清均擬請以守備在任候補  
署王祿營守備張湘擬請以都司用合無仰懇  
天恩俯准獎勵出自  
逾格鴻施臣爲綏靖地方整頓捕務起見是否有當理  
合繕摺具陳伏乞

皇太后

皇上聖鑒訓示謹

奏

同治十一年十二月初五日

籌撥西征餉項摺

奏爲奉撥西征餉銀起解數目日期恭摺奏祈

聖鑒事同治十一年十月十五日准戶部咨稱遵

旨速議辦理西征糧臺袁保恆奏西征需餉甚殷援案  
懇請催提積欠銀兩一摺同治十一年十月初五  
日具奏奉

旨依議欽此計單原奏內開在於各省積欠甘餉款內  
河南提撥銀五萬兩限於十一月內解交西征糧  
臺撥用等因咨行欽遵查照飭司籌解去後茲據  
布政使劉齊銜呈稱此次奉文在於積欠甘餉項

下提撥銀五萬兩原應如數撥解曷敢延緩惟是  
司庫匱窘異常入不敷出專協各餉均未能依時  
清解以致積欠纍纍茲奉前因竭力措籌在於同  
治十一年丁地項下籌動銀一萬兩於十一月二  
十九日發交西征糧臺催餉委員候補縣丞周維  
祺領解起程回臺交納應用以濟急需等因具詳  
請

奏前來 臣查豫省庫儲支絀前已覩瀝實情上達

宸聽惟以西路餉需緊要不得不勉力措籌除再飭司  
趕籌撥解外所有奉撥西征糧臺餉項起解數目



日期緣由理合繕摺具陳伏乞

皇太后

皇上聖鑒謹

奏

同治十一年十二月初五日



籌撥烏魯木齊景廉及西甯豫師軍營協餉片  
再豫省奉撥烏魯木齊都統景廉軍營採辦駝隻  
軍裝等項銀兩前於本年七月間撥解過銀二萬  
兩又豫省應解西甯辦事大臣豫師軍營專協月  
餉計已先後撥解及抵兌並委員支領過薪水共  
銀八萬五十兩均經節次

奏明各在案茲據布政使劉齊銜呈稱庫款支絀入  
不敷出實屬萬分爲難惟以餉需緊要不得不竭  
力措籌現於庫存同治十一年丁地項下動撥銀  
一萬五千兩委員解赴察哈爾都統衙門交納轉

解景廉軍營應用又於同治十一年丁地項下動撥銀二萬兩委員解赴陝西省城西甯轉運局交納轉解豫師軍營應用均各於十一月二十九日發交領解起程等因具詳請

奏前來臣覆查無異理合附片具陳伏乞

聖鑒謹

奏

同治十一年十二月初五日



奉撥烏城臺站銀兩片

再豫省遵

旨撥解烏城臺站需用銀二萬五千兩前於五月間撥解過銀一萬兩當經

奏明在案茲復於本年徵收地丁項下籌動銀五千兩於十一月二十八日發交委員領解起程前赴察哈爾都統衙門轉解烏里雅蘇臺以資應用由布政使劉齊銜詳請具

奏前來臣覆查無異理合附片奏陳伏乞

聖鑒謹

奏

同治十一年十二月初五日

剿除李六股匪附保武員仍懇照原請獎敘摺

奏爲剿除李六股匪隨摺擬保之武員籲懇

天恩仍照原請獎敘以示激勸恭摺仰祈

聖鑒事竊

臣

前因李六李四聾仔等股匪滋事剿除迅

速當將督辦之總兵及尤爲出力之副將遊擊隨摺奏請獎敘已蒙

恩准在案旋據兵部咨稱此案應照緝捕例保獎議將擬請

賞加封典之河北鎮總兵崔廷桂改爲加一級擬請免補副將以總兵用之副將汪印千改爲俟補副將

後以總兵用擬請以叅將仍留河南儘先補用之遊擊彭萬里改爲俟補遊擊後以叅將仍留河南儘先補用均俟補缺時聲明係因獲盜出力併案給咨送部引

見等因奉

旨依議欽此欽遵咨行到臣自應查照恪遵曷敢再瀆惟查李六與李四聾仔等勾結起事陰謀已久故當蠢動之始黨眾已及數千若非豫境預設防兵皖省出師迅速蔓延爲害不可勝言能卽迅速撲滅者實因文武員弁兵團奮力血戰所致張堂之



役皖軍傷亡甚眾豫軍統將汪印千彭萬里均受  
礮傷裹創力搏始將李四龔仔登時擒獲其餘追  
剿搜拏隨時接仗斬俘均有案可稽其所以未成  
大股者實因剿滅之速堵禦之周若論初起之日  
臣亦不敢必其不至燎原及至李六就擒該將弁  
等又復馳剿數月始克將餘匪殄滅較之緝捕獲  
盜大相懸絕是以臣於保奏之時不得不按軍功  
擬請以期仰副

聖主綏靖疆圉策勵戎行之至意茲部議駁改該員等  
官階在部臣考核攸司自合循章奏請而疆吏情

形目擊尤當就事論功河南軍務雖平伏莽未靖

臣到任數月查拏匪犯請

旨正法以及按照新章懲辦者不下數十餘人閭閻藉  
稍安輯亦賴

朝廷賞罰有以鼓舞羣材使之效用且溯查豫省從前

泌陽土匪花得春宜陽土匪張野貓滋事經升任

撫臣李鶴年派員剿滅均按軍功保獎蒙

恩照准李六一案情事相同合無籲懇

聖慈俯准敕部將臣原保之河北鎮總兵崔廷桂副將

汪印千遊擊彭萬里仍按軍功照擬請之封典升

階給予獎敘以示激勸出自

逾格鴻施臣爲策勵後效起見所有籲請緣由理合繕

摺具

奏不勝悚切待

命之至伏乞

皇太后

皇上聖鑒訓示謹

奏

同治十一年十二月十六日

金每三斤乃多出老二

三



張宋兩軍添設轉運片

再臣前奉

上諭以宋慶赴甘助剿該軍月餉向由河南撥解著仍按月籌解源源接濟毋令缺乏等因欽此欽遵咨行各在案查豫省兩軍自赴西路向於山西太原府總要之地設立轉運局接遞餉銀軍火辦理數年尚無貽誤茲宋慶一軍調赴蘭州所有該軍餉項自應由西安取道張曜一軍駐紮甯夏若一併由西安設局轉運本係正路惟因固原一帶尚有阻滯餉銀爲軍食所關未便冒險前進現擬派令向

辦轉運之候補知府陸襄鉞前往西安設局專辦  
宋慶軍營轉運一俟毅軍拔隊卽行移局前進其  
太原向有之轉運局改派候補知府凌振家前往  
接替專辦張曜軍營轉運兩路兼籌庶於餉運等  
事較爲湊泊除分咨張曜宋慶及山西陝西各撫  
臣一體知照外理合附片具陳伏乞

聖鑒謹

奏

同治十一年十二月十六日

恭謝

恩賞福字一方摺

奏為恭謝

天恩仰祈

聖鑒事竊臣賫摺差弁回豫捧到

恩賞福字一方謹即恭設香案望

闕叩頭祇領伏念臣質比樗庸世叨芻豢辱荷

恩綸於疆寄未報涓微復蒙

寵錫於雲書彌滋淵惕欽惟我

皇上瑞輯蘿圖

慶延箕範

被洪庥於四表

道協文思

萃珍養於萬方

德隆孝治際此春回禹甸六出花飛羣覘

日麗堯階一陽莫展

犧畫啟苞符之秘

翰灑金鑾

龍章騰奎壁之輝

華徵玉券自



天福賁匝地歡臚臣惟有益竭駑愚冀申鼇戴合兩河

子庶同欣

寶墨之親瞻率百爾寅僚共上熙臺而晉祝所有微臣

感激榮抃下忱謹繕摺恭謝

天恩伏乞

皇太后

皇上聖鑒謹

奏

同治十一年十二月十九日



南陽府官紳防剿出力續請獎勵摺

奏爲查明河南南陽府屬歷年防剿尤爲出力官紳

續懇

恩施獎勵繕具清單恭摺仰祈

聖鑒事竊照同治二年前撫臣張之萬具題南陽府城

工捐貲出力各員名請照咸豐九年通行敘獎一

案經部議核與新章不符仍照城工定例議敘當

據案內捐紳米炳輝等援引直隸甯晉縣城工獎

案呈由都察院代奏奉

旨交部核議隨准吏部戶部先後咨查於同治七年經

升任撫臣李鶴年查明該府城垣歲久失修咸豐三年髮逆竄入豫曷宛郡戒嚴知府顧嘉蘅勸諭紳民合力捐修以資保衛民賴以安工程雖在咸豐九年以前捐辦實當軍務危急之際核與甯晉縣捐修城工之案情事相同援請照章辦理將前奉部議減等核准之文武職銜一併照原擬開單奏懇

恩准敕部核覆旋經部議以雖據該撫聲稱該官民急公效命出力出資惟與例章不符未便遷就辦理至所敘防剿捻匪勞績亦不得於修城案內牽敘



請獎所有仍請照新章給獎之處應毋庸議等因奉

旨依議欽此欽遵咨行各在案是此次獎案業已迭經部議奉

旨核減自應懍遵成憲曷敢再事瀆陳惟查此案城工雖與例章未符而防剿勞績實屬異常出力誠如部議不應於城工案內牽敘請獎臣自到任以來檢查舊卷接見屬僚詢問地方情形稔知豫省軍興以後各府均遭蹂躪南汝光屬被害最深而南陽一府尤爲喫重十數年來髮捻交訌干戈擾攘

迄無收歲咸豐三年髮逆闖入豫曷宛郡岌岌可危知府顧嘉蘅素得民心因城垣坍塌督率員弁勸導紳民出力出資捐修完整講求戰守之法號召鄉團嬰城固守同時所屬各縣或力保孤城或募勇殺賊皆顧嘉蘅指麾調度非止一年亦非止一事其防剿勞績實有未可泯沒者同治八年升任撫臣李鶴年奏將豫省歷年守城守寨出力人員獎敘之時因此案在前是以未將該府所屬官紳彙併敘列其間有附入者或係隨後勞績或在他處立功均非從前舊案是該官紳等防剿出力

轉因捐修城工格於定例不獲仰邀

懋典未免稍有向隅茲據該管府縣呈由道司分晰具

詳請

奏前來臣復細加查覈實屬著有微勞未便湮沒合

無籲懇

天恩俯准將該官紳等歷年防剿勞績照單給予獎勵  
以廣

皇仁而昭激勸出自

皇逾格鴻施臣不勝戰慄待

命之望所有查明南陽府官紳防剿勞績續續請獎勵緣

由理合繕具清單伏乞

皇太后

皇上聖鑒訓示謹

奏

同治十一年十二月二十七日



謹將查明南陽府城工案內防剿歷年竄匪尤爲出力各官紳覆核擬獎敬繕清單恭呈

御覽

前南陽府知府顧嘉蘅當軍情喫緊之際督飭官紳晝夜登陴保守危城親率練勇屢次出擊竄匪殲擒悍賊多名實屬異常出力擬請以道員留豫補用並

賞戴花翎

運同銜應升之缺升用鄧州知州黃縉昌擬請以知府在任候升

五品頂戴候補府經歷吳浦擬請以本班歸候補班前先卽補

候選同知顧棣華擬請以本班不論雙單月儘先選用並

賞加運同銜

藍翎五品銜楊向榮擬請

賞加運同銜

前南陽縣訓導現安徽候補直隸州知州王希曾擬請

賞加運同銜

舉人樊璟擬請以知縣歸部不論雙單月選用  
歲貢就職訓導喬泰平擬請以本班不論雙單月  
儘先選用

廩生魏汝坪擬請以訓導不論雙單月歸部選用  
藍翎五品銜候選知縣高樹序擬請以直隸州知  
州選用

同知銜舉人揀選知縣任恩錫擬請

賞戴藍翎

附生閆丕勛擬請以縣丞不論雙單月選用  
五品頂戴捐職縣丞劉文安擬請

賞加同知銜

五品頂戴藍翎候選主事李培遠擬請

賞加員外郎銜

候選教諭廩生李玉山擬請以本班教諭不論雙

單月儘先選用

五品頂戴分發陝西從九品董殿甲擬請以縣丞

歸部不論雙單月選用

現任河北廣濟縣龍坪鎮巡檢高舉擬請以應升

之缺升用並

賞加六品銜



指分河南試用未入流李友桐擬請本班到省後  
歸候補班前補用

拔貢候選教諭舒廷楨擬請以本班不論雙單月  
儘先選用

藍翎提舉銜候選知縣米鳳魁更名米鳳清擬請  
選缺後以直隸州選用

六品軍功附生葉星文擬請以縣丞不論雙單月  
選用

以上各員於歷次粵捻各匪竄擾宛境攻撲府  
城皆能不辭勞瘁分段防守督率練勇縋城出

擊先後斃賊無數保全郡城實屬非常出力理

合登明

南陽左營確山營守備兩缺另揀儘先守備王箱

張徵請補摺

奏爲揀員請補守備員缺恭摺仰祈

聖鑒事竊查南陽鎮標左營守備確山營守備各員缺

經前撫臣李鶴年以儘先守備文盛花榮桂請補

兵部以文盛等保舉儘先名次在後議駁臣因名

次在前各員均於此二缺不甚相宜復經奏請仍

以文盛花榮桂補授茲准兵部咨覆據稱名次在

前各員於此缺何項不宜究未指實仍難核准應

令另揀合例人員請補等因於同治十一年九月

初九日具奏奉

旨依議欽此知照到

臣

覆查整飭營伍全在將領得人

南陽鎮標左營及確山營守備均係推缺於所屬  
汛地緝捕操防最關緊要非幹練熟悉之員弗克  
勝任臣復於儘先守備中詳加遴選查有儘先守  
備王箱年壯技嫻諳習營務儘先守備張徵年力  
正強差操勤練且於地方情形均稱熟悉以之請  
補各缺洵堪勝任雖該員等保舉名次亦屬在後  
與例稍有未符惟名次在前之儘先守備張文成  
等於此二缺營務及地方情形俱欠熟諳未便拘



泥成例遷就請補致滋貽誤王箱張徵委係人地實在相需之員例得專摺奏請謹將不合例緣由並名次在前各員人地未宜之處循例聲明合無仰懇

天恩俯准將儘先守備王箱補授南陽鎮標左營守備儘先守備張徵補授確山營守備實於地方營伍兩有裨益理合恭摺具

奏伏乞

皇上聖鑒訓示謹

奏

同治十二年正月二十八日

通籌庫款懇將厯欠漕折分別解留並酌議新漕  
仍請折色摺

奏爲通籌豫省支撥各款司庫出入懸殊懇將厯年  
積欠漕折分別解留並酌議新漕仍請折色以期  
有益倉儲無誤工餉恭摺瀝陳仰祈

聖鑒事竊照同治十一年十二月二十七日准戶部咨  
稱奏奉

上諭飭將指撥續撥京餉及欠解漕折銀兩迅速撥解  
統於十二月初間全數解齊以應急需其預撥來年  
京餉務各提前趕撥源源批解毋稍延誤等因欽此

欽遵並查明歷年欠解漕折銀兩開單飭催咨行到臣當卽飭司趕籌撥解去後茲據布政使劉齊銜糧鹽道段廣瀛呈稱豫省漕折銀兩自咸豐十一年至同治五年除已解外餘均奏准留爲本省練兵備賑所需六年至十年除已解及留爲築工用款外共欠解銀一百一十三萬兩加以十一年已收之款統計積欠一百四十餘萬兩司庫每年所入僅止徵收丁耗及房雜各稅銀二百一十餘萬兩而出項日增卽如豫省先年用兵經前任撫臣嚴樹森奏定豫軍每月餉銀七萬兩近則每月



添至十一萬通年加增五十餘萬兩河工用款同治七年以前經前任河臣譚廷襄奏定每年二十萬兩近則加增銀二三十萬兩不等合以西陲各路協餉本省旗綠河各營兵餉各官養廉一應雜支歲需四百三十餘萬兩不敷過半此不能不動用漕折之實情而卽歷年積欠之所由來也現經

戶部奉

旨飭催亟應趕爲籌解曷敢稍涉緩延無如各項應支應撥尚借漕折爲通融更無別項可以彌補漕折而部需孔亟清解既有未能支放豈容或缺不得

已而爲變通之計擬於本年上忙開徵之後竭力  
挪措銀十五萬兩以五萬兩補解十年漕折以十  
萬兩作爲十一年漕折分作三批儘於四月內悉  
數起解以應部庫急需下餘欠解銀一百二十餘  
萬兩籲懇

天恩俯准作爲歷年張宋兩軍專餉及河工用款以清  
積欠至本屆十二年漕米前准部覆行令先時圖  
度徵收本色分成辦運等因亦經該司道等酌議  
僉以連年歲歉糧缺價昂全辦本色不免兵民交  
困即使分成辦運而倉廩船隻及漕次一切應用

之需事類創行非可咄嗟立辦况司庫上忙丁地  
旺收撥解尚易下忙完納寥寥向借漕折周轉一  
經改辦本色則下半年軍餉工需均無所出查咸  
豐十年以前豫省辦理漕折每石折銀一兩二錢  
五分統計解部銀二十餘萬兩今擬自十二年爲  
始請將漕糧仍辦折色每年定解部庫銀二十萬  
兩無論豫省如何爲難總於次年六月以前悉數  
清解較之咸豐年間折解之銀所少無幾京倉有  
此二十萬兩實銀或就近採買米石或卽以折色  
支放似尚不致過於短缺下餘應解之銀留作豫



省軍餉工需庶豫庫藉可支持京倉亦不致於匱  
乏一俟西路軍務肅清張宋兩軍凱撤再行照數  
折解或全辦本色以期仍復舊章等情會詳請

奏前來臣伏查豫省庫儲萬分支絀前曾觀瀝各情

上達

宸聽臣自上年四月到任緣向在軍營深知餉需緊要  
故於各營軍餉無不嚴催速解計自四月至年底  
統共解過京協各餉八十餘萬兩較前數年有贏  
無絀目擊該藩司竭蹶補苴實屬不遺餘力今此  
漕折一項既難清解而又不顧京倉連日與



司道等通籌全局再四酌商欲求事出兩全惟有  
據實直陳籲求

天鑒逾格

恩施准如所請則於倉庫餉需均有裨益臣爲清理積  
欠兼顧倉儲起見是否有當伏候

命下遵行所有請將豫省漕折分別解留並酌議新漕  
仍辦折色緣由謹繕摺具

奏伏乞

皇上聖鑒訓示謹

奏

同治十二年二月十五日

河北釐務酌加整頓片

再各省練兵籌餉多藉釐金之助豫境四通八達稽查不易是以歷年辦理抽釐迄無起色司庫之不能周轉亦職是之故查豫省自咸豐年間設立釐稅局抽收釐稅向以洋藥爲大宗南路濱水之區尚有別項貨物可以抽收若河北一帶除洋藥而外惟有藥材板釐一項歷經前任各撫臣先後奏明在案洋藥抽收釐稅每年按季奏報疊准部咨總以釐稅未能旺收飭將辦理章程報部查考節經轉行該管司道嚴密訪查據稱釐務未能旺收

實以西路軍務未平洋藥來源阻滯河北等處釐  
稅章程未能畫一是以礙難詳報茲臣以各路餉  
需緊要司庫磬懸擬將河北釐務酌加整頓因擇  
於衛輝府汲縣城外設立釐局一處而於河內縣  
之清化鎮滑縣之道口各設分局遴委妥員前往  
會同地方官試行辦理究竟能否必有起色尚無  
把握除俟抽收踴躍別無弊端再行據實  
奏報並將辦理章程咨部查核外所有整頓河北釐  
務試辦緣由理合附片陳明伏乞

聖鑒謹



奏

同治十二年二月十五日



省會知府請以現署之英瑞擬補摺

奏爲省會知府要缺擬請以現署之員補授恭摺仰  
祈

聖鑒事竊照同治十一年正月二十六日奉

上諭河南開歸陳許道員缺著張瀛補授欽此復准吏  
部咨奉

上諭河南開封府知府員缺緊要著該撫於通省知府  
內揀員調補所遺員缺著英瑞補授欽此等因應以  
准咨之日爲開缺日期旋因現任知府一時乏員  
可調經臣以英瑞

奏署並聲明仍俟署任後察看果能勝任再請補授  
在案伏查開封府爲省會首都管轄十六州縣政  
務殷繁且時有發審案件及協防黃河隄埽之責  
必須才識練達之員方足以資治理臣與藩臬兩  
司於通省知府內逐加遴選非本任緊要卽人地  
未宜惟查該員英瑞現年四十六歲係鑲紅旗滿  
洲烏爾棍泰佐領下繙繹生員由繙繹房繙繹官  
議敘選授禮科筆帖式咸豐八年

玉牒告成保奏以主事籤分刑部補授河南司主事歷  
升廣東司員外郎雲南司郎中調四川司掌印派



秋審處坐辦充律例館提調同治九年

京察一等奉

旨記名以道府用十一年正月二十六日奉

旨簡放河南開封府遺缺知府四月二十四日到省委

署今職六月初二日到任臣與藩臬兩司察看該

員廉靜精細樸實耐勞署任已逾半年所有讞獄

河防一切事宜措理裕如以之請補開封府知府

實堪勝任惟調缺請補與例稍有未符第人地實

在相需例得專摺奏請茲據布政使劉齊銜按察

使紹誠會詳前來理合循例專摺奏懇

天恩俯念員缺緊要准以開封府遺缺知府英瑞補授  
開封府知府實於省會要缺有裨如蒙

俞允該員係奉

旨簡放開封府遺缺知府毋庸送部引  
見亦毋庸查開叅罰爲此恭摺具

奏伏乞

皇上聖鑒訓示謹

奏

同治十二年二月二十三日

省會知縣請以杞縣知縣查以謙調補摺

奏爲省會首邑要缺知縣需員循例揀選調補以資  
治理恭摺仰祈

聖鑒事竊照祥符縣知縣劉觀光升署黃沁同知奉部  
覆准坐四月十三日按照限減半計算應扣至同  
治十一年四月二十七日爲開缺日期曾經截缺  
造報在案查定例內載嗣後省會首邑要缺令該  
督撫於本省現任人員內揀選調補等語祥符縣  
係省會首邑衝繁難兼三要缺政務殷繁時有緊  
要差委及發審案件且濱臨黃河協防任重非精

明強幹熟諳河務之員不克勝任臣與藩臬兩司於通省應調應補應升正途人員內逐加遴選非本任緊要卽人地未宜惟查有杞縣知縣查以謙現年四十八歲順天宛平縣人由監生報捐州吏目加捐縣丞指省分發河南因在南汝光剿匪出力

賞戴藍翎復因固始解圍出力保奏奉

旨著免補本班以知縣仍留河南歸候補班補用欽此

遵例捐同知銜赴部引

見奉



旨著發往河南以知縣補用欽此旋補臨潁縣知縣因  
守城出力奉

旨著以直隸州用並賞換花翎欽此調補杞縣知縣因  
歷年守城出力奉

旨著俟補直隸州知州後以知府用欽此俸滿引  
見奉

旨著回任以直隸州知州在任候補俟補直隸州後以  
知府用其獲盜之案以直隸州遇缺儘先補用欽  
此十年

大計卓異保薦十一年調署祥符縣知縣六月十一

日到任復查該員幹練有爲材堪肆應現署斯缺已逾半年一切地方河務辦理裕如歷俸已滿三年以之調補祥符縣知縣實堪勝任惟杞縣亦係繁缺以繁調繁與例稍有未符第祥符縣係省會首邑尤爲繁要且人地實在相需例得專摺奏請茲據布政使劉齊銜按察使紹誠會詳前來合無仰懇

天恩俯准以杞縣知縣查以謙調補祥符縣知縣洵於要缺有裨如蒙

俞允該員係現任知縣請調知縣銜缺相當毋庸送部

引

見再該員前由臨潁縣調補杞縣今請調補祥符縣知縣係屬再調其調任內罰俸案件仍照初調之例毋庸核計所有初任臨潁縣任內應完罰俸銀二百七十八兩零已完解司庫另文咨部所遺杞縣知縣員缺豫省現有應補人員俟准咨截缺後再行請補合併聲明謹會同河督臣喬松年合詞恭摺具

奏伏乞

皇上聖鑒訓示謹

奏

同治十二年二月二十三日



考城營守備請以蔡友彬補授摺

奏爲揀員請補守備員缺以實營伍恭摺仰祈

聖鑒事竊照歸德鎮考城營中軍守備閃鳳鳴病故出

缺前經臣恭疏

題報聲明遺缺豫省現有應補之員請扣歸外補在案查定例武職儘先卽補人員遇有題推缺出卽行題補又儘先人員按名次先後挨次補用又各省題調缺出其有員缺緊要人地實在相需所保之員與例稍有未符卽將該員不合例之處詳細

聲明請

旨各等語茲查歸德鎮考城營中軍守備係部推之缺

臣於各標儘先守備中逐加遴選儘先名次在前各員均於此缺人地不甚相宜惟查有儘先守備蔡友彬弓馬優嫻講求營務在歸德鎮標左營供差有年於地方情形亦頗熟悉以之請補斯缺洵堪勝任該員儘先名次稍後與例雖有未符第人地實在相需例得專摺奏請合無仰懇

天恩俯准將儘先守備蔡友彬補授考城營中軍守備實於營伍地方兩有裨益除飭取履歷送部外理合恭摺具

奏伏乞

皇上聖鑒訓示謹

奏

同治十二年二月二十三日





河陝道廣隆暫緩引

見片

再前准吏部咨以河陝汝道廣隆六年俸滿行令給咨赴部引

見如實有承辦要件奏請展限等因當經轉行遵照茲查陝州一帶壤連秦隴爲豫省西路門戶現值狗氛未靖邊防時形喫重且兵差駱驛轉運供支在在均關緊要該道廣隆兩次補授斯缺駐陝有年熟悉所屬地方及籌防情形藉資督率未便遽易生手合無仰懇

天恩俯准河陝汝道廣隆暫緩赴部引

見一俟西防稍鬆卽令請咨北上斷不任稍事稽延理

合附片具

奏伏乞

聖鑒謹

奏

同治十二年二月二十三日

解還神機營墊放善慶軍營餉銀片

再臣於同治十一年八月初二日准神機營咨開以同治七年辦理巡防之時曾經墊放過直隸軍營杭州副都統善慶統帶吉林黑龍江馬隊官兵餉乾銀二萬三千九百七十一兩五錢九分五釐一毫三絲四忽應仍由豫省撥還歸款業經具奏奉

旨知道了欽此等因咨行到臣當經飭司籌撥去後茲據布政使劉齊銜呈稱豫省庫儲匱絀度支浩繁現經竭力騰挪於庫存同治十一年丁地項下設

措銀二萬三千九百七十一兩五錢九分五釐一毫三絲四忽於本月二十七日委員候補知縣溫德懋領解起程前赴神機營衙門交納以濟急需等情具詳請

奏前來臣覆核無異理合附片具陳伏乞

聖鑒謹

奏

同治十二年二月二十八日



解還神機營武成永固礮位片

再臣前准神機營咨

奏請飭查八旗漢軍調出未回礮位抄單咨行等因  
當經臣札飭軍需局司道通飭行查旋據陝州稟  
報存有武成永固礮一尊又嵩武軍提督張曜報  
明曾用武成永固礮一尊寄存汝甯府等情由局  
將陝州所存之礮提至汲縣汝甯所存之礮運解  
來省詳請委解並具

奏前來臣查豫省從前調出礮位現已分別提解至  
省城及汲縣等處除檄委候補副將永奎護解起

程前赴神機營交納外理合附片具

奏伏乞

聖鑒謹

奏

同治十二年三月十六日

兵馬錢糧奏銷仍請展緩摺

奏爲兵馬錢糧奏銷勢難隨同地丁奏銷彙題援案  
奏請展緩恭摺仰祈

聖鑒事竊照豫省兵馬錢糧奏銷向隨地丁造冊具題  
自軍興以來需用浩繁庫款支絀旗綠各營兵餉  
不能應時支發致有積欠查歷辦地丁奏銷時因  
兵馬錢糧未能隨同地丁造報節經

奏准展緩在案茲屆同治十二年奏銷之期據布政使  
劉齊銜詳稱同治六年兵餉前已發清造銷本年  
應將七年兵餉奏銷挨次接辦惟於九年籌發各

營兵餉時因七八兩年均在積欠若僅將舊欠給發則新招兵丁必待數年始能食餉是以先儘九年新餉給發並按季帶發舊欠以卹兵艱由前撫臣咨行各鎮營知照迄今七年以後餉銀仍未支發完竣勢難依限造報擬請將七年至十一年兵馬錢糧奏銷展緩俱俟陸續發清再行挨案造報等情請奏前來臣復查該司所詳委係實在情形除飭將積欠各該年兵餉次第支發清楚卽行挨案造報外所有同治七年至十一年兵馬錢糧奏銷懇請展緩緣由理合恭摺奏陳伏乞



皇上聖鑒訓示謹

奏

同治十二年四月初七日



查明參員劉慶恩並無實蹟惟措置未宜應請交部議處摺

奏爲查明被參之員並無縱盜虐民藉公肥己以及貪污實蹟惟措置究有未宜請

旨交部議處恭摺覆

奏仰祈

聖鑒事竊臣於同治十一年十二月十八日准軍機大臣字寄同治十一年十二月初十日奉

上諭有人奏河南署光州知州劉慶恩縱盜虐民肥己罔上本年光州興隆集搶劫重案該員憚於查拏將

事主掌責勒令改盜爲竊城內凌三義等家被劫至  
今案無弋獲馮姓爭產一案該員勒罰五百金入已  
所收鎮潢橋房租數千金盡飽私囊城內大生錢店  
關閉因受賄將該店主釋放不究反將舖鄰拘責砍  
伐該州試院樹木敗壞文風等語著錢鼎銘按照所  
參各節確切訪查據實叅奏毋得稍涉迴護原片著  
抄給閱看將此諭令知之欽此欽遵在案伏查臣自  
上年四月到任後於所屬各員詳加察核風聞署  
光州知州劉慶恩人地不甚相宜適值准補光州  
直隸州知州姚國慶引



見回豫當卽飭赴新任將劉慶恩撤調回省旋因光州  
在籍知府梁正標以修理貢院房間指修藉罰等  
情稟控劉慶恩復檄南汝光道傅壽彤委員訪察  
正在查辦間欽奉

諭旨遵卽密札行司遴委候補知府厲文煒馳往密查  
去後茲據委員稟覆逐款詳查如原叅搶劫重案  
勒令事主改盜爲竊并城內連劫三家案無弋獲  
一款卷查興隆集民郭在富監生王蘭馨同院生  
理上年九月初一日夜被匪翻牆進院劫去財物  
經劉慶恩詣驗懸賞差緝未及通報卽已交卸移

交後任辦理尚非憚於查拏亦無責逼改盜爲竊情弊凌三義與長春樓張德源三家合夥公開錢舖被劫并無連劫三家之事業經劉慶恩任內先後獲犯何三槐陳和尚何宗發楊進忠樊學禮五名起獲多贓犯供確鑿可據又如所奏錢店關閉應將店主拏究乃反拘傳左右舖鄰苦累商民一款訪查該州大生錢店因虧欠票本店主陳姓及店夥先後逃匿劉慶恩查知金德豐與陳大生係屬戚誼因根究該店東夥下落曾經傳案復因秦義順擅將大生錢店招牌摘去趙恆盛與大生號

一門出入均應傳訊并非任意誅求所稱賄釋陳大生委無其事又如所奏馮姓爭產之案藉修學宮勒罰五百金入已州治鎮潢橋上建房貿易每年收租以備歲修積有數千金盡數提飽私囊一款卷查監生馮有俊承買孀婦聞周氏田產因爭執護坟田地涉訟經劉慶恩傳諭兩造定期勘驗尚未集訊以馮有俊呈出契約與墨約不符飭令看管立限換約重稅馮有俊之子馮鎡因父被看管邀集親友稱貸銀錢投稅致招物議實無藉修學宮勒罰五百金入已之事州治鎮潢橋兩旁搭



有棚座民間租賃貿易檢查租簿每月逐戶繳租  
二三百七八百文不等終歲所收一百數十千上  
下隨時修補橋工尚不敷用并未積有數千金則  
提歸私囊之說自係訛傳又如所奏將試院大樹  
多株概行砍伐敗壞文風一款查該州試院房屋  
歲久滲漏劉慶恩擬加修葺以無經費曾伐樹兩  
株爲修造之用所伐係回乾之樹雖於文風尚無  
關礙究屬非是等情由司具稟前來臣以原叅各  
款斷非無因恐該委員所稟尚有不實不盡復督  
同兩司逐一訪查劉慶恩於署光州任內實無貪



汚劣蹟惟於馮姓涉訟正案尚未定斷輒將馮有  
俊看管立限換約重稅以致疑謗叢生且修理試  
院所需料物自應另行購備乃不謀於眾率將公  
所樹株砍伐辦理亦有不合未便因被叅各款均  
無實據稍事姑容相應請

旨將前署光州候補直隸州知州劉慶恩交部議處以  
示薄懲出自

宸斷所有查明被叅緣由理合據實覆陳伏乞

皇上聖鑒訓示謹

奏

同治十二年四月初七日

孝女汪陸氏剜臂療親懇請

旌表摺

奏為孝女剜臂療親懇請

旌表恭摺奏祈

聖鑒事竊維

聖朝孝治天下教始閨門臣籍隸江蘇太倉州與州屬

之鎮洋縣同城稔知鎮洋縣孝女汪陸氏係已故  
候選布政司經歷陸衡燮之女鎮洋縣學附生汪  
承禧之室至性純摯孝事父母咸豐五年父病危  
篤孝女焚香祈禱願以身代其後病益增劇諸醫

束手孝女竊剜臂肉和藥以進父病得瘳久之婢  
媪輩窺見創痕根詢始悉聞者莫不歎異嗣歸汪  
氏相夫持家克盡婦道迨咸豐十年以父故哀毀  
羸疾經年而卒時二十九歲臣前在籍時事親  
見不忍聽其湮沒伏查近年以來以孝女剗股療  
親奏請旌表均蒙

恩旨俞允具有成案茲汪陸氏在室因父病剗臂醫療  
出自純孝性成毫無矯飾合無仰懇

天恩准予旌表以彰孝行除冊結由本籍督撫送部查  
核外謹恭摺陳請伏乞



皇上聖鑒訓示謹

奏

同治十二年四月初七日



籌撥烏魯木齊景廉軍營協餉片

再豫省遵

旨籌撥烏魯木齊都統景廉軍營協餉前經兩次撥解  
過銀三萬五千兩均經

奏明在案茲據該營委員把總林祥呈驗委札催領  
餉銀並請於協餉內撥發製造帳房銀三千兩當  
卽飭司趕籌撥解據布政使劉齊銜呈稱現於同  
治十二年丁地項下籌動銀一萬兩以三千兩先  
行發給該委員製造應用其餘七千兩亦於三月  
二十三日由該委員林祥領解起程前赴察哈爾

都統衙門交收轉解以濟要需等因具詳請  
奏前來臣復查無異理合附片具陳伏乞

聖鑒謹

奏

同治十二年四月初七日



籌撥西甯豫師軍營協餉片

再豫省遵撥西甯辦事大臣豫師軍營協餉前已  
先後撥解及抵兌共銀十萬一百七十兩經臣疊  
次

奏明在案茲復由臣飭司於同治十二年丁地項下  
籌動銀一萬兩於三月十九日發交委員候補知  
縣車模領解起程前赴陝西省城西甯轉運局交  
收轉解以濟要需據布政使劉齊銜具詳請  
奏前來所有撥解西甯專餉數目日期理合附片具

陳伏乞

聖鑒謹

奏

同治十二年四月初七日

豫省規畫練軍陳報大概情形摺

奏爲豫省規畫練軍現辦大概情形恭摺奏祈

聖鑒事竊臣前在直隸曾隨督臣籌辦練軍事務深知

練軍有效一切章程均經原任督臣曾國藩

奏奉遵行在案臣自上年蒙

恩簡授河南巡撫

陛見時渥荷

訓諭周詳特以練軍河工爲首務跪聆之下欽悚莫名

臣到任以後適值皖豫匪徒李四輩仔李六等糾眾滋事雖經卽時撲滅而遺孽尚多復經督飭營

縣將著名匪犯先後拏獲究懲閭閻藉資安輯伏思豫省軍務肅清以來西路防兵未撤邊隅伏莽未淨武備不可一日稍弛而練勇旣滋繁費且聚散靡常難以經久惟有就本省額兵抽調訓練分駐巡哨庶足有備無患因仿照直隸章程斟酌辦理查河南額設三鎮馬步兵數共一萬三千零九十七名緣營舊制平日各按營地分塘坐汛散處四方徵調旣未能應時兵將又各不相習勢隔情疏臨事難期得力茲於每鎮抽練步兵一營馬兵一營三鎮共馬步六營每營步兵五百名馬兵二



百五十名挑選精壯兵丁臆健馬匹各擇衝要適中之地挖濠築牆逐日訓練使知坐作出入進退之節火器刀矛講求精熟申嚴儆備如臨大敵以聯其渙散之心而作其果毅之氣營哨各官務取樸誠勇敢之士本營責任乏人則兼用候補候補乏人則調用外省一應軍營積習盡行革除嚴爲禁止給予乾糧明定賞罰迨至訓練數月號令旣行於所管境內向有不靖地方更番出巡按古人行則爲陣止則爲營遺意往來道路以習勞苦以壯聲威當經議定創行自本年正月爲始所有河

北鎮馬步練營卽派總兵崔廷桂總理其南陽歸德二鎮界連皖楚營務較煩是以南陽鎮練軍步隊派總兵趙鴻舉管理馬隊另派副將尹嘉賓教練歸德鎮馬步各營派候補總兵楊鴻禮管理以專責成經臣於三月間檄調來省率同司道逐細校閱兵馬均各壯健技藝亦尚嫻熟且近日巡哨處所破獲積年匪盜各案甚多該將弁等亦知質實從事果能歷久不懈實於營務地方均有裨益臣仍不時查察指麾訓誡務期有勇知方以仰副聖主綏宇整戎之至意惟事屬創始現行章程雖俱仿

照直省而營制口糧不無稍有變通之處俟一切  
釐定有緒再行分別奏咨外所有現辦練軍緣由  
理合繕摺具陳伏乞

皇上聖鑒訓示謹

奏

同治十二年四月二十二日





報解黑龍江官兵資裝銀數摺

奏爲報解黑龍江官兵資裝銀數日期恭摺仰祈

聖鑒事竊照同治十一年六月奉

上諭戶部議奏本年黑龍江圍獵官兵應需資裝銀一萬四千八百七十兩於河南地丁項下撥給著飭照款迅速籌撥解赴盛京戶部交納等因欽此行司遵照在案茲據布政使劉齊銜詳稱遵於地丁項下籌措前項資裝銀一萬四千八百七十兩定於同治十二年四月二十二日委員管解起程前赴盛京戶部交納等情請

奏前來除給咨牌飭領起解外所有奉撥黑龍江官  
兵資裝銀兩照款籌撥起解銀數日期理合恭摺  
具

奏伏乞

皇上聖鑒謹

奏

同治十二年四月二十二日

籌解庫倫軍餉摺

奏爲遵撥庫倫軍餉起解數目日期恭摺奏祈

聖鑒事竊照同治十一年九月初五日准戶部咨議覆  
庫倫辦事大臣張廷岳等奏續酌撥防兵餉需於  
同治十一年八月二十日具奏奉

旨依議欽此單開河南省本年地丁項下提撥銀三萬  
兩作爲庫倫軍餉卽飭趕緊籌撥照數解交察哈  
爾都統查收轉解等因到臣遵卽行司籌撥去後  
當經司庫艱窘異常各路餉需緊要勢難兼顧茲  
屆上忙之期卽在地丁項下先行湊集銀一萬五

千兩已於同治十二年四月十七日委員管解起程前赴察哈爾都統衙門交收轉解以濟要需據布政使劉齊銜具詳請

奏前來除下餘銀一萬五千兩由臣飭令趕籌續解外所有遵撥庫倫軍餉起解數目日期緣由理合繕摺具陳伏乞

皇上聖鑒謹

奏

同治十二年四月二十二日



籌解張曜軍營駝隻銀兩摺

奏爲遵撥張曜軍營購買駝隻銀兩起解數目日期  
恭摺仰祈

聖鑒事竊臣於同治十二年四月二十日承准軍機大臣字寄同治十二年四月十七日奉

上諭現在張曜統軍西進需駝甚亟著錢鼎銘將前次派撥銀三萬兩趕緊如數措解以應急需等因欽此  
欽遵在案伏查臣前奉

諭旨籌解張曜軍營購買駝隻銀兩當經欽遵飭解並疊催去後據布政使劉齊銜呈稱於本月二十二

日隨同張曜軍營月餉搭解起程等情具詳請  
奏前來正在辦理起解欽奉

諭旨等因查此項銀兩業已如數措齊定期搭解其以  
仰慰

宸廑除分咨外理合繕摺覆陳伏乞

皇上聖鑒訓示謹

奏

同治十二年四月二十二日

籌撥巴哈科布多餉銀片

再豫省奉撥巴哈兩城軍餉銀十萬兩前已委員解過銀一萬兩下餘未解銀九萬兩本應照數撥解惟因司庫匱窘異常錢糧入不敷出顧此失彼實屬措置爲難第巴哈兩城軍餉緊要不得不竭力籌解現由臣飭司籌措得庫存同治十二年丁地銀一萬兩已於四月十六日發交委員候補知縣張懷仁領解起程前赴察哈爾都統衙門交納分別轉發領解應用以濟急需又奉撥接濟科布多經費銀五萬兩亦在十二年丁地項下先行湊

集銀五千兩於本月十七日委員解赴察哈爾都  
統衙門交納併據布政使劉齊銜詳請具

奏前來除下餘銀兩飭各趕籌續解外理合附片陳  
明伏乞

聖鑒謹

奏

同治十二年四月二十二日



撥解吉林冬圍經費片

再同治十一年九月接准部咨奉撥吉林本年冬圍經費銀一萬四千兩在於河南驛站存贖項下撥給行令委解

盛京戶部交納等因當經轉行遵照茲據藩臬兩司卽在驛站存贖項下籌措前項經費銀一萬四千兩定於同治十二年四月二十二日委員管解起程前赴

盛京戶部交納等情詳請具

奏前來除給咨牌飭領起解外所有起解吉林冬圍

經費銀數日期謹附片奏陳伏乞

聖鑒謹

奏

同治十二年四月二十二日

續解

盛京

鳳凰樓木植運腳銀兩片

再前准部咨奉撥河南地丁銀二萬兩恭備

盛京

鳳凰樓金柱木植運腳應用行令解赴

盛京戶部交納等因遵於上年十一月間先行籌銀

五千兩委解部庫經

臣附片

奏報在案茲據布政使劉齊銜續籌地丁銀一萬五千兩定於同治十二年四月二十二日委員管解

起程前赴

盛京戶部交納等情具詳請

奏前來除給咨牌飭領起解外所有奉撥木植運腳  
銀兩續籌起解數目日期並如數完解緣由理合  
附片具

奏伏乞

聖鑒謹

奏

同治十二年四月二十二日



請以開封府鹽捕同知陳希謙調補浙川廳同知  
摺

奏爲要缺同知揀員調補以資治理恭摺仰祈

聖鑒事竊照浙川廳撫民同知高偓前與開封府鹽捕  
同知陳希謙互相調署於同治十一年十二月十  
三日高偓在署任內病故應以病故本日爲浙川  
廳開缺日期業經截缺造報在案查例載道府同  
知直隸州知州通判知州如係奉

旨命往或督撫題明留於該省候補並拏獲盜犯等項  
引

見發往原省以何項補用並著有勞績保奏奉

旨先儘補用遇缺卽補者均無論應題應調應選之缺  
令該督撫酌量才具擇其人地相宜者悉准酌量  
先儘補用各等語茲查浙川廳界連陝楚幅員遼  
闊環境皆山匪徒最易藏匿且兼管南陽府屬水  
利鹽捕事務爲繁難兼二要缺例應在外揀選題  
補必須精明強幹緝捕勤能之員方克勝任臣與  
藩臬兩司於應補應升人員內逐加遴選非本任  
緊要卽人地未宜惟查有開封府鹽捕同知陳希  
謙現年五十一歲順天宛平縣舉人揀選知縣由

中書科中書遵例捐指河南以同知歸候補班補用咸豐十一年到省曾經代理鄭州並署開封府鹽捕同知印務因張逆全股蕩平出力保奏奉旨俟補缺後以知府用先換頂戴並賞戴花翎欽此題補開封府鹽捕同知奉文准補任事同治十一年委署河南府知府八月調署浙川廳撫民同知於十月二十日到任該員才具諳練辦事實心現署斯缺已逾五月整頓緝捕及地方一切公事措置裕如以之調補浙川廳撫民同知實堪勝任其歷俸未滿三年已赴京銅局遵例捐免惟開封府鹽



捕同知亦係繁缺以繁調繁與例稍有未符第人地實在相需例得專摺奏請據藩臬兩司會詳前來相應仰懇

天恩俯准以開封府鹽捕同知陳希謙調補浙川廳撫民同知實於要缺有裨如蒙

俞允該員係現任同知請補同知銜缺相當毋庸送部引

見再該員係屬初調任內一切因公處分例免核計所遺開封府鹽捕同知要缺豫省現有應補人員俟准咨截缺後再行請補合併陳明爲此恭摺具



奏伏乞

皇上聖鑒訓示謹

奏

同治十二年五月初九日

金海月三考卷三

四

籌撥伊犁科布多餉銀片

再同治十二年四月二十七日准署伊犁將軍榮  
全咨以現奉

諭旨招集民團收復伊犁需餉甚殷並委員迎催等因  
當卽行司籌解去後茲經布政使劉齊銜在同治  
十一年丁地項下動撥銀一萬兩於本年五月二  
十七日委員領解前赴察哈爾都統衙門交納轉  
解又豫省奉撥科布多經費銀兩除先已解過五  
千兩外茲復續措銀五千兩亦於本年五月二十  
七日委解起程由司詳請具

奏前來 臣覆核無異理合附片陳明伏乞

聖鑒謹

奏

同治十二年五月二十九日



籌撥烏魯木齊景廉軍營餉銀及巴里坤脩房專

款片

再豫省奉撥烏魯木齊都統景廉軍營採買駝隻  
籌撥軍裝等項銀兩前已三次撥解過共銀四萬  
五千兩疊經

奏明在案茲復由臣飭司在於同治十二年丁地項  
下籌動銀一萬兩於本年五月二十七日委候補  
知縣常國棟領解前赴察哈爾都統衙門交納轉  
解應用又前准部咨奉

旨提撥巴里坤修房專款銀二千兩亦於本年五月二

十七日委員起解一併赴察哈爾都統衙門交納  
以濟要需據藩司劉齊銜請

奏前來理合附片具陳伏乞

聖鑒謹

奏

同治十二年五月二十九日

南陽左營暨確山考城營守備各缺仍請以王箱  
張徵蔡友彬補授摺

奏爲南陽鎮標左營確山營考城營守備各員缺仍  
懇以儘先守備王箱張徵蔡友彬補授以重地方  
而裨營伍恭摺仰祈

聖鑒事竊查南陽鎮標左營守備確山營守備考城營  
中軍守備各員缺前經臣以儘先守備王箱張徵  
蔡友彬先後請補嗣准兵部咨覆王箱等保舉儘  
先名次在後其名次在前之員於各缺何項不宜  
並未聲敘礙難覈准行令查明等因於同治十二

年四月二十日具

奏奉

旨依議欽此知照到 臣伏查南陽鎮標左營確山營考  
城營守備各缺於所屬汎地緝捕操防最關緊要  
必得精明幹練熟悉地方情形之員方資整頓現  
值練軍初立與底營員弁時有交涉事件營務更  
加繁重 臣於儘先守備中逐加遴選名次在前各  
員於此三缺不宜之處均因營務地方情形尚欠  
熟諳是以未敢遷就貽誤惟查有儘先守備王箱  
年壯技嫻諳習營務儘先守備張徵年力正強差



操勤練儘先守備蔡友彬弓馬優嫻講求營務以  
之請補南陽鎮標左營確山營考城營守備各缺  
均堪勝任且於練軍事宜尤能認真講求互相整  
飭委係人地實在相宜之員雖儘先名次在後例  
得聲明請補以重地方臣爲因地擇人起見合無  
仰懇

天恩俯准仍以儘先守備王箱補授南陽鎮標左營守  
備儘先守備張徵補授確山營守備儘先守備蔡  
友彬補授考城營中軍守備實於地方營務兩有  
裨益理合恭摺具

奏伏乞

皇上聖鑒訓示謹

奏

同治十二年六月十三日

請以守備張湘補授撫標右營守備摺

奏爲揀員請補守備員缺恭摺仰祈

聖鑒事竊照 臣標右營守備陳楚書病故出缺經 臣恭

疏

題報聲明遺缺豫省現有應補之員請扣歸外補在案查定例武職儘先卽補人員遇有題推缺出卽行題補又儘先人員按名次先後挨次補用又各省題調缺出其有員缺緊要人地實在相需所保之員與例稍有未符卽將該員不合例之處詳細聲明請

旨各等語茲查臣標右營守備係屬推缺臣於各標儘先守備中逐加遴選名次在前各員均於此缺人地不宜惟查有歸德鎮右營千總儘先守備張湘營務熟諳緝捕得力以之請補斯缺洵堪勝任該員儘先名次在後與例雖有未符第人地實在相需例得專摺奏請合無仰懇

天恩俯准儘先守備張湘補授臣標右營守備實於營伍地方兩有裨益除所遺弁缺容臣揀補外理合恭摺具陳伏乞

皇上聖鑒訓示謹



奏

同治十二年六月十三日

金瓶梅詞話卷三

四

豫省軍需用款請分起報銷摺

奏爲豫省軍需用款擬請分起報銷以免積壓而昭  
慎重恭摺奏祈

聖鑒事竊照河南軍需用款自同治三年七月初一日  
起至十一年三月底止所有動用銀一千二百餘  
萬兩經升任撫臣李鶴年

奏明分起造報奉

旨遵行在案查此項報銷業已一律完竣其自十一年  
四月以後用款應歸臣任接算次第報銷從前軍  
務頻煩辦理不無棘手積年累月款目紛歧是以

未能隨用隨報茲豫省雖已肅清而嵩毅兩軍進  
剿涼肅西路防軍未撤加以本省練兵所需籌餉  
仍無虛日所有軍需造報若不隨時清釐恐日久  
又多積壓因與該管司道等再三核議現擬以六  
個月爲一案每一年分辦兩案以免遲延轉轉據  
該管司道詳請具

奏前來臣查軍需用款浩繁分起造報既可清釐款  
目亦足以昭慎重相應援案奏請自十一年四月  
初一日起以六個月爲一案陸續咨部核銷祇候  
諭旨遵行謹繕摺具陳伏乞



皇上聖鑒訓示謹

奏

同治十二年六月十三日



續解西甯豫師軍營專餉片

再豫省奉撥西甯辦事大臣豫師軍營專餉計先後撥解及抵兌共解過銀十一萬一百七十兩均經節次

奏明在案茲復由臣飭司在於同治十二年丁地項下籌動銀一萬兩於六月初三日發交委員候補知縣杜玉領解起程前赴陝西省城西甯轉運局交收轉解應用以濟急需據藩司劉齊銜具詳請奏前來臣覆核無異理合附片具陳伏乞

聖鑒謹

奏

同治十二年六月十三日



撥解

普祥峪

普陀峪萬年吉地工餉摺

奏爲起解工餉銀兩數目日期恭摺仰祈

聖鑒事竊照同治十二年六月十四日接准戶部咨恭  
修

普祥峪

普陀峪萬年吉地工程用款鉅繁所有各項物料須先期  
購辦以備開工奏撥河南省地丁銀五萬兩行令  
飭司遵照指撥銀款限九月內委解工程處交納

嗣准王大臣咨行選擇吉期於七月二十九日動  
土部撥銀兩務於動土前期解工庶不致有誤開  
放各等因遵經先後轉行在案茲據布政使劉齊  
銜詳稱卽在地丁項下籌備銀五萬兩定於閏六  
月二十四日委員管解起程前赴工程處交納等  
情呈請具

奏前來除繕給咨牌飭領起解外所有起解奉撥工  
餉銀數日期理合恭摺具

奏伏乞

皇上聖鑒謹

奏

同治十二年閏六月十七日





新選商城縣知縣曹賢書請留省察看摺

奏爲新選知縣於地方情形未能熟悉應請留省察看俾資習練恭摺具陳仰祈

聖鑒事竊照新選商城縣知縣曹賢書現年六十一歲係山東安邱縣人由增生中式道光己亥科本省鄉試舉人咸豐癸丑科大挑二等以教職用選授曹州府鉅野縣訓導五年四月到任丁憂服滿同治十年辛未科會試後截取知縣籤選今職由部驗看於十二年三月引

見奉

旨河南商城縣員缺著曹賢書補授欽此是月二十日  
領憑四月二十三日繳憑到省接見數次該員人  
尚樸誠惟查商城雖屬中缺而地處邊防界連皖  
楚匪徒出沒無時巡緝撫綏最關緊要該員初膺  
民社於地方情形未能熟習遽令前往恐滋貽誤  
自應留省察看俾資學習如果於地方利病認真  
講求可期人地相宜再行飭赴新任倘竟難以勝  
任卽行據實甄別以昭慎重據藩臬兩司會詳請  
奏前來臣覆查無異相應請

旨將新選商城縣知縣曹賢書先行留省察看如果才

不稱職另行核辦除批飭遵照並檄令該員前赴  
開封府讞局隨同習練外理合恭摺具陳伏乞  
皇上聖鑒訓示謹

奏

同治十二年閏六月二十四日





籌撥新疆協餉並瀝陳豫省支絀情形摺

奏爲籌撥新疆協餉並瀝陳豫省支絀情形恭摺具  
奏仰祈

聖鑒事竊臣接准部咨行令豫省將積欠新疆協餉按月提撥銀二萬兩解交烏魯木齊都統景廉軍營應用並准景廉咨照派委都司楊朝瑜來豫迎提臣當經飭司籌解據布政使劉齊銜詳稱豫省自同治五年奉撥新疆協餉以來歷年共解過銀十四萬八千兩實緣軍興以來司庫悉索已空以致欠餉積成鉅萬目前雖已肅清而援甘助剿之兵

加以京協各餉遞增之款本省河工要需又旗綠各營及一切雜支急款計本年出項已逾四百七十萬兩司庫全年所入除丁地襍稅二百一十餘萬兩外更無來源入不敷出岌岌可危此次奉撥餉銀雖在積欠項下提解然積欠之故原因歷年庫款支絀所致今進款毫無增益而撥款歷年遞加庫儲益形匱乏積欠無從解還惟值邊疆待用孔殷不敢不竭力籌濟茲在同治十二年丁地項下動銀二萬五千兩於本年閏六月二十六日發交催餉都司楊朝瑜領解前赴察哈爾都統衙門

交納轉解等情呈請具

奏前來 臣查司庫萬分支絀情形前經疊次縷陳何敢復瀆惟豫中祇此餉源實在不敷周轉能否按月定期實無把握祇有竭盡心力視庫款稍可騰挪卽當飭司陸續報解斷不敢稍存膜視自取愆尤所有籌撥新疆協餉及豫省支絀緣由理合恭摺具陳伏乞

皇上聖鑒謹

奏

同治十二年閏六月二十四日





已革副將冒充營員需索車馬審明定擬摺

奏爲已革副將冒充營員需索車馬審明定擬恭摺

仰祈

聖鑒事竊臣前以豫境當西陲孔道凡遇軍營來往員弁如無統兵大臣執照公文者不准應付車馬通飭遵辦在案據滎陽縣知縣王錫楷以盤獲假充差官索詐車馬之已革副將胥榮富訊供稟解到省臣飭發按察使紹誠督同開封府知府英瑞祥符縣知縣查以謙審訊擬議緣胥榮富籍隸湖南湘陰縣投效浙江四川陝西山西各軍營歷保副

將因在河津防次擅發傳牌僭稱總兵經山西前  
撫臣何璟叅革發臨汾縣看管聽候遞籍乘隙脫  
逃由陝西走至滎陽縣地方盤費用罄途遇告假  
回籍勇丁胥松林使當前站跟役起意冒充陝甘  
軍營差官假稱副將奉委公幹戴用舊存紅頂花  
翎前往縣署索要坐車二輛騎馬一匹聲言如不  
應付定行不依該縣因其並無委札執照且語多  
夸詐形跡可疑詰以姓名官階核與前奉通緝山  
西脫逃犯官相符當經研訊亦卽承認不諱隨丁  
胥松林差拘逃逸審無僞造憑札有所求爲沿途

經過地方亦無滋擾及另犯不法情事查例載無  
官詐稱有官並未造有憑劄但係圖騙一人圖行  
一事犯該徒罪以下者發近邊充軍等語此案已  
革副將胥榮富前在山西叅革押候遞籍乘間脫  
逃復敢在滎陽縣假充差官索詐車馬實屬怙惡  
不悛自應按律問擬除在押脫逃輕罪不議外合  
依無官詐稱有官並未造有憑劄但係圖騙一人  
圖行一事犯該徒罪以下者發近邊充軍例擬發  
近邊充軍係革弁應從重發往黑龍江當差在逃  
勇丁胥松林飭獲另結臨汾縣看役人等並無賄



縱情弊應毋庸議據按察使紹誠等訊明擬議解  
審前來臣親加研鞫供詞無異自應按律問擬除  
供招咨部外謹恭摺具

奏伏乞

皇上聖鑒訓示遵行謹

奏

同治十二年閏六月二十四日



豫省練軍會同地方文武員弁搜捕南山匪徒趙  
殿盈等訊明正法並請酌保數員摺

奏爲豫省練軍會同地方文武搜捕南山匪徒擒獲  
多名訊明正法以遏亂萌而靖地方恭摺仰祈

聖鑒事竊查南陽之裕州葉縣舞陽汝甯之西平遂平  
等處境內山勢曲折路徑叢襍均與泌陽角子山  
相連綿亘數百里其間深箐密岫最易藏奸經臣  
疊飭該管道府檄行所屬隨時偵緝並照會南陽  
鎮臣趙鴻舉酌度要隘分布練軍嚴密巡哨在案  
本年五月間據報裕州之小頂山葉縣之圪墻店

探有匪徒蠢動該牧令會同鎮標弁兵馳往查拏該匪聞風逃匿正在巡緝間復據探稱裕州之牛心山攬狼寺有竄匪百餘人乘夜放火裝旗派飯勢將盤踞署知州王蓮塘署葉縣知縣張佩訓督帶役勇團丁會同營汛馳往其時南陽鎮臣趙鴻舉亦親督練軍中哨遊擊郭廣泰並函會管帶練軍馬隊提督尹家賓由襄城撥隊前進臣復添派副將裴政率騎兵協助面面兜捕疊據擒獲二十餘人匪黨四散竄匿分路入山搜拏六月初四五等日該匪等以躡緝嚴密復拚死糾黨由西遂毗

連處所出山滋擾初六夜間西平之魁拉莊有匪徒數十人進寨燒搶郭廣泰會同西平縣知縣杜傑魁及遂平舞陽兩縣兵役整隊前往率領該寨鄉團跟蹤截擊追至袁莊地方與匪相遇格殺數名擒獲十餘人並施放鎗礮轟傷匪首韓潰昌卽韓幘倉逃至遂平縣境韓莊被獲因傷重旋卽斃命餘匪零星奔逸尹家賓踵至會合搜捕續經盤獲多名統計先後擒拏匪犯除高明遠許成等登時格殺李寬訊明後病斃外其趙殿盈卽趙寅史收卽石收何結地王中張海陳瀾岐李廢物李結



意李熬新任西魁董榮王見本張四楊法青卽楊  
黑任傑張匱任戲成卽任錫奎趙林卽趙六李狗  
惡卽李慶滌李欣許沅卽許小沅等二十一名均  
由各該地方官訊係甘心結捻糾黨滋事並經供  
認平日疊犯劫竊重案皆屬罪大惡極經臣分別  
檄飭南陽府知府任愷汝甯府知府溥泰覆審明  
確行令就地正法梟示吳祿等八名訊係良民被  
脅經各該州縣立予保釋何平倉等十八名甫經  
各該州縣會營稟獲應俟訊報到日另行核辦現  
在山內已無匪蹤人心均各安定臣仍照會鎮臣



酌帶練軍兵弁並嚴飭各該地方文武購覓眼線  
偵緝餘黨務期盡絕根株以仰副

聖主綏輯疆圉之至意至此出力員弁可否容臣酌  
保數員爲緝捕勤能者勸出自

逾格鴻施所有辦理南山匪徒各緣由謹繕摺具陳伏  
乞

皇上聖鑒訓示謹

奏

同治十二年七月初六日



叅劾庸劣不職候補知縣王元緒等分別革職改

教摺

奏爲叅劾庸劣不職之員請分別革職改教以儆官  
邪而飭吏治恭摺具陳仰祈

聖鑒事竊以爲政之道首在舉劾豫省自軍務肅清以  
後元氣未復民生之休戚視乎牧令之賢否卽教  
佐等官亦不可不慎加選擇臣到任以來每接見  
現任候補各員必切實告誡勸以砥礪廉隅勤求  
民瘼至今一載有餘細心訪察其中奉公守法者  
固不乏人乃狃於積習罔知自愛者一任三令五

申竟難冀其悛改若不嚴行叅劾無以整飭官常  
查有候補知縣王元緒嗜利妄爲敗壞官方候補  
直隸州知州沈鳳儀心術曖昧人品卑污太康縣  
典史金元棻舉止乖張扶溝縣典史劉慶元玩視  
捕務永甯縣訓導楊肇宜遇事招搖遂平縣教諭  
暴駿圖行爲乖謬以上六員應請革職其已經撤  
任之林縣知縣李樹楨一員精力就衰難膺民社  
惟係正途出身文理尚優應請以教職歸部銓選  
據藩臬兩司出具考語會詳前來謹據實叅奏庶  
懲一儆百不敢相率效尤爭自濯磨俾吏治日有



起色是否有當伏乞

皇上聖鑒訓示謹

奏

同治十二年七月初六日



籌款挑濬賈魯河工竣舟楫通行摺

奏爲豫省賈魯河沙淤年久失修謹籌款挑濬現已  
工竣舟楫通行恭摺仰祈

聖鑒事竊地方河道爲農田商舶之所利賴歲時疏濬  
實爲政之先務豫省賈魯一河發源於滎陽密縣  
之間合京索須鄭諸小水而爲河來源本不甚旺  
每逢四五月間輒至淺澀自道光二十三年牟工  
決口黃河之水灌入全河其沙淤填塞最多之處  
地名十八里橋凡上下十有八里每年惟七八九  
月雨水最大之時可以通舟然非經旬累日不能

磨淺而過道光二十五年曾經請帑大挑費至五十六萬兩後又兩次重挑各費十餘萬兩其上游由中牟至省南朱仙鎮之六十里幸已疏通而十八里上下之浮沙旋挖旋長已成復圯竟無一勞永逸之法前此猶有歲脩之款每年八千餘串稍資疏浚軍興以來帑項愈艱失脩已久臣到任以後設立水利總局檄飭各州縣興脩水利屢經委員前往賈魯河確實查勘博采眾論大約賈魯一河所以號稱難治者在此十八里之古淺而此十八里之所以爲古淺者一由於流沙充滿挑之不



能盡出卽出亦將復返一由於此十八里較下游地勢高低懸絕水易瀉而難蓄一由於自省以南六十里之蘇橋至尉氏縣白潭以北之紅石橋上下七十餘里民田坡水皆向南行從不匯入河中水勢有消而無長有此三弊是以雖當水大之時上下游皆漲而此十八里中時時淺阻臣與水利局司道熟商竊以爲三弊之中沙壅尤甚欲求補救之法莫若兩岸改用極坦之坡迤邐而下自不致旋挑旋圯兩岸舊有大隄遺址若將挑出之沙遠徙於大隄之外再行補築土垣栽植柳樹自可

金華書局影印  
御沙不致慮其復返此所以治十八里古淺之情  
形也此外朱仙鎮以上舊隄殘缺水易旁洩應一  
律補築高厚十八里橋以下由景北岡至白潭北  
之紅石橋沙雖較少河亦淺狹應一律加挑通計  
築隄濬河及撈淺之段首尾凡一百八里嚴飭承  
辦各員務使工歸實濟不得稍有糜費節之又節  
共估銀四萬九千三百三十三兩不及道光二十  
五年大挑所費十分之一於正月二十六日開工  
五月二十日工竣臣於二十二日親往閱視隄厚  
河深垣坡如式所有十八里之沙皆已遠徙隄外

測量誌椿凡多沙之處皆已比去冬水面挑深六尺無墊崖肚腮諸弊六月以後開壩放水商船湊輻南至周家口北至朱仙鎮又西北至鄭州之京水寨一律通行往來無阻惟全河受病太深來源又極微弱雖此次辦理尚無貽誤仍不敢不求善後之方一面督飭該管司道隨時察看如有隄壞水淺之處籌款歲修並於十八里橋兩岸審察地勢另開支河一二道引陂水入河以補水力之不足務使上游州縣無水澇之災下游商船有通行之益用以仰副我

金匱要略卷之四十四  
八

皇上軫念民依利農惠商之至意再此項銀兩係由釐捐項下覈實動用可否免其造冊報銷出自鴻慈逾格所有挑濬賈魯河工竣水道通暢商船湊集緣由恭摺具

奏伏乞

皇上聖鑒訓示遵行謹

奏

同治十二年七月十一日



賈魯河上游一律通暢片

再賈魯河上游自滎澤鄭州交界之葛寨起至中牟境內畢橋止共長八十餘里前因滎工漫水淤塞積沙高下不等經升任撫臣李鶴年檄委臬司紹誠親往查勘該司悉心籌議因舊河勢頗紆曲察度地形逢灣取直以期暢達挑挖新舊河身統以面寬四丈底闊二丈深一丈餘爲率責成紳士借資民力僅與幫貼飯食銀一萬兩升任撫臣飭於釐稅項下動撥興工工竣後委驗如式未及具奏移交到臣此次疏濬賈魯全河查明上游一律通

金匱要略卷之二十三 正名  
暢辦理著有成效理合附片具陳並請免造冊報  
銷伏乞

聖鑒訓示謹

奏

同治十二年七月十一日

豫省各屬水利通飭籌辦擇要脩濬摺

奏爲豫省各屬水利通飭籌辦擇要脩濬恭摺具陳

仰祈

聖鑒事竊以豫省用兵年久水利未暇講求而各屬地勢高下不一旱則無灌輸之源潦又乏宣洩之路河渠溝洫之通塞關繫於民生者匪輕臣到任以後設立水利總局疊經剴切檄飭勸辦在案茲查淇縣之勺金河自縣城西北太和泉發源南流入衛長四千餘丈由臣委候補知州李樹基會同該縣知縣陳士杰督率挑挖一律深通固始縣之清

河自縣東馬鞍山發源直達華家岡百有餘里其  
間支溝三百餘道灌田四萬餘畝署知縣胡慶騮  
管河縣丞張金鎔能任勞怨亦皆疏濬暢利中牟  
縣之丈八溝自新鄭出佛潭發源入該縣境歸賈  
魯河長一萬二千餘丈知縣黃鼎鎮勸派夫役兩  
旁築隄寬深如式孟縣之餘濟河南北兩渠長三  
十餘里知縣姚詩雅分段開挖並會同濟源縣知  
縣趙集成挑濬濟境薛家河建置閘壩迅速蒧事  
以上各工雖皆借資民力而瘠苦村莊出夫應役  
不能不給資津貼均由臣隨時捐籌接濟並該管



府縣捐廉以補不足此外各州縣溝洫之利或滄  
治故道或創開新渠各就其境地之所宜凡能有  
益農田一經官爲倡率小民皆樂於從事陸續據  
報頗稱踴躍除將未竣各工飭令水利總局隨時  
督催外所有辦理各屬水利情形理合恭摺具陳  
伏乞

皇上聖鑒謹

奏

同治十二年七月十一日

金每肩及考防老口

二

續解西甯豫師軍營專餉片

再豫省奉撥西甯辦事大臣豫師軍營專餉計先後撥解及抵兌共解過銀十二萬二百一十兩疊經

奏明在案茲復由臣飭司在於同治十二年丁地項下籌動銀一萬兩於八月初三日發交委員候補知縣傅樾領解起程前赴陝西省城西甯轉運局交收轉解應用以濟要需據藩司劉齊銜詳請具奏前來臣覆核無異理合附片具陳伏乞

聖鑒謹

奏

同治十二年八月初五日



鄉試人數較多添蓋棚號片

再本年鄉試士子共一萬五千七百四十四人比較上屆多至二千有奇緣中州轄境綏救年歲中稔士子恭逢

郵治仰沐

雲漢作人之化學校如林觀光日眾惟號舍實不敷用臨時添蓋棚號一千六百餘間幸值天氣晴霽士子足資棲止得盡所長而三場點名散卷及闈中彈壓照料繁難倍於往年臣督飭提調監試各官認真稽察一切尚稱安靜堪以仰慰

宸廔除將出闈日期循例恭疏具  
題外理合附片陳明伏乞

聖鑒謹

奏

同治十二年八月二十八日

懇將前借漕項歸於軍需項下報銷片

再據布政使劉齊銜詳稱豫省撥解京協各餉及本省支發各款爲數甚鉅度支時形竭蹶前因張曜宋慶兩營西征月餉無可籌措移准糧鹽道撥借漕項銀十萬兩於同治十年十二月二十六日解司兌收以濟軍需原擬籌還歸款無如司庫入不敷出周轉爲難迄今無法補苴懇將前借漕項銀兩歸於軍需項下動用報銷等情請

奏前來臣覆查無異相應奏懇

天恩俯准借撥動用歸於軍需項下報銷俾資周轉爲

此附片具陳伏乞

聖鑒謹

奏

同治十二年九月初十日



南陽左營確山考城營守備各缺詳細查明仍請  
以王箱等分別補授摺

奏爲查明恭摺覆奏仰祈

聖鑒事竊查南陽鎮標左營守備確山營守備考城營

守備各員缺前經

臣

以儘先守備王箱請補南陽

鎮標左營守備張徵請補確山營守備蔡友彬請  
補考城營守備茲准兵部以該員等儘先名次在  
後其名次在前各員雖據聲明於此三缺均不相  
宜惟未按名指實核與定章究不相符礙難率准  
仍令詳細查明覆奏到日再行核辦等因具奏奉

旨依議欽此知照到 臣遵於豫省應補守備各員詳細  
確查除原保並無儘先並保有儘先現未在標者  
不計外蔡友彬儘先名次應列第十六名王箱應  
列三十一名張徵應列三十四名其名次在前之  
王廷相李玉成趙喜德買青山周占魁鄒鳳傑李  
德楊得林王成如魏全忠陳致中喬玉馬金章梁  
信俊趙端木趙同心錢錕張青雲王殿魁李得明  
韓立本王殿毛得玉李寶盛黃占標王同生何三  
綱魏雲標阿爾綳阿周青選溫國和等人材弓馬  
亦均可觀惟於南陽鎮標左營確山營考城營三

缺營務地方情形尚欠熟諳人地不甚相宜未便遷就請補所有南陽鎮標左營確山營考城營守備各員缺應請仍以王箱張徵蔡友彬分別補授以重地方而裨營伍理合查明儘先在前各員按名指實恭摺覆

奏伏乞

皇上聖鑒敕部議覆施行謹

奏

同治十二年九月初十日





撫標右營守備請仍以張湘補授摺

奏爲臣標右營守備員缺請仍以儘先守備張湘補

授恭摺仰祈

聖鑒事竊查臣標右營守備員缺前經臣以歸德鎮右

營千總儘先守備張湘請補茲准兵部咨張湘保  
舉儘先名次在後雖聲明名次在前各員於此缺  
不甚相宜惟未按名指實核與定章不符礙難率  
准等因具奏奉

旨依議欽此知照到臣伏查臣標右營守備駐紮省會  
營務殷繁操防緝捕最關緊要非精明強幹熟悉

情形之員難期得力臣復於在標儘先守備中逐  
加遴選名次在前之李玉成買青山周占魁李德  
楊得林王成如馬金章梁信俊張青雲李得明王  
殿毛得玉寶萬選王保國白燦章海呈瑞馬振彪  
閻紹富王秀崔霖雨朱忠全賈德元馬國楨王朝  
良劉振清等均係籍隸同府李六德魏精一等現  
在丁憂王廷相趙喜德鄒鳳傑魏全忠陳致中喬  
玉趙端木趙同心錢錕王殿魁韓立本李寶盛黃  
占標王同生何三綱魏雲標阿爾紉阿周青選溫  
國和清廉李生貴曾諤王振山花榮桂軒轅同春

朱鳳山趙敬一郭忠元夏省忠陳德魁劉孝昭張  
紹劉鳳岐唐雷元馮啟賢張連陞王金寶等於此  
缺地方情形尚欠熟悉人地均不相宜惟查有歸  
德鎮右營千總儘先守備張湘營務熟諳緝捕得  
力現署臣標左營守備措置裕如以之請補右營  
守備一缺洵屬人地相需堪以勝任未便因該員  
名次在後稍事拘泥相應將儘先名次在前各員  
按名指實籲懇

天恩俯准仍以儘先守備張湘補授臣標右營守備以  
重地方而裨營伍臣爲因地擇人起見理合恭摺

具陳伏乞

皇上聖鑒訓示謹

奏

同治十二年九月二十六日



恭報越南國貢使過境日期摺

奏爲恭報越南國貢使過境日期仰祈

聖鑒事竊照越南國使臣潘仕俶等賫呈例

貢進京道經豫省臣前准廣西撫臣岑會當經檄飭

沿途州縣妥爲伺備並遴委汝甯府知府溥泰衛

輝府知府來秀署信陽協副將田慶和衛輝營叅

將經文布等督同地方文武員弁按站護送以期

慎益加慎茲據稟報該使臣等於同治十二年九

月初五日入河南信陽州境卽於是月二十三日

至安陽縣出境交直隸委員接護前進沿途應付

照料均無貽誤行走甚爲安靜所有越南國使臣  
過境日期理合恭摺具陳伏乞

皇上聖鑒謹

奏

同治十二年九月二十八日

補題繕進鄉試題名錄摺

奏爲補題繕進河南鄉試題名錄恭摺仰祈

聖鑒事竊照每科鄉試向於揭曉後由監臨臣衙門恭

疏

題報揭曉日期並敬繕題名錄進

呈等因歷屆遵辦在案茲癸酉科河南鄉試於九月初九日寅時揭曉當經照例具疏繕錄於十四日拜發去後旋據賚本承差稟報該承差二名分賚本章名錄起程於十七日行抵彰德府安陽縣屬豐樂鎮因過漳河適值河水甫落新淤爛灘人馬

陷跌致將夾板題名錄壓損浸溼當因本章緊要未敢稽延由承差恭賚前進其賚題名錄之承差回省稟報等情到臣衙門臣查詢屬實當將題名錄另行繕造已於二十四日補題仍由塘遞進

呈伏查臣職任監臨於疏報揭曉日期進呈題名錄雖無貽誤惟因中途損溼另行繕造補

題究屬未能周密相應請

旨將臣交部議處出自

恩施除咨明通政司衙門外所有補行繕進鄉試題名錄緣由謹繕摺具陳伏乞



皇上聖鑒訓示謹

奏

同治十二年九月二十八日



嚴飭練軍更番巡哨片

再豫省練軍新立亟應分巡合哨使士卒既可習勞地方亦資彈壓庶於行則爲陣止則爲營之制相符且現值冬令尤須梭織巡防以靖邊圉臣已分別檄行管帶練軍各鎮將於北則彰德臨內於東則歸德虞夏永於南則汝甯新蔡於西南則南陽內浙各等處派撥隊伍扼要駐紮輪番接替仍勤操習庶在防有駐練之兵在路有出巡之隊巡已卽練練已卽巡更迭循環聲勢較壯仍諄飭該鎮將從嚴約束必使軍行而民不知斯可爲節制

之師遇有著名匪犯並令會同地方文武隨時嚴  
密緝拏閭閻藉資安輯謹附片具陳伏乞

聖鑒謹

奏

同治十二年九月二十八日



河工緊要請暫挪柴工加價銀兩摺

奏爲河工撥款緊要懇請暫挪柴工加價銀兩以濟  
急需仍卽另籌補解恭摺仰祈

聖鑒事竊照前准部咨本年京餉添撥長蘆柴工加價  
解部歸款銀五萬兩令於十二月初間解齊等因  
遵卽飭據司道查明豫省征收長蘆柴工加價除  
節次委解部庫並奏准動用實止存剩銀四萬九  
千六百八十八兩三錢九分四釐未足五萬兩之  
數應行儘數提解以供開放經臣奏奉

硃批該部知道欽此欽遵行飭在案茲據布政使劉齊

銜詳稱正在委解間適上南中河兩廳險工迭出  
經河督臣喬松年先後奏准添撥防險銀十萬兩  
飭司迅速撥發工需緊迫急於星火無如下忙丁  
漕等項徵收尚無成數而司庫支用浩繁出多入  
少庫款搜羅殆盡實在無可騰挪伏思築工加價  
奉撥京餉關係部庫支放何敢稍事遷延第搶辦  
險工事機爭於呼吸其待用撥款尤爲迫不容緩  
之需再四籌維不得不先其所急應懇將前項築  
工加價銀四萬九千六百八十八兩零暫行挪撥  
工用仍卽另籌補解京餉等情詳請具

奏前來臣覆加查核該司所詳委係實在情形合無  
仰懇

天恩俯念河工撥款緊要司庫萬分支絀准其暫挪前  
項榮工加價銀兩撥濟工需另行籌解京餉俾資  
周轉而免貽誤爲此恭摺具陳伏乞

皇上聖鑒訓示謹

奏

同治十二年十月十四日





河岸沖塌逼近

漢陵設法守護並現議估脩摺

奏爲河岸沖塌逼近

漢陵當飭設法守護現議修築以期永固恭摺

奏陳仰祈

聖鑒事竊本年自七月後黃河異常漲發據報孟津縣屬之間灣等五村均有被水沖塌之處河水套灣直逼

漢光武帝陵相距僅二十餘弓當經飭司委員馳往會同地方官設法守護並分給災民饌餅席片以資

金匱要略卷之四十四  
三  
棲食俾免流離據藩司劉齊銜詳請具

奏前來

臣查

歷代帝王陵寢所關亟應慎重除飭司委員續往估勘  
乘此水落歸槽之際加修石工以防來年大汛並  
將被災村莊戶口查明分別賑恤外所有疊次守  
護暨現辦情形理合繕摺具陳伏乞

皇上聖鑒訓示謹

奏

同治十二年十月十四日

請將誑欠逞凶被控脫逃之總兵蔣德華先行革職勒緝究辦摺

奏爲被控誑欠逞兇之總兵情虛脫逃飭緝務獲應請先行革職以儆官邪恭摺仰祈

聖鑒事按據藩臬兩司轉據開封府暨祥符縣詳稱據客民馬林治呈控總兵蔣德華在中牟途次誑買該客民綢緞三百餘尺約同來省償價屢經索討以致觸怒將該客民繩捆兇毆街鄰勸散赴縣喊訴該縣驗明傷痕查訪屬實稟經臣批飭開封府傳提蔣德華並人證卷宗澈底究報該總兵蔣德

華情虛畏審聞信遠颺業已飭屬堵緝請先行

奏參等情前來臣查蔣德華以武職大員詐欠綱價迹同局騙已屬不知自愛况復因向索償逞兇捆毆尤爲目無法紀相應請

旨將總兵蔣德華卽行革職一面勒緝務獲按律擬議究辦所有總兵被控脫逃緣由理合恭摺具陳伏乞

皇上聖鑒訓示謹

奏

同治十二年十月二十八日



報解黑龍江官兵資裝銀兩摺

奏爲報解黑龍江官兵資裝銀數日期恭摺仰祈  
聖鑒事竊照同治十年八月准戶部咨議奏黑龍江十  
年冬圍官兵應需資裝擬於河南驛站存贍銀內  
撥給銀一萬四千八百六十八兩委解

盛京戶部交納奉

旨依議欽此等因行經前撫臣轉飭遵照在案茲據  
布政使劉齊銜按察使紹誠會詳稱遵於驛站存  
贍項下籌措前項資裝銀一萬四千八百六十八  
兩定於同治十二年十一月初六日委員管解起

程前赴

盛京戶部交納等情請

奏前來除給咨牌飭領起解外所有奉撥黑龍江官  
兵資裝銀兩照數籌撥起解銀數日期理合恭摺  
陳奏伏乞

皇上聖鑒謹

奏

同治十二年十一月十四日

河岸沖塌勘明孟津縣屬被淹災民先行撫卹摺  
奏爲河岸沖塌勘明孟津縣屬濱河村莊被淹災民  
籲懇

恩施先行撫卹一月口糧以資接濟恭摺仰祈

聖鑒事竊照本年自七月後黃河異常漲發孟津縣屬  
之閻灣等村莊被水沖塌河水套灣直逼

漢光武帝陵臣據稟報飭司委員馳往會同地方官設  
法守護並將被水災民拯濟業經奏奉

硃批知道了欽此欽遵轉行在案茲據河南府督同印  
委各員勘明閻灣等五村莊並鐵謝鎮地方沖塌

情形輕重不等室廬傾圮田禾漂沒無存被災貧民雖迭經散放饌餅席片暫資棲食究係臨時急賑勢難遍及據布政使劉齊銜轉據該管道府議請照例無論極次貧民概行撫卹一月口糧具詳請

奏前來 臣覆查無異合無仰懇

天恩俯准將孟津縣被水村莊無論極次貧民撫卹一月口糧所需銀兩卽在本年地丁項下動支給發責成印委各員核實散放俾災黎得沾實惠 臣仍督司嚴密稽查飭令事竣造冊報銷不使稍有遺



濫以期仰副

聖主矜卹災黎不使一夫失所之至意除再飭將水落之處確查成災分數加賑月分並坍塌瓦草房間各若干應行蠲緩年款分晰造冊及勘估脩築保衛

漢陵另行次第奏辦外所有查明災區貧民先行賑卹口糧緣由理合恭摺具

奏伏乞

皇上聖鑒訓示謹

奏

同治十二年十一月十四日

籌解奉省官兵俸餉片

再同治十二年六月接准部咨奉省官兵俸餉不敷抵放奏准在於河南積欠東三省俸餉項下先提銀一萬兩另撥地丁銀二萬兩驛站存贖銀二萬兩行令飭司解赴

盛京戶部交納以濟要需等因當經車行在案茲據布政使劉齊銜卽在地丁項下先行籌措積欠俸餉銀一萬兩定於同治十二年十一月初六日委員管解起程前赴

盛京戶部交納等情具詳請

奏前來除給咨牌飭領起解並飭將下餘銀兩陸續  
委解外所有奉提積欠俸餉銀兩現籌起解數目  
日期理合附片陳奏伏乞

聖鑒謹

奏

同治十二年十一月十四日



續解吉林冬圍經費片

再同治十年七月准戶部咨奏撥吉林十年冬圍經費銀一萬四千兩在於河南驛站存贍項下撥給行令委解

盛京戶部交納等因經前撫臣轉行遵照在案茲催據藩臬兩司卽在驛站存贍項下籌措前項經費銀一萬四千兩定於同治十二年十一月初六日委員管解起程前赴

盛京戶部交納等情會詳請

奏前來除給咨牌飭領起解外所有起解吉林冬圍

經費銀數日期謹附片陳奏伏乞

聖鑒謹

奏

同治十二年十一月十四日

續解西甯豫師軍營專餉片

再豫省奉撥西甯辦事大臣豫師軍營專餉計先後撥解及抵兌共解過銀十三萬三百一十兩疊經

奏明在案茲復由臣飭司在於同治十二年丁地項下籌動銀一萬兩於十一月初三日發交委員候補知縣孫寶善領解起程前赴陝西省城西甯轉運局交收轉解應用以濟要需據藩司劉齊銜詳請具

奏前來臣覆核無異理合附片具陳伏乞

聖鑒謹

奏

同治十二年十一月十四日



嚴飭搜捕李六案內餘匪按名弋獲正法現在邊  
圍綏靖摺

奏爲遵

旨嚴飭搜捕李六案內餘匪按名弋獲正法現在邊圍  
綏靖恭摺仰祈

聖鑒事竊臣於上年八月間承准軍機大臣字寄奉  
上諭匪首李六雖經拏獲地方肅清仍恐皖豫交界一  
帶伏莽未清若不將餘匪搜捕淨盡難保不暗中跽  
伏伺隙復發著錢鼎銘嚴飭在事各員認真搜緝務  
將餘黨悉數捕獲以消後患等因欽此欽遵行飭地

方文武並駐防總兵汪印千等實力搜捕復經臣  
密訪漏網餘匪姓名札飭南汝光道傅壽彤督同  
購線躡緝去後節據署商城縣知縣馮德綬報獲  
李三磨張士然張小卽張士全並格斃石瀉三等  
三名固始縣知縣胡慶騮報獲汪禿孜胡六袁七  
吳保童潘柱孜卽潘二橫並該縣把總張鳳翔格  
殺王庭方一名總兵汪印千報獲劉澱彩孫林標  
二名訊供聽從李六李四聾仔結捻入夥焚搶拒  
敵不諱先後飭據光州知州姚國慶覆審明確除  
汪禿孜一犯病斃外餘均就地正法查此外尚有

潘四橫姚老瀉卽姚老小又名姚中和王二學生卽王聽爛等數名均係著名匪黨飭拏未獲誠恐根株不能淨絕致貽他日之害而該犯等深知黨羽悉皆就擒竄伏無定躡蹤更難迭飭在事各員多方設法以重賞雇覓眼線激勵勇役期於必得先經汪印千會同胡慶騮將姚老瀉拏獲續據該州知州姚國慶偵悉潘四橫等匪於淮鳳集南五里許小飯棚內密約汪印千率所部馳往姚國慶選帶團役會合兜拏該匪等一共五人騎馬圖逸開放洋鎗異常獷悍勇役兵練奮躍追捕右哨都



司王長勝格殺二名生擒二名一賊乘間突出窮追三十餘里格傷擒獲提訊生擒之匪一卽王二學生一名龐澱有受傷之賊名孫得勝同據指認擊斃之賊一卽潘四橫一名張名揚當飭提同姚老瀉分別正法梟示並將潘四橫王二學生兩犯首級傳示附近各州縣以快人心此皆仰賴宸謨指授除惡務盡得以悉數駢誅消弭隱患現仍檄飭總兵汪印千於光固各要隘分布隊伍梭織巡哨以衛冬防而資彈壓所有捕獲餘匪邊圍綏靖各緣由謹繕摺具陳伏乞



皇上聖鑒訓示謹

奏

同治十二年十一月二十七日



飭委臬司紹誠會同候補道劉成忠勘估

漢陵工程片

再孟津縣境黃河南趨逼近

漢陵經臣奏明籌勘保護在案查此項工程勢不可緩而體察形勢區畫脩守估計經費必得熟諳河務之大員馳往勘辦查臬司紹誠前在滎工頗著成效由臣檄飭會同候補道劉成忠前赴該處核實勘估現據臬司申報已於本月二十五日帶印出省除俟勘覆到日另行核議具奏外理合附片陳明伏乞

聖鑒謹

奏

同治十二年十一月二十七日



毅軍西征運費請免造報細數片

再豫省月協西征餉銀前經陝甘督臣左宗棠

奏奉

諭旨自同治十二年二月爲始改爲毅軍運費等因欽此欽遵行司陸續籌解在案茲據統領宋慶咨稱該軍出境太遠所有軍餉軍裝軍火等項資送於數千里外且抵肅仰攻以來月需糧草購自甘涼兩處運腳之照臺章者十不及二三餘皆重給民價雇覓車駝以供急運緣各軍環集官車民車皆屬有限支應斷難周轉不得不增腳價以廣招徠

金匱要略卷之二十一  
三十一  
無定所亦無定時愈艱難則愈騰貴勢不能按照  
例章價值及斤重里數詳細造報咨請據實具  
奏前來臣查毅軍遠征西陲轉徙靡定所陳自係實  
情若必強求合度竊恐於邊塞轉運易滋貽誤除  
豫省統歸協餉報部查核外所有該軍動用此項  
運費合無籲懇

天恩免其造報細數出自

鴻慈逾格謹附片具

奏伏乞

聖鑒訓示謹

奏

同治十二年十一月二十七日





詹事府詹事袁保恆之祖母郭氏年屆百歲籲懇  
恩施摺

奏爲大員祖母年屆百歲籲懇

恩施以彰人瑞恭摺仰祈

聖鑒事竊查會典事例內開乾隆十二年原任內務府  
總管丁阜保連閏准作百歲又查嘉慶十四年禮  
部議准滿洲漢人三品以上大員父母有年屆百  
歲者於平民常例之外遞請

加賞建坊給匾以昭優寵各等因茲有頭品頂戴詹事  
府詹事袁保恆之祖母郭氏係已故漕運總督袁

甲三之母前於咸豐十年間蒙

文宗顯皇帝特旨查詢

頒賞御書匾額福壽字如意綢緞等件同治六年復以壽

逾九旬經升任撫臣李鶴年奏蒙

恩賜御書彤管揚輝匾額

異數殊榮光增鄉里該氏現年九十有七精神彊固照

例連閏准作百歲向來

賞賚之典亦於平民常例之外

優寵加恩今郭氏以一品命婦歷

五朝盛世其子袁甲三服官中外宣力封圻十載統兵鞠

躬盡瘁其勛名之建樹秉承母訓者爲多今袁保  
恆蔚起詞垣習於軍旅西征籌餉殫慮竭誠詒謀  
之澤方長慈教之來有自仰惟

聖主以孝治天下

推仁錫類眷念盡臣有加無已合無籲懇

天恩量示優寵俾該氏永戴

堯天益綿歲月彰

壽寓延長之瑞卽慰教忠垂裕之私再此次改題爲奏  
核與同治十年署湖北提督滕嗣武之祖母張氏  
年逾九旬經兼署湖廣督臣代奏之例亦屬相符

理合恭摺具陳伏乞

皇上聖鑒訓示謹

奏

同治十二年十二月初九日



奉撥山東隄工銀兩請

敕部改撥捐

奏爲奉撥山東隄工銀兩豫省籌款維艱籲懇

天恩敕部改撥以濟要需而免貽誤恭摺仰祈

聖鑒事竊照同治十二年十月二十九日接准部咨以

山東隄工需費較急奏撥河南地丁銀五萬兩驛  
站存贍銀五萬兩行令於年內先解一半其餘一  
半於明年二月全數解清以濟工需等因當卽飭  
司遵辦去後茲據布政使劉齊銜詳稱遵查東省  
隄工銀兩旣經奉部指款撥解何敢稍事推諉惟

是通盤核算本省急應支撥之款尚在不敷實有難於兼顧鄰省之勢緣河南每年地丁除因災歉蠲緩約徵銀一百七十餘萬以之撥解京餉二十五萬河工經費五十餘萬張曜宋慶兩軍專餉一百四十餘萬數已不敷甚鉅至驛站銀兩除酌解東三省資裝等款其餘盡爲河工軍需動用是地丁驛站兩項均無餘贖此外應支各款尚多無非騰挪集湊卽如本年添撥河工防險銀十萬兩係屬意外急迫之需前因無款可籌曾經奏准暫將榮工加價銀四萬九千六百餘兩儘數借

用現尚無款抵還統計年內不敷支放銀二十餘萬西路專協各餉尚不在內際此司庫異常艱窘實屬自顧不遑若不據實瀝陳竊恐延誤於後再四籌思惟有懇將此項隄工銀兩由部酌量改撥他省有著款項迅速解東俾資協濟等情詳請具奏前來臣伏查東省隄工緊要同爲

國事况屬鄰封但能設法通挪原不准輕議改撥惟察看司庫匱乏情形自臣上年到任以來卽疊次瀝陳

聖鑒現值張曜宋慶兩軍奉



旨出關豫省轉運直抵蘭州愈增繁費方將籌議變通  
此項工需委難兼顧合無仰懇

天恩俯准將撥解東省隄工銀十萬兩

敕下部臣酌核改撥他省協濟以應要需免致貽誤理  
合恭摺具陳伏乞

皇上聖鑒訓示謹

奏

同治十二年十二月初九日



恭謝

恩賞福字摺

奏爲恭謝

天恩仰祈

聖鑒事竊臣賁摺差弁回豫捧到

恩賞福字一方謹卽恭設香案望

闕叩頭祇領訖伏念臣菰鄉下士櫟社庸材疆寄忝

膺渥荷

綸施之簡畀涓微莫效復蒙

錫賚之優加欽惟我

皇上瑞輯蘿圖

祥徵冀莢

邁虞階之干羽欣逢九夏咸清

闡羲畫於苞符正值三陽泰啟

時授寅賓之會

範衍洪疇

幾勤乙覽之餘

書揮宸翰

麗璇題於日月

恩光偕韶景長新

煥寶墨於星雲

聖治與奎文並耀自

天寵賁匝地歡臚臣惟有益矢靖共冀酬

高厚合躋堂寮宗羣瞻倬漢之

龍章率闔境士民共效呼嵩而雀躍所有感激榮抃下

忱謹繕摺恭謝

天恩伏乞

皇上聖鑒謹

奏

同治十二年十二月十七日





請以儘先守備李得明補撫標左營守備摺

奏爲揀員請補守備員缺恭摺仰祈

聖鑒事竊查臣標左營守備申坤元病故出缺前經臣

恭疏

題報並聲明所遺員缺請歸外補在案旋准兵部咨  
此係部推之缺應令照例揀選儘先名次在前人  
員請補等因知照到臣查部定章程儘先各官均  
按奉

旨先後挨次補用如實在不得其人或員缺緊要准將  
名次在後之員聲明請補等語臣標左營守備駐

紮省城營務繁劇非明幹諳練之員不足以資整飭臣於各標儘先守備中逐加遴選名次在前之李玉成趙喜德周占魁鄒鳳傑李德揚得林王成如魏全忠陳致中喬玉馬金章梁信俊趙端木趙同心錢錕張青雲王殿魁等十七員於此缺地方情形均欠熟悉未便遷就貽誤惟查有儘先守備李得明年力正強能耐勞苦現派管帶練軍極爲得力以之請補斯缺洵堪勝任雖該員名次稍後與例未符惟人地實在相需自應照章聲明專摺奏請以重地方而裨營伍臣爲因地擇人起見合

無仰懇

天恩俯准以儘先守備李得明補授臣標左營守備實  
於營伍地方均有裨益如蒙

俞允該員籍隸本府俟部覆至日再行照例查缺對調  
以符定制除飭取履歷送部外理合恭摺具

奏伏乞

皇上聖鑒訓示謹

奏

同治十二年十二月十八日

金瓶梅詞話卷之四

四



查明請保各員懇照原保獎勵摺

奏爲查明請保各員實係戰功卓著籲懇

天恩准照原保獎勵恭摺奏陳仰祈

聖鑒事竊臣於剿除李六股匪淨絕隨摺奏保案內同

治十一年八月十三日奉

上諭同知用署固始縣知縣胡慶騮著俟補缺後免補  
同知以知府補用欽此又十一月二十四日奉

上諭錢鼎銘奏查明剿除皖豫匪徒出力官紳開單懇  
請獎勵一摺本年五月間匪徒李四聾仔等勾結黨  
類在皖豫交界地方陰謀起事經錢鼎銘派出官兵

會同皖軍迅速剿洗撲滅地方一律肅清在事出力各員均屬著有微勞自應量予獎勵等因欽此所有單開文武員弁均蒙

恩旨准予照獎嗣經先後准吏部咨以單開文員內除核與章程相符者照准外其餘同知用署固始縣知縣胡慶騮請俟補缺後免補同知以知府補用候選同知丁建勳同知銜直隸州用候補知縣席元鑾均請

賞戴花翎候選詹事府主簿崔正鼎請以通判分省歸軍功候補班前先用選缺後以通判歸候補班

前先補用候選州同何保榮請免選本班以通判分發省分仍歸候補班前先補用知縣用候補縣丞多彬請免補本班以知縣歸候補班前先補用候選布庫大使高紹祺請俟選缺後以通判歸候補班前先補用並

賞戴藍翎遇缺卽選吏目張豫升請仍以吏目留豫遇缺前卽補並

賞戴藍翎分缺先選用典史潘慶熊請免選本班以主簿分發省分歸候補班前先補用試用未入流吳秉義請以典史歸候補班前卽補並



賞戴藍翎候選同知傅岷孫請以同知分發省分歸候  
補班前儘先補用提舉銜試用通判汪坦候補布  
庫大使劉葆森均請歸候補班前遇缺儘先補用  
同知銜湖北試用知縣朱有寬請仍以知縣留於  
湖北歸候補班前儘先補用候選縣丞孫潤章請  
仍以縣丞留於河南歸候補班補用分發河南試  
用典史康奉琪請免補本班以鹽大使分發省分  
歸候補班前先補用文童尹儒珍請以典史留豫  
歸候補班前先補用六品軍功東河先儘主簿焦  
鳴岡請俟補缺後以縣丞在任歸先儘前班候



補以上各員或因與章不符或駁照獲盜優敘章程將該員等免補免選翎枝及候補班次分別改獎撤銷駁查前來除候選州同何保榮業已指分東河以通判補用外復查胡慶騮等各員帶隊剿平股匪均係身在行間殺賊擒渠戰功卓著臣是以遵

旨擇尤保獎該員等血戰立功前後數月之久殲除首要各逆實非拏獲大盜者勞績可比再查皖軍剿除叛匪各員經該撫臣覆奏荷蒙

恩旨照原保獎勵皖豫事同一律且豫省員弁疊獲首

逆功績尤著所保武員亦經兵部核准註冊在案  
該員等未便獨令向隅合無仰懇

聖恩俯准將胡慶騮等十七員仍照原保給獎該冊出  
自

逾格鴻施再試用典史康奉琪前保單內誤寫康奉琦  
現據呈請更正合併聲明謹繕摺具陳伏乞

皇上聖鑒訓示謹

奏

同治十二年十二月二十七日

籌撥巴里坤餉銀片

再豫省原奉撥解巴哈兩城軍餉銀十萬兩前已  
兩次委解過銀二萬兩續又奉文撥解巴里坤專  
餉銀七萬兩本應照數籌撥惟因司庫匱絀異常  
錢糧入不敷出實屬難以周轉臣以巴城待餉孔  
殷飭司竭力設措在於同治十二年丁地項下動  
撥銀一萬兩於十二月十三日發交催餉委員崔  
效銓領解起程前赴綏遠城將軍衙門交納轉解  
仍歸原撥十萬兩款內造報所有巴城專餉七萬  
兩俟籌有款項再行續解據布政使劉齊銜具詳

請

奏前來謹附片陳明伏乞

聖鑒謹

奏

同治十二年十二月二十七日



撥解哈密專餉片

再豫省奉撥哈密專餉四萬兩前經撥解銀一萬  
四千兩

奏明在案茲復由臣飭司在於同治十二年丁地項  
下籌動銀一萬兩於十二月十六日發交催餉委  
員劉吉雲領解起程前赴察哈爾都統衙門交納  
以濟要需據藩司劉齊銜詳請具

奏前來臣覆核無異理合附片具陳伏乞

聖鑒謹

奏

同治十二年十二月二十七日

已故道員袁保慶在籍歷著戰功請附祀袁甲三

陳州專祠摺

奏爲已故道員在籍歷著戰功請

旨附祀以順輿情恭摺仰祈

聖鑒事竊據內閣中書張祖謨徐熙德前詹事府詹事  
吳保泰戶部七品小京官高釗中刑部主事孫欽  
晃工部郎中張畹前安徽鳳潁道劉毓楠前陝西  
商州協副將閻丕敏教諭季樽智殿邦舉人曹學  
禮廩生趙金城等呈稱已故鹽運使銜署江南鹽  
法道袁保慶學術純正秉性忠貞歷隨原任漕運

總督袁甲三立功江皖旋辦本省團練兼奉檄委帶兵剿賊在歸德則攻克夏邑之洪樓買頭集等七寨殲匪首趙浩然又克商邱之宋集等寨殲匪首李廷彥又克睢州之余家屯王橋寨殲匪首余四並擒其黨斬之在汝甯則先後克復路閭莊曹窰曹樓新興集韓洞平輿楊埠廟灣汝南埠李鍾寨等處擒殺匪首李剛馬丙馬科乘勝諭降鮑陽等七十餘寨在南陽則剪除唐泌角子山等處積年土匪張武魁路天才李三等多名在陳州則截擊竄豫粵匪陳得才馬永和等大股於項城之靳



橋斬擒無算追奔出境督剿上店韓李寨等處踞  
匪環攻五十晝夜克之殲匪首李如松擒趙鳳岡  
降李如海境內得以肅清苗逆之叛袁甲三奉

命籌辦歸陳防剿該故員實左右之凡此勲績昭彰保衛

桑梓遠近感頌追念同聲准諸禮經凡有功德於  
民及能捍災禦患者則祀之爲此合詞籲請附祀

袁甲三陳州專祠由地方官春秋致祭用報盡績

等情臣查該故員袁保慶前經兩江督臣李宗義

奏請將事蹟宣付史館並准附祀臨淮專祠欽奉

上諭已故署江甯鹽道袁保慶前在原任漕運總督袁

金華書局影印  
二  
甲三軍營頗資得力復在河南南陽等處督帶團練  
歷著戰功等因欽此該故員在籍立功已在

聖明洞鑒之中今據閩省紳士公同呈懇自應俯如所  
請且與附祀臨淮專祠事同一律合無籲懇

天恩准將袁保慶附祀袁甲三陳州專祠以光一門之  
功烈而垂百世之馨香謹恭摺具陳伏乞

皇上聖鑒訓示謹

奏

同治十三年正月二十八日

查明鄉試年老諸生摺

奏爲循例查明鄉試未中年老諸生恭摺仰祈

聖鑒事竊照文闈鄉試年屆九十八十以上諸生三場完竣未經中式例應奏請

恩施歷經遵辦在案同治十二年癸酉科河南鄉試揭曉後檢閱落卷查有年屆九十老生李化南等三十五名年屆八十老生周逢丙等三十八名俱各三場完竣榜發未經中式文理均尚通順行查入學年分相符據布政使劉齊銜造冊取結詳請具奏前來

臣查李化南等蛾術功勤鵬搏志切守芸編

而好學入棘院以觀光仰惟

聖教涵濡

壽考溥作人之化允見士林鼓舞膠庠記惇史之言循  
醕爵於周官悉符成例慶登龍於

盛世合荷

殊榮除將冊結咨送禮部外謹繕具清單恭摺奏陳伏  
乞

皇上聖鑒敕部核覆施行謹

奏

同治十三年二月十二日



勘明籌辦孟津河岸工程片

再臣前派臬司紹誠會同候補道劉成忠勘估孟津河岸工程當將出省日期附

奏在案該司等於上年十二月十二日回省面陳河勢情形復飭悉心籌議茲據詳稱孟津黃河南岸自牛莊嘴以下河心生灘積石磷磷大溜南圈刷坍老岸三四百丈塌及鐵謝寨北面寨牆並迤北五村廬舍其寨西里許爲

漢光武帝陵與雞心灘南北相對距河祇八十餘丈此後伏秋盛漲大溜奔騰旁洶橫擊勢所必然

先朝陵寢固須亟籌保護卽鐵謝一寨亦不能聽其坍塌是此項工程極關緊要辦理不容稍緩若籌久遠之計非連建石壩加拋石梁挑溜北移盡復老灘不可但經費極爲撙節必得十數萬金帑項支絀之時無從籌此鉅款惟有先爲目前脩護之計自牛莊嘴起直抵鐵謝寨沿邊拋疊長大石梁高出水面另須購儲石方留備水長時順勢加拋得此攔擋可免再塌該處向無防河工程所有工價石方運腳未能遽定細數約計需銀二萬餘兩應俟工竣核實造報等情臣覆加察核所議尚屬周

妥已一面行司籌款飭發採購石料趕緊興工統  
俟事竣後核實

奏銷理合將勘明籌辦大概情形先行附片具陳伏  
乞

聖鑒謹

奏

同治十三年二月十二日





委員護送越南使臣回國片

再越南國使臣潘仕俶等自京起程回國當經遴委彰德府知府賈致恩候補直隸州知州阮恩海等會督地方文武員弁按程護送並因廣西原件送官楊安龍病故添派彰德營守備周希曾護送至黃河河南岸交襄城營都司郭仁接護前進茲據稟報該使臣等於本年正月十四日入安陽縣境二月初三日至新野縣出境交湖北委員接護沿途行走安靜照例應付均無貽誤理合附片陳明伏乞

聖鑒謹

奏

同治十三年二月十二日

張景芝繼妻孟氏殉夫自盡援案請旌片

再據祥符縣知縣查以謙詳據候補知府李會文等呈稱查有順天同鄉河南候補知縣張景芝之繼妻孟氏係宛平縣人於咸豐八年氏年二十九歲于歸結褵十四載相夫持家克盡婦道撫前室子女如己出同治十二年五月間張景芝染患痢證該氏旦晚侍疾寢食俱廢醫禱無效至六月初二日病故該氏決計殉夫親爲含殮後卽於初六日夜乘間仰藥身死洵屬激烈可嘉堪膺旌表因共造具冊結呈請援案核辦等情由縣核明加

結具詳請

奏前來臣查同治八年署四川雅州府知府劉其年病故其繼妻沈氏自盡殉夫又十一年湖南布政使吳元炳之子候補主事吳琳之妻徐氏自盡殉夫均經先後奏蒙

恩准旌表在案茲張景芝繼妻孟氏因夫病故以身相殉核與劉沈氏等事同一律相應援案籲懇

天恩准其一體旌表建坊以彰激烈而維風化除冊結咨部外理合附片具陳伏乞

聖鑒謹



奏

同治十三年二月十二日



汜水縣民因糧票索費糾眾滋事分別查辦摺

奏爲汜水鄉民因聞糧票索費糾眾兇鬧先將署知縣撤任一面委員查辦提省澈訊恭摺仰祈

聖鑒事竊查開封府屬之汜水縣民情浮動向稱刁悍

同治九年間紳士阻考挾制官長曾經升任撫臣

李鶴年訊擬奏結完案官斯土者宜如何約束撫馭潛移風俗以戢囂凌積習署知縣高錫康本年開徵新賦該縣花戶聞完糧揭票有櫃書私議需索紙筆費錢每張二文互相傳播眾論譁然該縣聞知當將櫃書責押正在出示諭禁突於本月十

六日有東北鄉民糾眾入城毀壞科房門窗不聽該縣開導擁進衙署逞兇滋鬧舉械向前丁役攔阻抵禦互有受傷其中鄉民一人傷重身死始各紛紛逃散據該署縣稟由該管府轉報前來當經批行兩司飭委幹員確訪起衅根由有無別情一面遴員接署查拏爲首滋事之人提同櫃書解省審辦該署縣高錫康於倉猝之際應變無方實屬辦理不善已由司先行撤任俟全案提集來省研鞫確情再行分別叅辦以肅法紀而昭平允謹繕摺具



奏伏乞

皇上聖鑒謹

奏

同治十三年二月二十九日



恭報出省閱伍起程日期摺

奏爲出省查閱營伍恭報起程日期仰祈

聖鑒事竊照豫省地處四衝武備操防最關緊要 臣恭

奉

諭旨查閱營伍擬於三月十九日起程出省先赴南陽  
歸德兩鎮所屬各營挨次認真校閱如有訓練不  
精軍實不齊將備衰庸者卽當從嚴叅

奏不敢稍事姑容所有 臣署中日行公事循例委藩  
司代拆代行遇有緊要事件仍包封送至途次親  
自核辦臬司解審命盜等案並委藩司代審由 臣

覆核具

題免致延擱臣此次出省閱畢南陽歸德兩鎮各營  
卽擬旋省辦理秋審事竣後再行閱看省城滿營  
撫標城守並河北鎮各營所有起程日期理合恭  
摺具

奏伏乞

皇上聖鑒謹

奏

同治十三年三月十八日



遵撥烏魯木齊餉銀摺

奏爲遵撥烏魯木齊餉銀解赴綏遠城謹將起解銀數日期恭摺具陳仰祈

聖鑒事同治十三年二月初八日奉

上諭前據定安奏大同征兵西進需餉孔亟當經諭令將山東等省應解景廉餉銀撥解綏遠城茲據定安奏稱河南應解餉銀三萬五千兩未據報解著卽如數籌撥解到綏遠城毋稍延緩等因欽此欽遵當經行司籌解去後茲據布政使劉齊銜詳稱豫省前次奉文撥解綏遠城軍餉銀四萬五千兩於同治

十一年十月內解交過銀一萬兩下餘銀三萬五千兩原應如數撥解惟司庫異常支絀年來奉撥各處協餉款目繁多錢糧進項入不敷出顧此失彼實屬籌措爲難第此項軍餉需用緊急不得不竭力籌解現於庫存同治十二年丁地項下籌動銀一萬五千兩飭委候補知縣袁儀生照數領解起程前赴綏遠城將軍衙門交納以應急需等情具詳請

奏前來 臣查豫省帑藏空虛久荷

聖明洞鑒近因奉撥頻仍尤覺難資周轉惟軍需緊要

不得不續爲籌解所有烏魯木齊餉銀撥解綏遠  
城起解銀數日期理合繕摺具陳伏乞

皇上聖鑒謹

奏

同治十三年四月十五日





籌撥西征糧臺餉銀運費摺

奏爲籌撥西征糧臺餉銀運費分別起解銀數日期  
併案恭摺具陳仰祈

聖鑒事案准西征糧臺咨開同治十二年八月初七日  
准戶部咨奏准在於河南積欠陝甘軍餉內酌提  
銀五萬兩飭令提督李炳勳赴豫稟催又咨本臺  
奏官軍赴援哈密籌借運費請撥款歸還一摺同  
治十二年十一月初九日戶部議覆具奏奉

旨在於河南積欠陝甘協餉項下提銀二萬兩解赴西  
征糧臺等因當經咨照在案現值需餉尤急飭委

前陝西臨潼縣知縣陸廷來馳赴稟催迅爲籌撥  
運解到陝俾濟急需各等因先後行司籌解去後  
茲據布政使劉齊銜詳稱此次奉文於積欠甘餉  
項下提撥銀五萬兩又提撥赴援哈密運費銀二  
萬兩均應如數撥解惟是豫省司庫連年匱絀異  
常正供錢糧入不敷出專協各項未得及時清解  
以致迭次催提茲奉前因儘力先行籌解在於庫  
存同治十三年丁地項下籌動銀五千兩當堂發  
交委員李炳勛又籌動銀一萬兩發交委員陸廷  
來分別照數領解起程回臺交納再提督李炳勛

川資不敷於前項協餉內先後借領過銀二百兩均經由司照數劄支給領在案合併聲明等情詳請具

奏前來臣查豫省庫儲竭蹶年甚一年現雖正屆上忙而奉撥各餉均應及時酌解出款既多庫藏依然空乏祇以西路軍需緊要不得不勉力先籌除仍由臣飭催陸續籌解外所有奉撥西征糧臺餉項運費分別起解數目日期緣由理合繕摺具

奏伏乞

皇上聖鑒謹

奏

同治十三年四月十五日



續撥西甯豫師軍營專餉片

再豫省奉撥西甯辦事大臣豫師軍營專餉計先後撥解及抵兌共解過銀十四萬四百兩均疊次奏明在案茲復由臣飭司在於同治十三年丁地項下籌動銀一萬兩於三月二十三日當堂支發查有西征糧臺委員知縣陸廷來提解赴援哈密運費銀兩回臺之便即將西甯餉銀交給該員照數領解起程前赴陝西省城西甯轉運局交收轉解應用以濟要需據藩司劉齊銜詳請具奏前來臣覆核無異理合附片具陳伏乞

聖鑒謹

奏

同治十三年四月十五日

起解積欠東三省俸餉銀數摺

奏爲起解積欠東三省俸餉銀數日期恭摺仰祈

聖鑒事竊查奉省用款不敷抵放於同治十一年五月  
奉提河南積欠項下銀五萬兩行令籌解等因遵  
卽飭司在地丁項下先籌銀三萬兩於十一年十  
一月二十日委解

盛京戶部交納經臣奏報在案伏查前項積欠俸餉  
黑龍江吉林打牲烏拉等三省欠餉均在其內爲  
數旣鉅需用甚殷雖豫省司庫支絀萬分不敢不  
量爲分撥以資接濟復經行司催解茲據布政使

劉齊銜詳稱續籌銀一萬兩定於同治十三年四月二十七日委員管解起程前赴

盛京戶部交納聽候酌量分撥各省應用等情請奏前來除發給咨牌飭令起解外所有奉提積欠東三省俸餉續籌起解銀數日期理合恭摺具

奏伏乞

皇上聖鑒謹

奏

同治十三年四月二十七日



龍神靈顯請加封號摺

奏爲

龍神靈顯疊著籲懇

敕加封號以順輿情恭摺仰祈

聖鑒事竊查河南府洛陽縣地方近接嵩邨地勢高阜  
雨澤偶爾愆期卽虞旱熯府城舊有

龍神廟載在祀典春秋致祭歷年以來官紳祈禱  
雨雪無不應時立沛又登封縣境嵩山之陰有九  
龍潭龍神廟建於唐開元間遠近祈禱甘澍立施  
上年冬間省城因久未得雪瘟疫流行經臣遣員

赴潭取水設壇虔禱卽時祥霽普被疾疫潛消感  
靈驗之屢臻爲遐邇所共仰茲據布政使劉齊銜  
詳據該府縣轉據紳民呈懇具奏前來 臣查廟祀  
正神實能禦災捍患有功生民者例得請

加封號今河南府府城龍神及嵩山九龍潭龍神屢經  
祈禱雨雪應時洵爲功在斯民允宜上邀

褒寵合無仰懇

天恩均准

敕加封號以順輿情而昭靈貺爲此恭摺具陳伏乞  
皇上聖鑒訓示謹

奏

同治十三年四月二十七日





續撥新疆協餉銀兩摺

奏爲續撥新疆協餉銀兩逕交提餉委員管解起程  
數目日期恭摺具陳仰祈

聖鑒事竊查豫省應解積欠新疆協餉經臣於上年閏  
六月間飭司籌撥銀二萬五千兩發交委員楊朝  
瑜領解起程并將豫庫支絀情形

奏明在案茲復准景廉咨照並續派提督趙惠正藍  
翎把總李得山來豫迎提臣當經行司籌解據布  
政使劉齊銜詳稱豫省欠解新疆餉項原應照奉  
撥之數按月源源報解惟是庫儲久竭年來指撥

各項過多數亦過鉅雖現在徵收上忙之際而出款逾於進款顧此失彼窘迫依然第以邊餉需用孔殷不得不竭力設措茲於同治十三年丁地項下籌動銀二萬兩發交委員趙惠正等領解起程前赴察哈爾都統衙門交納轉解以濟急需等情詳請具

奏前來臣查豫省物力日絀用項日增司庫悉索一空實已不遑兼顧現雖勉力籌措而此後能否常川接濟仍當隨時察看情形惟力是視所有續撥新疆協餉銀二萬兩卽交提餉委員領解起程緣

由理合繕摺具

奏伏乞

皇上聖鑒謹

奏

同治十三年四月二十七日





查閱南陽歸德鎮各營事竣旋省趕辦秋審摺  
奏爲查閱南陽歸德兩鎮各營事竣旋省趕辦秋審  
再行出省閱伍恭摺具陳仰祈

聖鑒事竊臣欽奉

諭旨查閱營伍於三月十九日起程先閱南陽歸德兩  
鎮所屬各營並聲明閱畢旋省辦理秋審緣由業  
經

奏報在案臣出省後取道襄城南陽鄧州信陽光州  
汝甯陳州歸德各屬所有營伍及新練馬步各軍  
按次認真校閱至四月二十日始行閱竣計往返

將近四旬距本年秋審爲期已迫例限綦嚴當於二十五日旋抵省垣飭司將應勘各起解到卽行過堂事畢就近先閱駐防滿洲營暨臣標左右開封等營官兵再行出省簡閱河陝及河北各營并嚴飭各將弁趕緊訓練預備調集合操至此次閱過南陽歸德兩鎮所屬各營官兵情形容臣續閱完竣一併核實

奏陳所有查閱南陽歸德兩鎮各營事竣旋省趕辦秋審再行出省校閱緣由謹恭摺具

奏伏乞

皇上聖鑒訓示謹

奏

同治十三年四月二十六日

金每三月之考臨全三

三三



兵馬錢糧奏銷仍請分別展緩摺

奏爲兵馬錢糧奏銷勢難隨同地丁奏銷彙題撥案懇請分別展緩恭摺仰祈

聖鑒事竊照豫省兵馬錢糧奏銷向隨地丁造冊彙題自軍興以來需用浩繁庫款支絀旗綠各營兵餉不能應時支發致有積欠查歷辦地丁奏銷時未能隨同地丁造報節經

奏准展緩在案茲屆同治十二年奏銷之期據布政使劉齊銜詳稱同治六年兵餉前已發清造銷本年應將七年以後兵餉奏銷挨次接辦惟查九年

各營兵餉及七八兩年積欠甫經先後籌撥完竣而奏銷限期已迫以三年兵馬錢糧奏銷同時彙辦冊籍繁多勢難隨同地丁依限造報擬請將七八九等年兵馬錢糧奏銷展緩兩個月至六月底先儘造報至同治十十一十二等年兵餉奏銷俱俟次第籌發清楚再行挨案接辦等情請奏前來臣復查該司所詳委係實在情形除批飭照辦外所有同治七年至十二年兵馬錢糧奏銷懇請分別展緩緣由理合恭摺奏陳伏乞

皇上聖鑒訓示謹

奏

同治十三年五月初七日





起解奉省賑濟銀兩摺

奏爲起解奉省賑濟銀兩數目日期恭摺仰祈

聖鑒事竊照前准戶部咨議奏奉省旗戶被災撥款賑濟請在河南地丁項下撥銀四萬兩驛站存剩項下撥銀三萬兩於同治十三年二月十六日奉

旨依議欽此等因咨行欽遵辦理並准

盛京將軍劄委佐領保慶來豫迎提當經飭司趕緊籌解去後茲據布政使劉齊銜按察使紹誠會詳稱遵先在於本年地丁項下籌銀一萬兩驛站存剩項下籌銀一萬兩定於四月二十七日委員會

同該佐領保慶管解起程前赴

盛京戶部交納以應急需等情請

奏前來除繕給咨牌飭領起解外所有奉撥奉省賑  
濟銀兩現籌起解數目日期理合恭摺具

奏伏乞

皇上聖鑒謹

奏

同治十三年五月初七日

籌撥巴里坤哈密兩城專餉銀兩摺

奏爲籌撥巴哈兩城專餉銀兩分別發交催餉委員  
領解起程數目日期併案恭摺具陳仰祈

聖鑒事竊查豫省積欠新疆餉銀先後經部奏准於同  
治十二年三月七月間奉

旨飭撥哈密辦事大臣文麟軍營銀十萬兩署巴里坤  
領隊大臣慶壽軍營銀七萬兩等因欽此欽遵旋  
准文麟等咨照並分別委員催提此項銀兩前來  
節經行司籌解去後茲據布政使劉齊銜詳稱前  
項奉撥餉銀原應如數早爲措解無如豫省入款



有限出款頻增現雖正屆上忙而奉撥各路餉需均應及時勻解庫項委難周轉茲奉前因卽已竭力設措於庫存同治十三年丁地項下籌動銀二萬兩以一萬兩發交哈密委員都司王家瑞等解赴察哈爾都統衙門交納轉解以一萬兩發交巴里坤委員五品軍功防禦百祥等解赴綏遠城將軍衙門交納轉解均於四月十六日當堂分別支發照數領解起程等情詳請具

奏前來臣查豫省兩軍在外需餉浩繁支絀情形久荷



聖明慈鑒祇以此項專餉銀兩均係邊陲緊要之需不敢不竭力騰挪酌量籌濟所有籌撥巴里坤哈密專餉銀二萬兩分別發交催餉委員領解起程數目日期緣由理合繕摺具

奏伏乞

皇上聖鑒謹

奏

同治十三年五月初七日



籌議嵩毅兩軍先後出關需餉浩繁請

旨飭部先就正餉糧料運費按月酌加大數指省協撥

摺

奏爲嵩毅兩軍先後出關需餉浩繁實非豫省力所能給現經中外諸臣往返集議誠恐征軍迫不及待請

旨飭部先就正餉糧料運腳等項議加大數指省協撥以速軍行而作士氣恭摺仰祈

聖鑒事竊自回逆倡亂十有餘年仰賴

天威全隴一律肅清

命得勝之師出關埽蕩嵩毅兩軍先後進發仰見

宸謨廣運計出萬全臣准兩軍統領臣張曜宋慶鈔寄

陝甘督臣左宗棠片奏餉饋盈絀隱繫軍情一疏

內稱各軍協餉實數按照員弁兵勇長夫均勻攤

算計每名每年可得實銀三十餘兩除留備製造

等用別無餘贍至糧料價值轉運腳費按道里遠

近牽算計每人所食月須淨糧四十五斤馬隊一

騎日須料五斤草十二斤各軍馬步兵勇月得實

餉三兩有奇糧料價值運腳等項無出應懇

天恩飭下戶部兵部會議出關各軍應得正餉責成協



餉省分按數如期解濟此外糧料價值或責成協  
 餉省分按月搭解如協餉省分力有不及須及早  
 派鄰省協濟等語嗣經戶部覆奏以各軍每月所  
 需若干其糧料價值運費共需若干部臣無從知  
 悉請

飭左宗棠分晰聲敘復經左宗棠奏請

飭部會議各在案此後有無定議臣與嵩毅兩軍相距  
 較遠無從詢悉惟疊據該統領等函稱張曜已於  
 二月移營安西州境三道溝俟安西之糧稍有積  
 儲再滾運馬蓮井子馬蓮雖有水草並無房屋現

在燉煌採辦木植往蓋倉廩宋慶駐紮甯夏整頓  
兵勇秋後亦卽繼進現赴張家口購覓駱駝每一  
駝到營至少需三十餘金以一千五百頭合算需  
銀四萬餘兩此外製造亦需萬金以後駱駝喂養  
駝夫工食月需七千餘金該統領等均以需餉浩  
繁斷非豫省力所能給而中外集議如何未奉明  
示軍行萬里饋餉儻有不繼譁潰堪虞萬分焦灼  
查嵩毅兩軍餉由豫出臣忝膺疆寄竟不能源源  
接濟以裕軍儲清夜捫心實深惶愧惟豫省進款  
止於丁地頻年入不敷出情形屢經翮縷上陳久

在

聖明洞鑒更無須臣之曉瀆蓋卽左宗棠所謂協餉省  
分力有未及須早派鄰省協濟者也至各軍正餉  
應加若干糧料價值運費應解若干左宗棠旣未  
核定部中又無從懸揣千里餽糧士有飢色貔貅  
之士馳驅荒徼之外設使兵連禍結而餉項尚無  
定章其變患何堪設想以臣之愚竊謂部臣疆吏  
非不欲明定餉數而其數實有難以遽定卽定而  
仍不能一定不移者敢爲我

皇上敬陳之以糧運言一切攤算每糧百斤需銀十一



兩七錢內外除去折耗祇敷兩人一月之食是每  
勇需糧銀五六兩各軍兵勇每名月得實銀三兩  
有奇則再加三兩可矣然此由涼州運至安西若  
再滾運哈密則其價又不止此此外一切運費便  
可由此而推故曰難以遽定卽定而仍不能一定  
者也至於哈密開屯沿途廩座以及護運經理之  
員弁夫役鑼鍋什物之製造軍裝軍餉軍火之由  
豫而陝而甘而哈密騾馱車載之運腳其煩費又  
非可以預籌而數計臣愚以爲與其往返咨商曠  
日持久不如



鴻施自上使士卒感浩蕩之

恩而疆場收飽騰之效查嵩武毅字兩軍每月餉銀約計各四萬餘兩請

旨敕部按照此數每月各加一倍指結實可靠省分均勻派撥按期解赴西征糧臺由臺轉發一面咨照豫省以憑稽核該統領等得此鉅款正餉如何增加糧料價值運腳如何應付按半年咨報左宗棠一次則餉之贏絀便可清澈贏則將指撥之數酌減絀則應增多少亦可按冊而稽再爲申請該統領等受

恩深重當度支支紬之時我

皇上不拘成格立沛

殊恩鼓舞奮興士氣百倍勒銘天山之石洗兵瀚海之

波飲至

靈臺

受釐宣室四海同躋

仁壽將橐矢戢戈而不用矣臣愚昧之見是否有當謹

恭摺具

奏伏乞

皇上聖鑒訓示謹

奏

同治十三年五月初七日

金海言心易學卷三

三



豫省庫儲入不敷出請將奉撥各路協餉暫予停

緩片

再豫省每年入款止於丁耗及房襍各稅銀二百萬餘兩出款則嵩毅兩軍並本省防練各軍月餉每月十一萬餘兩河工撥款五十餘萬兩旗綠河各營兵餉及各官養廉一應雜支暨奉派撥解京協各餉歲需四百餘萬兩不敷過半年餘以來戶部奏撥京協各餉駱驛不絕司庫顧此失彼實已無法可施現值嵩毅兩軍奉

命出關臣受

恩深重不能荷戈絕塞以效馳驅兩軍月餉之供何敢  
不竭盡心力查兩軍月餉臣到任後稔知道路遼  
遠餉運難以尅期故提前兩月由豫起解現在嵩  
武軍之能以出關毅軍之得以整頓皆賴此提前  
月餉藉資周轉現准張曜函稱隴境一交夏令泥  
淖難行月餉更需提前兩月又稱帳房四個月卽  
須更換兩軍共一千五六百架歲需帳房五千架  
需銀六七萬兩洋槍每歲一換兩軍共計五千桿  
採辦需銀三萬金子藥等項所費尤繁如此卽兩  
軍加餉有鄰省可撥而豫省每年所增已不下二

十餘萬三空四盡之時此款何從籌畫伏查豫省奉撥各路協餉數目甚夥而統核歷年實解之數不過十餘萬兩在各路杯水車薪毫無裨益在豫省補瘡剜肉倍極艱難且慮羅掘之俱窮不免叅糾之立至焦思無措惴惕彌深可否仰懇

天恩敕部將豫省協餉暫予停緩以爲嵩毅兩軍製造雜款之需則出關將士愈思自奮而邊塵可以永靖矣是否有當謹附片具陳伏乞

聖鑒訓示謹

奏

同治十三年五月初七日



籌撥黑龍江官兵整裝銀兩片

再查前准戶部咨奏撥黑龍江調赴奉省官兵應需整裝銀二千三百四十七兩五錢九分八釐卽在河南實存清查銀內照數撥解

盛京戶部交納於同治十二年十二月十四日奉

旨依議欽此等因咨行飭司遵照在案茲據布政使劉齊銜詳稱遵將前項整裝銀兩照數籌措查有委員管解奉省賑濟等項銀兩之便應卽飭委搭解定於四月二十七日起程前赴

盛京戶部交納等情請

奏前來除發給咨牌飭領管解外所有奉撥黑龍江  
官兵整裝銀兩照款籌撥搭解銀數日期相應附  
片具陳伏乞

聖鑒謹

奏

同治十三年五月初七日

籌解黑龍江賑濟銀兩片

再接准戶部咨議奏黑龍江所屬被災戶口應行接濟擬在河南地丁項下撥銀二萬兩俾資應用於同治十三年三月十六日奉

旨依議欽此等因咨行遵照當經飭司趕緊籌辦去後茲據布政使劉齊銜遵先在於本年地丁項下籌銀五千兩定於四月二十七日委員管解起程前赴

盛京戶部交納具詳請

奏前來除發給咨牌飭領起解外所有報解奉撥黑

龍江接濟銀數日期理合附片

奏陳伏乞

聖鑒謹

奏

同治十三年五月初七日



勘明虞城縣風雹情形暨申檀寺等村莊成災分  
數懇

恩蠲緩措

奏爲勘明虞城縣地方猝遭風雹情形暨申檀寺等  
村莊成災分數籲懇

恩施照例蠲緩錢糧以紓民力恭摺仰祈

聖鑒事竊照虞城縣地方於本年四月初九日戌刻暴  
風冰雹一時俱至城關民居草房多被揭去廟宇  
城牆瓦房間有塌損傷斃人口各村田廬麥禾亦  
被打毀由該府縣稟報到臣當卽飭司委員馳往

會同地方官逐加確勘被災情形較重災民應否  
調劑據實詳辦去後茲據歸德府督同印委各員  
勘明該縣廟宇城牆以及城內外民房廬舍現已  
漸次修整傷斃男婦九名由縣捐資殮埋凡被災  
人民均赴附近各鄉村傭趁足資糊口近日得有  
雨澤堪以補種穀豆體察輿情毋庸貸給口糧籽  
種惟申檀寺等一百九十七村莊二麥棉花盡被  
毀壞情形較重成災八分所有應徵錢糧力難完  
納據布政使劉齊銜糧鹽道段廣瀛轉據該管道  
府議請將被災較重處所錢糧照例分別蠲緩具

詳請

奏前來 臣查例載民田被災八分者蠲正賦十分之四等語今虞城縣猝遭風雹災民各自謀食並不賑貸口糧籽種其申檀寺等一百九十七村莊成災八分相應仰懇

天恩俯准將該村莊應徵本年錢糧照例蠲免十分之四蠲剩錢糧緩至同治十四年秋後分年帶徵其原緩及民欠未完同治七八九十一十二等年丁耗漕項裁扣河夫船料等項均展緩至同治十五年秋後按最近年分每年帶徵一年以紓民力



除催造村莊頃畝清冊照例具

題並飭將未被災村莊錢糧照常徵收外所有勘明  
虞城縣猝遭風雹情形並各村莊成災分數議請  
蠲緩錢糧緣由理合恭摺陳

奏伏乞

皇上聖鑒訓示謹

奏

同治十三年五月二十四日



請以卽補都司訥勤補襄城營都司摺

奏爲揀員請補都司員缺以實營伍恭摺仰祈

聖鑒事竊照南陽鎮屬襄城營都司郭仁病故出缺前

經臣恭疏

題報並聲明所遺員缺扣留外補在案查定例陸路  
武職各官奉

旨以應升之缺卽行升用並遇缺卽補儘先升用者遇  
有該省題推缺出卽行題補又部定章程儘先各  
官均按奉

旨先後挨次補用如實在不得其人或員缺緊要准將

名次在後之員聲明請補各等語襄城營都司一缺係屬推缺地當孔道訓練操防最關緊要非精明諳練之員不足以資治理臣於在標候補儘先都司中逐加遴選名次在前之羅斌元一員於此缺地方情形尚欠熟悉未便遷就貽誤惟查有遊擊用遇缺卽補都司訥勤樸誠練達曉暢戎機前曾署理該營印務措置裕如以之請補斯缺洵堪勝任該員係揀發都司積功保舉遇缺卽補向與儘先人員歸入一班統按奉

旨先後挨次補用雖名次居二與例稍有未符第人地

實在相需例得專摺奏請合無仰懇

天恩俯准將遊擊用遇缺卽補都司訥勤補授襄城營  
都司以裨營伍而重地方除飭取履歷送部外理  
合恭摺具

奏伏乞

皇上聖鑒訓示謹

奏

同治十三年五月二十四日





拏獲在逃匪首梁文秀照案定擬正法摺

奏爲拏獲在逃匪首提審堅不承招照案定擬正法

恭摺仰祈

聖鑒事案准河北鎮臣崔廷桂拏獲登封縣越城入署

放火搜劫殺死多命案內首犯梁文秀咨解到省

臣查此案前據河南府知府陳肇鏞等稟報經前

撫臣吳昌壽附片具奏奉

旨知道了著嚴飭陳肇鏞等緝拏梁文秀務獲仍一面  
訊取現獲各犯確供並查明起衅根由分別懲辦毋  
稍粉飾欽此欽遵飭據陳肇鏞等查明梁文秀素行

無賴交結匪徒怙惡滋事該縣訪聞嚴拏該匪扶  
恨起意殺官糾眾入署放火劫殺屬實並無另有  
起衅重情研訊先後拏獲從犯李三沅等供亦吻  
合均經就地正法在案當將梁文秀發司轉發開  
封府審辦去後茲據藩司劉齊銜臬司紹誠詳稱  
據開封府知府英瑞會同候補知府李在銛賈敦  
恮張師劬候補同知臧政倬提犯研訊緣梁文秀  
籍隸登封縣素行無賴交結匪徒因案被責後仍  
復怙惡滋事經該前縣周起俊訪聞嚴拏梁文秀  
被拏挾恨起意戕官向前獲正法之李三沅梁濬

梁沅梁學導卽梁榜馬慎卽馬汝慎趙小得楊汰  
來鄭結士楊水牛李遂林葛添才卽葛建才梁倫  
閻璽梁汶洸喬西滌並在逃之梁六合梁得心梁  
得意梁鐵塔楊法等二十人告知情由邀允幫助  
又恐人少誘脅不知姓名二十餘人入夥同治四  
年十二月十五日夜持械徒手不等四更時分齊  
抵縣城潛從缺口爬越入城同至縣署留不知姓  
名數人在外把風其餘均由馬號牆缺進署喊嚷  
殺人放火焚燒二堂東西廂房花廳各屋周起俊  
因先期下鄉相驗未回其子周箴及在署親友丁



役人等聞鬧出捕梁文秀誤認爲官上前砍殺李  
三沅等亦各隨同逞兇將周籥並家丁吳效朱士  
銓金顯榮龐振德等五人亂砍殞命並砍傷官親  
周籥周兆瀛幕友魯思堂等三人乘機搜劫銀物  
經該縣典史朱立勛會營往拏梁文秀等當各逃  
逸追捕無獲朱立勛回署撲滅餘燼查明如意庫  
倉庫監獄完固無失稟經河南府陳肇鏞移營督  
帶兵勇馳詣勘驗捕獲從犯李三沅等訊明正法  
而梁文秀逃後潛赴各處山僻求乞避匿並無定  
址十三年三月二十八日欲往山西躲避行至河



丙縣境卽被拏獲解省飭發審辦據供前情不諱  
嚴詰委無謀爲不軌重情逃後亦無另犯不法擬  
議解勘到司提訊該犯稱名梁文秀屬實餘供堅  
不吐實顯因前獲從犯李三沅等已決無證圖稽  
顯戮有意狡延旣據該府審訊明確應請據詳定  
讞等情詳解前來臣親提研審該犯仍不承招臣  
查梁文秀素行無賴交結匪徒怙惡滋事因該前  
縣周起俊訪聞嚴拏輒敢起意戕官糾同李三沅  
等四十餘人焚燒縣署殺死周起俊之子周籥等  
五命砍傷周籥等三人雖所殺並非本官亦無謀

金海月公考卷之三  
口  
爲不軌重情實屬兇殘已極法不容誅該犯首惡  
罪狀經前撫臣委員查訊不特先後拏獲各犯眾  
供僉同卽附近軍民亦皆指證甚確毫無疑竇前  
因在逃未獲漏網多年今若因其解勘無供仍照  
尋常疑似案件駁飭覆審遂其苟延殘喘之計何  
以彰

國憲而快人心查驗該犯年貌核與前撫臣飭緝原  
案相符且經河北鎮臣飭傳素識之人識認確鑿  
正犯無疑自應卽照眾證明白照依原招論決之  
律據詳定擬梁文秀除放火故燒官房搜劫財物

誤殺多命罪均斬決斬梟從一科斷外合依刁民聚眾四五十人闖堂塞署逞兇毆官爲首斬決梟示照例擬斬立決梟示照例於定案後恭請

王命札飭臬司紹誠臣標中軍叅將穆特布將該犯梁文秀綁赴市曹處斬訖傳首犯事地方懸竿梟示以昭炯戒前獲之李三沅梁禧梁沅梁學導馬慎趙小得楊汰來鄭結士楊水牛李遂林葛添才梁偷閻璽梁汶洸喬西滌等十五名聽糾入夥隨同焚署殺人均屬同惡相濟罪干斬決業於拏獲後訊明就地正法應毋庸議逸犯梁六合等飭緝獲



金海言卷之三  
日另結此案首先拏獲斬梟要犯一名應敘職名  
係副將銜升用遊擊儘先都司吳名揚協獲應敘  
職名係左營遊擊文福遊擊銜都司龔從岱相應  
一併開報除咨部外理合恭摺具

奏伏乞

皇上聖鑒敕部查照施行謹

奏

同治十三年六月初四日



各屬捐辦兵勇棉衣循案請獎並現飭停止摺  
奏爲查明同治十一年分各屬捐辦兵勇棉衣數目  
循案請獎並現飭停止捐解緣由恭摺仰祈

聖鑒事竊查豫省自軍興以來征兵防勇歲需棉衣迭  
經飭屬捐辦各州縣踴躍急公照章捐辦者奏請  
給獎所有同治十年以前捐辦各員均經

奏准給獎在案查刻下豫軍出關遠征餉饋運費一  
切爲數甚鉅均須通盤另籌辦理其中棉衣一項  
需用繁多有非各州縣勉力捐繳所能濟事杯水  
車薪徒滋擾累自應飭令停捐另行籌辦除同治

金海... 卷五  
三  
十一年分派捐棉衣未經解到者悉予停止無須  
再捐外其已經捐解銀兩應仍循案核獎據管理  
軍需局司道具詳前來除將各官銜名開單咨部  
查核外合無仰懇

天恩俯准敕部按照歷次成案核議給獎出自  
鴻施爲此恭摺具

奏伏乞

皇上聖鑒訓示謹

奏

同治十三年六月初四日

裁撤豫銳營防勇片

再豫省閩鄉一帶地接潼關前因甘省回氛未靖曾飭提督李承先統帶豫銳四營勇丁駐防該處各隘口彈壓梭巡頗資得力近因肅州克復關隴肅清豫邊防務已鬆當此庫藏極絀之時自應裁撤以節帑項查該勇等均籍隸安徽亳州一帶當卽檄令該提督妥爲遣撤所有軍械悉令呈繳並酌給川資由原帶各官管帶回籍茲據呈報該勇等業已陸續到籍分別遣散一律安靖所有裁撤防勇緣由理合附片具陳伏乞

聖鑒訓示謹

奏

同治十三年六月初四日



豫省十二年新漕仍請辦理折色摺

奏爲豫省連歲災歉糧缺價昂本年新漕勢難徵運  
本色懇請仍照歷屆成案折銀解部以顧京倉並  
藉接濟餉需恭摺仰祈

聖鑒事竊照前准部咨豫省同治十二年漕糧准再辦  
折色一年此後徵運本色以復舊制並令於漕糧  
開徵後將應解銀兩埽數委解等因遵已先後解  
過銀十五萬兩現復籌銀五萬兩飭委管解在案  
茲屆十三年新漕啟徵之期自當遵照部議徵兌  
本色以副京倉支放何敢率請折徵惟臣與該管

司道體察閩省情形仍有萬難辦運本色之勢緣豫省兵燹之後連歲災歉戶鮮蓋藏本年雨澤愆期麥收又止中稔加以鄰省被水成災各處賑濟之糧多由豫省購辦是以米糧愈缺價值愈昂若再責令各州縣起運本色不特十數萬石之糧驟難辦解更恐民食益形缺乏且楚旺久未辦運事同創始一切籌備維艱兼之豫省庫儲入不敷出艱窘年甚一年所有西征餉需河工用款以及各路專協俸餉均屬刻不容緩上忙以後進項寥寥遇有支解無可籌撥之時尤不得不借漕折以資

周轉上年於奏請折漕案內酌定解部銀二十萬兩原係統籌全局兼顧京倉再四籌思惟有將本年應徵漕糧仍請援案折銀解部方有把握而無窒礙據布政使劉齊銜糧鹽道段廣瀛會詳呈請具

奏前來合無籲懇

天恩俯准將豫省十三年新漕仍照歷屆成案折銀解部庶於京精無誤而本省餉需亦可藉以接濟至各州縣折解銀數仍請照上屆奏案杞縣等三十三州縣每石折解銀三兩除二兩解部外以八錢



金每百斤之多少  
二  
充本省軍餉二錢爲公費祥符等十四州縣每石  
折解銀二兩八錢除二兩解部外以六錢充軍餉  
二錢爲公費內黃等六縣係屬著名苦缺每石折  
解銀二兩以示體卹除俟明年察看情形能否徵  
運本色另行核辦外所有本年新漕仍請辦理折  
色緣由理合恭摺具

奏伏乞

皇上聖鑒謹

奏

同治十三年七月十三日



籌解西甯豫師軍營專餉片

再豫省奉撥西甯辦事大臣豫師軍營專餉經臣隨時飭司籌撥計先後撥解及抵兌共解過銀十五萬四百八十兩疊經

奏明在案茲復由臣飭司在於同治十三年丁地項下籌動銀一萬兩於七月初三日當堂支發查有糧臺委員候補知縣汪正已管解嵩毅兩軍餉銀赴陝之便即將西甯餉銀發交該員照數領解起程前赴陝西省城西甯轉運局交收轉解應用以濟要需據藩司劉齊銜具詳請

金每三月之考功卷之

三

奏前來臣覆核無異除仍飭令源源籌解外所有撥  
解西甯軍餉數目日期理合附片具陳伏乞

聖鑒謹

奏

同治十三年七月十三日

河陝汝道員缺遵章以候補道尹耕雲酌補摺  
奏爲河陝汝道員缺遵照例章按班酌補以資治理  
恭摺仰祈

聖鑒事竊照河陝汝道廣隆於同治十三年六月十九  
日在任病故所遺係衝繁部選中缺例應以病故  
本日爲開缺日期歸於六月分截缺以豫省有應  
補人員經臣奏明扣留外補在案查定例各省道  
府如係奉

旨命往或督撫題明留於該省候補者均無論應題應  
調應選之缺令該督撫酌量才具擇其人地相宜

者悉准先儘補用又補足八成實銀新章內開道府以至未入流輪補班次先用新班遇缺先三人次用新班遇缺一人再用各項輪用班次一人以五缺爲一週又奏定章程嗣後道府同知直隸州通判知州遇輪補病故休選缺先儘候補班前酌補一人次將候補正班酌補一人各等因通行遵照查豫省道員一項上次糧儲鹽法道缺出已酌補候補班前補用道段廣瀛一人今河陝汝道一缺按章應用新班遇缺先人員查新班遇缺先新班遇缺現均無人按各項輪用班次輪應候補正



班到班該道雖係中缺第爲豫省西路門戶時須  
籌備邊防且兵差駱驛督屬轉運供支在在均關  
緊要應卽按班揀員酌補查有候補班補用道尹  
耕雲現年六十一歲江蘇進士奉

旨以主事籤分禮部升任員外郎郎中掌儀制祠祭精膳  
各司印務考授御史掌湖廣道監察御史戊午科  
順天鄉試內簾監試因案降調奉

旨回籍辦理團練由前河南團練大臣毛昶熙調赴軍營  
出力保奏奉

旨以知府留於河南歸候補班補用經前撫臣派辦行營

文案並總理營務於同治二年攻克張岡案內保  
奏奉

旨以道員存記遇有河南道員缺出請旨簡放賞戴花  
翎欽此經前撫臣吳昌壽奏明甄別堪勝道員之任  
請無論應題應調應選缺出扣留請補奉

旨吏部知道欽此五年以疊次剿匪出力保奏

賞加按察使銜六年署理糧儲鹽法道印務仍帶印出  
省辦理營務事宜八年十一月交卸署糧儲鹽法  
道印務以在營日久奏請加布政使銜並給予隨  
帶軍功三級奉

旨依議欽此遵例請咨赴部於九年四月十二日引

見領照回省該員器識閑通辦事穩練前曾委署河陝  
汝道情形熟悉以之酌補洵堪勝任與例章亦屬  
相符據藩臬兩司會詳前來相應奏懇

天恩准將河陝汝道員缺卽以候補道尹耕雲補授俾  
資治理如蒙

俞允該員係候補班補用道員請補道缺銜缺相當毋  
庸送部引

見亦毋庸查開叅罰爲此恭摺奏陳伏乞

皇上聖鑒訓示謹

奏

同治十三年七月二十九日



陳報出省查閱河北河陝各營起程日期片

再臣恭奉

諭旨查閱營伍當將先閱南陽歸德兩鎮所轄各營事竣於四月二十五日旋省辦理秋審各緣由均經奏報在案臣旋省後即將秋審應勘各起過堂事畢先將省城滿洲營官兵調場簡閱次及臣標左右暨開封等營並各隊練軍分別閱竣當於八月初三日起程出省查閱河北鎮標各營及西路河陝各營所有署中日行公事仍委藩司代拆代行遇有緊要事件包封送至行次親自核辦臬司解審

命盜案件並委藩司代爲提勘由臣覆核具  
題免致延擱所有出省查閱河北河陝各營日期理  
合附片具陳伏乞

聖鑒謹

奏

同治十三年七月二十九日

飛蝗過境嚴飭搜捕遺孽及地方先旱後澇情形

摺

奏爲飛蝗過境嚴飭搜捕遺孽及地方先旱後澇情形恭摺具陳仰祈

聖鑒事竊查豫省本年自春徂夏雨澤無多地土稍形乾旱誠恐水塘涸竭之處或起蝗蝻經臣飭屬督率農民隨時察看勤加搜捕旋據結報俱無萌動之處茲於七月初間據歸德府屬之夏邑商邱永城鹿邑虞城柘城及衛輝府屬之汲縣新鄉獲嘉輝縣滑縣等十一縣先後稟報飛蝗過境有過而

不留者有隨時捕滅者或田禾未傷或間有損食  
並據各州縣陸續稟報初夏以前雨少晴多四月  
以後又經連番大雨地多積水先旱後澇收成不  
無歉薄等情臣查飛蝗遺孽爲害最烈雖據聲稱  
集夫撲捕並重價收買自數千觔至六七萬觔不  
等難保無蝻子遺留疊經飭司遴委明幹之員分  
往被蝗各縣會同地方文武上緊搜捕一面設廠  
收買總期盡絕蝻生勿留餘孽如有撲捕不力貽  
害農田卽由臣據實揭叅並飭司委員查勘秋禾  
被水情形是否不致成災應否量加調劑查明另



行辦理外所有飛蝗過境嚴飭搜捕遺孽及地方  
先早後澇緣由理合繕摺具陳伏乞

皇上聖鑒謹

奏

同治十三年八月初十日

金海三身公考西卷一

九

遵

旨籌議匪盜就地正法章程體察情形尚難改歸舊制

摺

奏爲遵

旨敕議辦理匪徒並強劫盜案就地正法章程現在體  
察地方情形尚難改歸舊制恭摺奏祈

聖鑒事竊准刑部咨議覆御史鄧慶麟片奏軍務肅清  
省分拏獲匪盜請照舊例由該管上司覆核辦理  
一摺能否改歸舊制或稍爲酌量變通請飭各省  
體察情形妥議具奏由部彙核辦理等因奉

旨依議欽此咨行到豫飭據按察使紹誠議詳前來臣  
查同治八年間原任大學士直隸總督曾國藩奏  
請將各匪餘逆擾害鄉里以及騎馬持械倚強肆  
掠並游勇聚黨夥劫者仍照奏定章程辦理欽奉  
上諭山東河南與直隸壤地相連情形相近著各該撫  
一體辦理欽此欽遵在案是豫省民情強悍時虞伏  
莽潛滋久在

聖明洞鑒頻年以來認真緝拏稍知斂跡臣到任後迭  
經嚴飭各屬整頓捕務並分撥練軍協同躡訪漏  
網餘匪及著名兇暴各犯屢有弋獲閭閻藉以稍



安然南汝光三屬久被捻氛習染強橫間有逃捻  
降眾難保不暗圖煽動歸陳一帶毗連蒙亳亦復  
如之近則河陝爲西來要衝游勇乘機劫奪所在  
皆有且西南等處山徑叢雜之區刀匪根株恐未  
盡絕至於明火糾搶拒傷事主情形尤屬獷悍者  
亦較之尋常盜案迥不相同臣愚以爲人命固當  
慎重而懲一儆百此中正保全不少況除莠所以  
安良其計出於一時之權宜其效見於一方之綏  
靖若遽改歸舊制誠如部臣所慮長途解勘久稽  
顯戮轉恐別滋事端辦理未免窒礙擬請嗣後如

有拏獲各匪餘逆以及滋事游勇並騎馬明火糾搶拒捕之犯仍准於獲訊後錄供通稟聽候核飭該管道府覆審明確恪遵前奉

諭旨就地正法以昭炯戒庶兇頑之徒得以觸目警心而免其照例解勘亦不致中途疏脫幸逃法網此外尋常命盜一切案犯均照向章分別解勘以符定制總期立法因時無枉無縱以仰副

聖主明慎用刑之至意謹繕摺覆

奏伏乞

皇上敕部核辦施行謹

奏

同治十三年九月十七日

奏文精以卷卷深丁

三

111





審明汜水縣刁徒夏振青等挾制官吏分別按律  
定擬摺

奏爲審明刁徒挾制官吏按律定擬恭摺仰祈

聖鑒事竊查汜水縣鄉民因聞糧票索費糾眾兇鬧一

案前據該署知縣高錫康稟府轉稟經臣批司將

高錫康先行撤任一面委員查辦提省確審奏奉

硃批知道了欽此欽遵行司飭據委員候補知府李應

莘等查明起衅根由並緝獲王廷烈等各犯提同

櫃書卷宗解省飭發開封府審辦去後茲據開封

府知府英瑞督同候補知縣姚善寶審明擬議解

由藩司劉齊銜臬司紹誠覆審解勘前來臣因閱  
伍公出飭委藩司劉齊銜代審無異臣覆加確核  
緣已革文生王廷烈韓沅善已革監生宋得新與  
民人夏亮中卽夏西山夏振青卽夏毛娃韓晚茂  
均籍隸汜水縣王廷烈向充木樓寨村寨首韓沅  
善等係各村首事幫辦同治十三年二月初十日  
該縣高錫康開徵新賦櫃書王德蕓因紙筆公費  
賠累起意完糧串票每張向花戶索加票錢二文  
藉資津貼與櫃書李景昌李永祥等甫經私議尚  
未舉行經高錫康查知將王德蕓責押正在出示

諭禁而木樓寨等村鄉民聽聞前情不知官已查禁紛紛傳播眾論不服宋得新夏亮中夏振青韓晚茂及在逃之夏生一張滴溜各自起意到官挾制求免卽於是月十五日同王廷烈韓沅善商議王廷烈等亦圖藉此要挾見好鄉里聲言此事必須有人進城先尋櫃書吵鬧如其不允稟官硬求方可免加宋得新等意見相同均以爲然約定夏振青韓晚茂張滴溜三人先行入城照議試行宋得新夏亮中夏生一與王廷烈韓沅善等在家聽信如事不成再行出頭十六日早夏振青韓晚茂



張滴溜均各入城該縣衙署前因被水沖塌向賃  
山上民房作爲公廨糧櫃亦在廨外附近設立夏  
振青等卽至糧房向櫃書理論吵鬧不由分說打  
毀門窗聲言稟官作主適有各村鄉民宋文秀宋  
行鄧得昌劉振業任拐任景張致和張聚才禹保  
馬毛旦卽馬保及不知姓名十餘人不謀而合同  
時入城至彼亦各隨同附和高錫康聞知會督營  
弁典史前往開導夏振青等仍復咆哮挾制維時  
在旁觀看之人愈聚愈眾擁擠嘈雜一時解散不  
及詎有素行無賴之王小酉卽王小有混入稠人



中乘機喧鬧手執刀械同不知姓名十數人猝然擁入該縣公廨毀壞官用車轎又至後宅勢將搶掠丁役人等見其來勢兇惡上前攔阻王小酉持刀抗拒砍傷丁役王升劉升李明李安四人王升等亦各持械抵禦登時格傷數人惟王小酉傷重倒地殞命因人多手雜不知何人格傷何處餘眾始各紛紛逃逸夏振青韓晚茂張滴溜與宋文秀等不知王小酉因何滋事倉猝驚疑在外探問並未隨行嗣見眾人逃出丁役追捕亦卽一同奔逃出城回向王廷烈等告知情由各自逃散該縣事

後查明倉庫監獄無失稟府委驗轉稟經臣恭摺  
奏明撤任提省飭發審辦茲據開封府等審明前情  
詰無起衅別故擬議由司覆審解勘到臣因閱伍  
公出飭委藩司代審無異查例載刁徒直入衙門  
挾制官吏追究主使一體問罪俱發近邊充軍又  
律載違

制杖一百又不應爲而爲事理輕者笞四十各等語  
此案夏振青韓晚茂與王廷烈等因聽聞櫃書私  
加票錢眾情不服並不查明官已查禁亦不具呈  
控究輒敢糾約到官要求先向櫃書爭鬧打毀科

房門窗迨經官爲開導又復咆哮挾制雖王小酉等臨時率眾滋鬧逞兇該犯等並未同行亦非意料所及第於此案或身後主使或出頭嘗試居心實屬刁玩均係各自起意並無首從可分自應一律照例問擬夏振青卽夏毛娃韓晚茂王廷烈韓沅善宋得新夏亮中卽夏西山均應照刁徒直入衙門挾制官吏追究主使一體問罪俱發近邊充軍例擬發近邊充軍至配杖一百折責安置王廷烈等衣頂均已咨革應毋庸議宋得新據供親老丁單係刁徒滋事應不准其查辦留養櫃書王德



蕤商同李景昌等私議向花戶索加票錢雖未舉行究屬藐法王德蕤李景昌李永祥各照違

制杖一百律擬杖一百酌加枷號兩個月飭縣分別枷滿折責革役地保王順興韓思敬宋景福於夏振青等糾約滋事失於查察各照不應輕笞四十二律擬笞四十折責革役王小酉卽王小有因夏振青等向櫃書爭鬧觀看人眾輒敢乘機率眾直入官廨毀壞官物持刀抗拒砍傷丁役罪犯應死業已被格身死應與登時格殺持械拒捕罪人律得勿論之丁役王升等均毋庸議王升等傷均平復



亦毋庸議案已訊明未到免其提質逸犯夏生一  
等飭緝獲日另結該縣應徵糧賦照常徵收民情  
安貼仍飭隨時認真稽察不准再有藉端加派情  
事前署知縣高錫康查無徇縱苛派激釀事端別  
情惟糧書私議加收票錢雖經查出禁止究未能  
先事覺察相應聲請交部議處除供招咨部外所  
有審擬緣由理合恭摺具

奏伏乞

皇上聖鑒敕部核覆施行謹

奏

金海月夜多西老

下

同治十三年九月十七日

山東樂陵縣知縣張熙瑞前在河南邾縣任內倡捐草料請予獎勵片

再現任同知銜山東樂陵縣知縣張熙瑞前於同治二年在河南邾縣任內正值捻匪竄擾南汝一帶隆冬大雪各營需用芻茭購辦維艱張熙瑞目覩情形首先倡捐草料各十萬斤解送大營應用經前撫臣張之萬批准彙案從優請獎在案嗣於同治十二年准山東撫臣丁寶楨咨據樂陵縣知縣張熙瑞稟所有前捐邾縣任內草料請給予花翎並移獎該員胞兄都司銜武生張起亭藍翎等

金華書局影印  
情咨照到 臣當經行局查核茲據管理軍需局司  
道詳稱張熙瑞所捐草料估計銀數核與定章捐  
請花翎藍翎有贏無絀應請照准給獎等情前來  
臣覆核無異相應仰懇

天恩俯准將同知銜山東樂陵縣知縣張熙瑞給予花  
翎都司銜武生張起亭給予藍翎以昭激勸除將  
履歷清冊咨部外理合附片具陳伏乞

聖鑒訓示謹

奏

同治十三年九月十七日



請銷去前南陽縣知縣李瀛察看字樣片

再南陽縣知縣李瀛前在任內經前撫臣以人欠

誠實經理驛站事務多未妥協

奏請開缺留省察看於同治六年六月初六日奉

上諭李瀛著開缺留省察看等因欽此欽遵在案茲查

李瀛前在南陽地處衝途彼時兵差絡繹每有營

中初次傳牌開由某處行走後又取道別處以期

迅速者李瀛據以具稟往往前後未能照合前撫

臣怪其呈報兩歧近於虛假故以人欠誠實奏請

開缺此外別無劣蹟其經理未盡妥協之處實緣

該驛送往迎來夫馬一時難以周轉別無貽誤驛務迨被叅調省後旋丁母憂所有任內經手錢糧交代事件一切清楚請咨回籍現以服滿起復到省試以差委尚屬認真辦事亦頗結實是該員自被叅之後深知愧奮力矯前非仍堪錄用據藩臬兩司查明會詳前來相應

奏明請將前叅李瀛察看字樣銷除仍以知縣留省遇有相當缺出酌量另補以昭激勸爲此附片具陳伏乞

聖鑒訓示謹

奏

同治十三年九月十七日





請裁撤河北等處釐局片

再前因豫省釐源不旺節經轉行該管司道訪察  
實情擬將河北釐務酌加整頓擇於衛輝府汲縣  
城外設立釐局一處河內縣之清化鎮滑縣之道  
口各設分局遴委妥員前往會同地方官試行辦  
理並聲明俟抽收踴躍別無弊端再行定議所有  
試辦緣由於上年二月附

奏在案旋於本年春間察看情形業經試辦一年釐  
務未見起色查知河水乾旺無常各項商貨未能  
源源而至釐收有限無濟餉需應將河北局卡一

概裁撤所有清化分局釐務仍改包釐歸河內縣  
辦理其河武溫孟四縣原有藥材板釐仍照減成  
數目歸各該縣抽收批解以復舊章據管理釐稅  
局司道具詳前來臣查河北釐務設局試辦本爲  
餉需起見茲既一年之久並無起色無濟餉需自  
應卽爲裁撤以免擾累除批飭遵照外理合附片  
具陳伏乞

聖鑒謹

奏

同治十三年九月十七日

遵

旨查閱通省營伍情形摺

奏爲遵

旨查閱通省營伍情形恭摺奏

聞仰祈

聖鑒事竊 臣接准兵部咨同治十三年二月十八日內

閣奉

上諭本年輪應查閱山東河南江蘇安徽江西五省營伍之期河南卽派錢鼎銘逐一查閱認真簡校等因欽此 臣伏查豫省自軍興以來徵調頻仍校閱之

典久未舉行同治九年升任撫臣李鶴年任內輪應閱伍之期始得循例舉辦然僅校閱省城旗綠暨河北河陝各營其南陽歸德兩鎮官兵彼時以調防在外聲明俟陝甘軍務稍鬆豫邊無警再行補閱臣到任後幸值各路肅清因念安不忘危乘此平靖之時亟應講求武備疊次函商各鎮札飭城守尉暨臣標叅游等官令其認真訓練以期日有起色茲奉

諭派簡閱營伍查歸德一鎮係咸豐年間添設未經蒐閱而南陽一鎮管轄最多上屆既未閱視此次宜



先考覈當於三月十九日出省先赴南陽次及歸德將兩鎮所轄各營周厯查看校畢旋省趕辦秋審事竣卽將駐防滿洲營並臣標左右開封等營就近閱訖復於八月初三日由省前赴河北及西路河陝各營次第簡校所有起程日期均經先後奏報在案查閱完竣於八月二十六日回省統計所閱各營馬步官兵悉皆精壯足額並無老弱充數合操陣式步伐進止均屬整齊施放鎗礮聲勢聯絡長矛刀牌亦俱便捷弓用六力至十力不等步箭鳥槍中靶分數堪列一二等者居多擡礮中靶

均在二三之數臣悉心比較各營兵技以滿營駐防官兵及東左東右北左等營爲最優臣標左右開封三營及南左南右北右衛輝襄城鄧新考城等營次之陳州信陽光州彰德河南永城荆關陝州汝甯等營又次之查驗軍裝器械並無短缺馬匹亦皆臙壯各兵有技藝出羣者當場獎賞記名拔補技藝生疏者分別責懲各屬民壯隨營調閱所習刀矛尚能如法至各營將領備弁臣詳加考驗人材魁偉弓馬純熟者頗不乏人惟查有汝甯營叅將柏英辦事謬妄聲名平常新野營新店汛

把總張玉琳貪鄙無恥汝甯營正陽汎把總張永  
干與公事彰德營武安汎把總許清璋遇事取巧  
內黃營外委丁懷韜賦性奸猾南右營李青店外  
委謝天順荒唐多事南右營舊縣鎮外委程鵬舉  
庸闇無能固縣營毛集汎外委劉雲泰情性輕浮  
固縣營羊冊汎外委徐元亮不治輿情信陽營吳  
家店汎外委陳光甲貪利營私鄧新營厚坡汎外  
委朱長印辦事乖謬確山營平頭塚汎外委朱萬  
榮聲名惡劣歸德左營外委劉紹周行同無賴新  
野營水臺村汎外委朱鵬玉不守本分陳州營外



委張興廣舉動浮躁永新營麻種汎外委何起瑛  
委靡不振俱應革職以示懲儆又彰德營叅將史  
亭雲精力就衰難期整頓調署內黃營都司北右  
營都司李清選身弱多病臣標守備銜左營把總  
張國祥精力漸疲北右營孟縣汎把總蔣振國不  
耐勞苦光州營息縣汎外委祁保先目力昏眊河  
南營伊陽汎外委靳烈太年衰技弱彰德營外委  
胡俊年力就衰均應勒令休致以肅戎行又彰德  
營中軍守備周希曾河南營中軍守備金殿試陝  
州營中軍千總靳攀桂均於營務不知振作光州



營包信汎把總王忠勳辦事粗率考城營舊考城  
汎把總王順安陝州營靈寶汎把總吳超河南營  
宜陽汎外委崔聚貴俱係弓馬生疏惟年力尚堪  
造就應請將周希曾金殿試以千總降補靳攀桂  
以把總降補王忠勳王順安吳超均以外委降補  
崔聚貴降爲馬兵以觀後效此外尚有弓馬稍生  
及先因病請假各員弁應分別勒限學習補行考  
驗另容咨部辦理臣伏念兵無強弱操練則精是  
以每閱一營必勸懲兼施爲之宣明紀律而於各  
營將備尤必嚴加考核不少寬假以期兵將聯爲

一氣使行伍之士有勇知方咸成勁旅仍飭隨時  
會同地方官講求捕務消患未萌不得稍形鬆懈  
以仰副

聖主養兵衛民整頓營伍之至意所有<sub>臣</sub>查閱通省營  
伍情形理合恭摺具

奏伏乞

皇上聖鑒訓示再此次所開各缺豫省現有應補人員  
應請扣留容<sub>臣</sub>另行揀員請補合併陳明謹  
奏

同治十三年九月二十日

兼校練軍片

再豫省綠營官兵自咸豐初年起遠近徵調精銳凋殘存營之兵間有老弱臣到任後察看情形計非將綠營額設兵丁加意整頓無以脩明武備顧衛民在兵馭兵以將而尤在優其糗糧方收飽騰之效無如庫藏極絀勢難全額加增是以

奏請創設練軍抽調綠營馬步精壯官兵揀選樸誠勇敢將領簡明軍實按照行營制度朝夕訓練並分赴各路巡緝盜賊巡已卽練練已卽巡嚴定章程使無怠忽兩年以來搜捕伏莽著名匪徒訊明



正法地方賴以安靖

臣

此次奉

命查閱營伍每至一鎮校畢綠營卽將該處練軍一齊  
調閱其合操大陣並速戰陣長矛弓箭刀牌雜技  
仍照本營例制一律考驗均能合法其新練之槍  
礮準頭進止腳步尤爲純熟輕便查看兵丁年力  
富强馬匹臚壯旗幟器械均屬鮮明銳利

臣

於校  
畢後嚴飭該管帶官恪守定章訓練毋許間斷倘  
敢前後異轍卽當從嚴叅辦並切屬各該鎮就近  
隨時查驗認真督飭庶使營制常新以仰副  
聖主保衛地方有備無患之至意所有

臣

查閱營伍兼



校練軍緣由理合附片具陳伏乞

聖鑒謹

奏

同治十三年九月二十日



壽婦于氏年屆百齡五世同堂請

旨旌表摺

奏爲壽婦年屆百齡五世同堂請

旨旌表恭摺仰祈

聖鑒事竊據布政使劉齊銜詳稱前任汝陽縣知縣蘊琛之母于氏現年九十九歲係正藍旗漢軍文泰佐領下原任福建泉州府廈門同知咸成之妻有子二人現存次子蘊琛孫四人長多榮山東府經歷次胡晉熙四川儀龍縣知縣三多齡四多厚曾孫三人宗揚宗振宗超元孫一人福長委係年屆

百齡五世同堂蘊琛告請終養開缺因有經手未完事件尚在豫省寄寓由同鄉官開封府理事同知清科等聯名具稟開具宗圖冊結呈請旌表現在恭逢

皇太后四旬萬壽期內此案應請改題爲奏等情具詳前來臣覆加查得壽婦于氏柔嘉維則淑慎其儀珩璜徵四德之全型垂象服雨露沐

五朝之盛慶衍鳩扶萊子承歡婦孺咸欣舞綵桐孫競秀曾元並見含飴茲當寰宇呼嵩祝

天家之純嘏迺見期頤益算應人瑞之嘉庥允符成例於



引年宜籲

推恩之曠典除圖結咨部外理合恭摺具陳伏乞  
皇上聖鑒訓示謹

奏

同治十三年九月三十日



道員張汝瀛在原籍奉

旨建祠請列入祀典摺

奏爲陣亡道員在原籍地方遵

旨建祠據情籲請列入祀典恭摺仰祈

聖鑒事竊據南汝光道傅壽彤轉據羅山縣知縣張鴻

稟稱該員故叔前任湖北漢黃德道張汝瀛於咸

豐三年在田家鎮堵剿粵匪力竭陣亡同治九年

六月二十五日湖北督撫

臣奏奉

上諭張汝瀛著加恩予諡並准於殉難及原籍地方建立專祠以彰忠節該部知道欽此現經該家屬在原

籍樂陵縣城內遵

旨修建祠宇工竣稟請奏懇

天恩照例列入祀典由地方官春秋致祭等情前來臣

查各直省忠節諸臣奉

特旨建立專祠者例得每歲由地方官春秋致祭同治  
十年間直隸督臣李鴻章據知府李孟平在服官  
省分稟請將前署湖北按察使李卿穀等原籍固  
始縣專祠列入祀典奏蒙

允准成案查核相符理合據情籲請

敕下山東撫臣轉飭張汝瀛原籍樂陵縣地方照例列



入祀典春秋致祭以妥忠魂謹繕摺具

奏伏乞

皇上聖鑒訓示謹

奏

同治十三年十月十八日



請以懷慶府知府馬先登調補省會知府摺  
奏爲揀員調補省會知府以資治理恭摺仰祈

聖鑒事竊照開封府知府英瑞於同治十三年七月三十日在任聞訃丁父憂經臣具

題開缺接准吏部咨七月二十六日奉

上諭河南開封府知府員缺緊要著該撫於通省知府內揀員調補所遺員缺著王緒曾補授欽此等因行知欽遵在案查首府首縣缺出按照奏定章程應於通省正途人員內揀選調補今開封府爲省會首郡要缺管轄十六州縣政務殷繁且時有發審

案件及協防黃河隄掃之責必須才識練達之員  
方足以資治理 臣與藩臬兩司在於通省正途出  
身實任知府內逐加遴選非本任緊要卽人地未  
宜惟查有懷慶府知府馬先登現年六十四歲係  
陝西大荔縣人由道光丁未科進士以知縣卽用  
籤掣貴州親老告近改掣河南二十七年十二月  
到省准補永甯縣知縣咸豐三年丁憂卸事留營  
差委服闋起復遵例報捐知府指省河南因在本  
籍勸捐出力保奏以知府歸候補班前先補用同  
治元年請咨引



見奉

旨著照例發往欽此題補今職五年九月初六日到任  
七年調省察看八月初二日仍回本任因防  
汎出力保奏奉

旨以道員在任候補欽此嗣六年俸滿奉部調取引

見因督辦沁工要件經臣奏明展緩在案查該員穩慎  
精詳老成可靠歷俸早滿年限且係正途出身以  
之調補開封府知府實在入地相宜與例亦屬符  
合據布政使劉齊銜按察使紹誠會詳前來合無

仰懇

金海月之考正卷之二  
三三  
天恩俯准以懷慶府知府馬先一調補開封府知府實  
於省會要缺有裨如蒙

俞允該員係現任知府請調知府銜缺相當其任內一  
切因公處分例免核計仍俟部覆至日飭令請咨

赴部引

見所遺懷慶府知府員缺遵奉

諭旨卽以王緒曾補授理合恭摺具

奏伏乞

皇上聖鑒訓示謹

奏

同治十三年十月三十日

金海真之卷之八

三



籌議嵩毅兩軍正餉已竭全力支應實難量爲增撥請將肅州墊辦糧料各款指撥歸還摺

奏爲支應嵩毅兩軍正餉已竭豫省全力現在加餉無可量增所有肅州墊辦糧料等銀應請

敕部指撥歸還以清款目而利師行恭摺仰祈

聖鑒事竊臣前以嵩毅兩軍先後出關需餉浩繁非豫力所能及先請議加大數指省協撥奏蒙

敕部速議接准部咨以該兩軍出關所需應俟左宗棠奏報到日由部酌核辦理現在加餉仍由豫省量爲增撥等因覆奏奉

旨依議欽此茲據毅軍統領宋慶鈔咨陝甘督臣左宗棠覆陳出關諸軍糧價運腳現時辦理情形摺稿並准該督臣以嵩武一軍自上年十月起至本年九月上旬止在肅州官局支領糧料除收共墊過銀二十五萬三千餘兩應由河南解還以清款目咨會前來豫省嵩毅兩軍出關所需此時既經奏報竊謂部臣通籌全局必指撥結實可靠省分以贍邊軍餼糧之費而張

天討撻伐之威惟臣前奉部咨臣令將現在加餉仍由豫量爲增撥一節實緣庫款奇絀絲毫未能撥濟

夫豫力之竭卽竭於兩軍之供億六年以來不靳七八百萬帑金支撐至於此時用愈匱而力愈絀杼軸告勞誠出於無可如何耳往時實謂關內蕩平可期凱撤卽或遣留各半亦得喘息少紓今乃全師西進用兵於萬里之外此不獨非豫軍所及料亦非部臣所預圖也就今日豫庫艱窘言之則必於正餉內酌予裁減俾豫力得資周轉而後可支危局然時勢艱難至此臣不能於正餉之外稍增涓滴又何敢於正餉之中別冀勻攤目前無論如何爲難但願年穀尚得中稔河工不至別生事



端臣必先其所急按月照常饋運萬一將來實不能支再當呼籲上陳至於嵩武軍支領肅局糧料卽是出關所需豫省羅掘已窮斷不能設法籌還在陝甘督臣不分畛域力爲墊發積此巨款豈可久懸應請由部臣核議歸入出關所需案內劃派協濟省分抑或別指有著之款撥解歸還以清款目而利師行據藩司劉齊銜詳請具奏前來所有豫省全力竭於支應嵩毅兩軍除正餉外實難量爲增撥請將糧料各款另撥歸還緣由謹繕摺具陳伏乞



皇上聖鑒訓示謹

奏

同治十三年十月三十日



漕陳豫庫匱乏實在情形各路協餉仍請准予停  
緩改撥摺

奏爲漕陳豫庫匱乏實在情形各路協餉無可籌解

籲懇

天恩准予停緩敕部改撥以免貽誤恭摺仰祈

聖鑒事竊臣前以嵩毅兩軍先後出關豫省庫款支絀

兼顧不遑請將奉撥協餉暫予停緩附片具

奏接准部咨以現在各省餉源均尚未充裕若停緩  
豫省協餉恐各省紛紛援請所奏未便核准仍令  
源源籌解等因覆奏奉

旨依議欽此行知到 臣當經飭司欽遵辦理茲據布政使劉齊銜詳稱豫省自軍興以來籌辦防剿支應客軍厯經十有餘年庫儲悉索已空迨豫境肅清嵩毅兩軍同時西征竭全豫之脂膏供億已逾六年以故司庫支絀甚於他省每年進款止於地丁雜稅二百十餘萬兩別無餉源可籌非若他省有江河關卡之利也而河工修防之需與夫兩軍月撥正餉出項浩繁則又他省所無兩軍供支並本省防練各軍月餉及製造軍裝常年需銀一百四十餘萬閏年加銀十餘萬河工款項先前定解二



十萬近年險工疊出逐漸增添已逾加倍卽此兩款歲需銀二百餘萬兼以應解京餉二十五萬丁地雜稅所入已屬不敷此外如旗綠河各營兵餉各官養廉並一切必不可少應支各款歲需銀七十餘萬司庫一屆下忙已如懸磬設法騰挪挖肉補瘡斷非持久之計況自兩軍部署出關以來增添製造采購之款已復不少河工於原定四十七萬六千餘兩外本年又添撥急款十一萬五千兩處此奇窘萬狀無術可以補苴所有東三省俸餉西路各營新疆各城專協餉項本年應解及節奉

撥提者統共二百零二萬三千餘兩羽檄交催委  
提絡繹皆是急需之款無如豫力已竭不能兼顧  
以至欠解一百九十五萬五千六百餘兩豫庫入  
款祇有此數以之供支京餉暨本省征餉工需三  
項已是竭蹶萬分各路協餉實在無從勻撥卽欲  
少爲挹注而不能伏思豫省進款如此之少出款  
有兩軍月餉河工要需如此之多實非他省可比  
惟有據實陳明請將奉撥各路協餉

奏懇俯准停緩改撥等情具詳前來臣查理財之道  
不外乎量入爲出豫承凋敝後移師西陲罄歲入

十萬近年險工疊出逐漸增添已逾加倍卽此兩款歲需銀二百餘萬兼以應解京餉二十五萬丁地雜稅所入已屬不敷此外如旗綠河各營兵餉各官養廉並一切必不可少應支各款歲需銀七十餘萬司庫一屆下忙已如懸磬設法騰挪挖肉補瘡斷非持久之計況自兩軍部署出關以來增添製造採購之款已復不少河工於原定四十七萬六千餘兩外本年又添撥急款十一萬五千兩處此奇窘萬狀無術可以補苴所有東三省俸餉西路各營新疆各城專協餉項本年應解及節奉



撥提者統共二百零二萬三千餘兩羽檄交催委  
提絡繹皆是急需之款無如豫力已竭不能兼顧  
以至欠解一百九十五萬五千六百餘兩豫庫入  
款祇有此數以之供支京餉暨本省征餉工需三  
項已是竭蹶萬分各路協餉實在無從勻撥卽欲  
少爲挹注而不能伏思豫省進款如此之少出款  
有兩軍月餉河工要需如此之多實非他省可比  
惟有據實陳明請將奉撥各路協餉

奏懇俯准停緩改撥等情具詳前來臣查理財之道  
不外乎量入爲出豫承凋敝後移師西陲罄歲入



財賦之大半源源轉輸頻年餽餽無缺佐成闕隴  
肅清之功此餉不爲虛糜然而豫之元氣由是耗  
削幾盡矣近來各省庫款雖皆不甚充裕殆未有  
出入懸殊如豫之今日者幸而本省邊圉綏靖年  
穀亦稱中稔各屬征解不至減色河上雖出險工  
搶護漸臻平穩可以停手而司庫一空如洗已有  
岌岌不可終日之勢蓋出款以西征爲大宗京餉  
工需又皆刻不容緩帑源坐竭搜括靡遺該藩司  
所稱以二百十餘萬之丁地雜稅供支京餉征餉  
工需三項卽形竭蹶者實臣所目覩而心悸也旗

綠河營兵餉養廉雜支亦不能置之不顧則此七十餘萬已屬憑空結撰並無可指之入款臣以各路催餉迫呼甚迫藩司總筦度支不能不督責籌措第必權衡乎出入之數又不能指無爲有化紬爲盈統計歷年實解之數不過十餘萬兩而今歲勉強拚湊僅解過六萬餘兩杯水車薪毫無裨益而豫省現在情形已值三空四盡卽欲如此之略爲勻撥恐亦有所不能徒令各路帶兵將帥日殷懸盼當此進剿喫緊之時萬一貽誤事機則罪戾滋重雖欲仰邀

寬大之恩而不可得若再緘默不言日復一日豫省之  
窘乏既無可望之轉機各路之飢譁又係目前之  
隱患在部臣統籌全局原恐遽准改撥開他省援  
請之端然豫獨任兩軍正餉既無殊本省之用兵  
而歲供數十萬工需又久作常年之巨款論出項  
毫無可減論進項別無可增該藩司臚陳豫庫情  
形委係出入懸殊甚於他省合無籲懇

天恩俯准敕部將豫省奉撥各路專協餉項分別停緩  
改撥並聲明他省不得援照庶豫之全力得以專  
顧兩軍正餉中州幸甚大局幸甚所有豫庫匱乏

實在情形謹繕摺具陳伏乞

皇上聖鑒訓示謹

奏

同治十三年十月三十日



勸辦積穀民捐民儲以備荒歉摺

奏爲勸辦積穀民捐民儲以備荒歉恭摺仰祈

聖鑒事竊以民爲邦本立政必先保民食爲民天裕民  
必先足食顧官爲經理弊或在胥蠹之欺朦而民  
自蓋藏事不出里閭之聽睹豫省久遭兵燹閭閻  
凋敝餘蓄未能頻年雖僅中稔一切備荒之政未  
及舉行但圖匱於豐使民自爲儲蓄正宜及時利  
導期於民信而易從臣自到任後諄飭各牧令勸  
民積儲頒發章程按地出穀就鄉分倉擇里中公  
正紳耆董其事官則有督察之權而不假吏胥之

手兩年以來先後集捐現計各屬已存之穀共計九十三萬石有零設遇歉收隨時分別借糶悉由董理紳耆綜核出入官不責以簿冊之具文而民則爲耳目所共悉歸諸簡易使民間不以爲官物而視如其家之困固窳窘也將來年歲豐收尚可續捐副倉以備荒政之一助所有勸辦積穀民捐民儲各緣由理合繕摺具陳伏乞

皇上聖鑒訓示謹

奏

同治十三年十一月十四日

請將濬縣知縣陳寶豐革職片

再正任濬縣知縣陳寶豐前在署嵩縣任內奉文勸辦積穀並不一律遵章徑捐穀石輒有准令民間繳錢代買之事以致弊竇叢生迨經後任盤量又較原報數目短少且倉底間有腐穀充數者揭由藩司委員查明屬實雖經續據分別補換繳倉迹其行事居心均不可問臣以豫省素乏蓋藏兩載經營始得積有成數該令當創辦之初竟敢朦混取巧殊於通省積儲大有關係未便稍事姑容據藩臬兩司詳請參辦前來相應請



旨將正在濬縣知縣陳寶豐卽行革職以儆效尤而肅  
官常所遺濬縣一缺豫省現有應補人員應請扣  
留外補謹附片具陳伏乞

聖鑒訓示謹

奏

同治十三年十一月十四日



壽婦于氏更正冊結片

再臣前以壽婦于氏年屆百齡五世同堂奏請旌表正將圖冊各結咨送部旗間據布政使轉據府縣詳稱該同鄉旗官前次具稟時將于氏次子運興繕寫遺漏更造冊結呈明詳送前來臣飭查無異除咨送部旗外理合附片具

奏伏乞

聖鑒謹

奏

同治十三年十一月十四日



創議豫省練軍章程並呈馬步隊營制口糧清單  
摺

奏爲豫省練軍創議章程謹將馬步隊營制口糧繕  
具清單請

旨敕部核覆恭摺仰祈

聖鑒事竊臣上年將規畫練軍大概情形及檄飭分巡  
合哨各緣由先後具

奏接准部咨行令將營制口糧如何釐定詳細奏報  
在案臣就三鎮額兵內先經抽練馬步各一營北  
鎮二營該總兵崔廷桂訓練甚屬認真南鎮因所

轄南汝光汎地毗接楚皖幅員寥廓彈壓巡防步  
隊一營不敷分布復添練一營仍歸趙鴻舉統帶  
以資聯絡其該鎮馬隊一營因尹嘉賓請假省親  
另派提督蔣東才接帶東鎮馬步二營楊鴻禮教  
練極爲得力是以委署總兵以後仍令統理計現  
練步隊四營每營五百名馬隊三營每營二百五  
十名如尚不敷派撥再爲隨時添練臣與該鎮將  
申明紀律講求訓練務令兵丁精壯馬匹鑣健營  
哨各官擇樸實耐勞者任之不准有絲毫油滑習  
氣平時各立營壘如臨大敵三鎮汎地又復互相



周歷巡已卽練練已卽巡各路邊防擇要扼紮著名匪犯責成躡拏試辦以來日有起色總期練一兵可得一兵之用方足以壯聲勢而靖地方所有營制口糧臣前在直豫曾隨原任督臣曾國藩反復籌議報部核准直隸情形大致相同一切章程均可仿照間亦略爲變通各就所宜辦理茲將馬步隊分別開具清單恭呈

御覽請

旨敕下部臣核議其練軍底餉亦請查照直隸成案併歸一處由藩司於底營餉內扣出同練餉統撥糧

金匱要略卷之六十一  
三  
臺轉發練營支領以杜頂冒之弊火器以洋鎗爲  
最利現已分配演習擬隨時籌款赴通商海口購  
辦俾資應用此外如尚有增減事宜容臣隨時分  
別奏咨核辦所有豫省練軍營制口糧理合開單  
繕摺具

奏伏乞

皇上聖鑒訓示謹

奏

同治十三年十一月十四日

謹將河南練軍馬隊營制口糧繕具清單恭呈

御覽

一馬兵營制每營營官一員幫辦二員字識一名  
分前後左右中五哨督隊官五員每哨馬五十  
匹卽以營官爲中哨內提二十名爲親兵前後  
左右四哨每哨哨官一員每哨五棚每棚什長  
一名正兵九名共什長二十五名正兵二百二  
十五名營官幫辦字識共用伙夫二名四哨哨  
官督隊官共用伙夫四名二十五棚每棚伙夫  
一名共用伙夫三十一名營官馬夫四名幫辦

二員各用馬夫二名字識用馬夫一名四哨哨官各用馬夫二名督隊官各用馬夫一名共用馬夫二十二名一營員弁兵夫共三百一十六員名

一營官馬四匹月給薪水銀五十兩馬乾銀十二兩公費銀一百兩獸醫工匠旗幟號衣均在其內又分給全營柴草銀八十兩幫辦馬二匹月給薪水銀十兩馬乾銀六兩字識馬一匹月給薪水銀六兩馬乾銀三兩哨官馬二匹月給薪水銀十二兩馬乾銀六兩督隊官馬各一匹月



給薪水銀九兩馬乾銀三兩以上皆不扣建什  
長日給銀一錢五分馬乾銀一錢親兵日給銀  
一錢四分馬乾銀一錢正兵日給銀一錢三分  
三釐三毫馬乾銀一錢更不另發底餉伙夫日  
給銀一錢馬夫日給銀一錢以上皆扣建一營  
共需馬二百七十二匹餉乾銀二千三百四十  
兩零五錢

一各標底營馬兵有可挑者儘馬兵挑選若馬兵  
挑不足額許於步兵內選其年青力壯者配給  
馬匹或願自帶私馬入營者聽其發給官馬及

倒斃後由官買補者均在該兵餉乾內每月扣銀一兩按照河南省買馬例價扣畢卽作爲該兵之私馬每月由哨官驗其肥瘠稟明營官以爲什長及本兵功過

一馬兵出征本省概不加餉出征外省每兵月加銀二錢其出征防剿巡哨搬運帳棚軍械子藥麩料應添長夫四十名每名日支銀一錢月支銀一百二十兩或以夫價雇備長車者聽坐營停給

一馬兵坐營屯紮之處與步隊一律浚濠築牆擇

其地面寬敞有林木水泉之處修做營房馬棚以備寒暑訓練出征防剿及平時巡哨地方各帶鋤鋤支棚野宿不得借住民房馬槽笨重不便行營布槽之製亦不耐用以加大柳條簸籬爲宜遇有征調捆載而行其坐營修房經費應准其核實開報

一各兵帶馬來營不須另發鞍韉其配給馬匹者應由營官置備鞍韉鞦轡全副給領所有鐵嚼鋤草刀口袋號衣等款均由營官給發初成營時准其報銷一次常年動公費修補其坐褥布

屣肚帶皮條各零件均由馬兵自備

一馬槍洋槍長矛短刀子藥帳棚應由軍需局發給用過工料銀兩分晰造冊請銷



謹將河南練軍步隊營制口糧繕具清單恭呈

御覽

一步兵營制每營營官一員哨官四員哨長五人  
什長四十人正兵三百六十八人營官親兵五十  
人哨官護兵四十人以上共五百人伙夫長夫  
在外每營五哨營官自帶中哨只有哨長而無  
哨官中哨第一隊劈山礮礮車二輛礮四尊親  
兵十二人什長一人第二隊刀矛親兵十人什  
長一人第三隊擡槍親兵十二人什長一人第  
四隊刀矛親兵十人什長一人此外又有雜項

親兵六人如藍旗紅旗掌號令金鼓之類皆在  
其內以上五十人食親兵之餉又有第五隊火  
器第六隊刀矛第七隊火器第八隊刀矛每隊  
正兵十人什長一人此四隊與各哨之正兵相  
同不食親兵之餉凡八隊每隊伙夫一人營官  
哨長及雜項親兵共伙夫二名其左右前後四  
哨每哨一三五七凡四隊皆用火器二四六八  
凡四隊皆用刀矛每隊十人又什長一人共正  
兵八十人什長八人又護兵十人以六人隨侍  
哨官四人隨侍哨長共百人外八隊伙夫八人

哨官哨長暨護兵共伙夫一人火器向用擡槍  
鳥槍現亦配用洋槍以後擬添購演習此外四  
哨哨官應各用長夫三名營官用長夫十二名  
共二十四名無論行營坐營皆准募足營中伙  
夫長夫卽以餘丁爲之

一兼轄馬步營爲軍軍有統領一人月給薪水銀  
一百兩公費銀一百五十兩隨帶文武員弁及  
一切雜用均在此內不必另設翼長如統領自  
帶一營亦不必更給營官薪水公費營官月給  
薪水銀五十兩公費銀一百兩所用書寫管帳



文員及醫生工匠薪糧修補旗幟號衣各費均  
在其內哨官每月十兩哨長每月六兩什長每  
月四兩二錢親兵護兵每月三兩九錢正兵每  
月三兩六錢更不另發底餉伙夫長夫每月各  
三兩每營每月酌發柴草銀一百四十兩由營  
員分派以免騷擾一營員弁兵夫共五百七十  
員名每月薪水公費口糧銀二千三百八十五  
兩如係統領自帶之一營月加銀一百兩  
一步兵出征外省每兵月加銀六錢出征本省每  
兵月加銀四錢以示體卹無論正兵親兵護兵



什長均照此例拔營之時每隊准添用長夫二名負運帳棚鋤共八十人其統領營官若非本省人員亦准再添長夫四名坐營均停給一每營應需帳棚定以限制營官幫辦書記軍火糧餉等共用夾帳棚八架單帳棚二架每哨哨官哨長護兵共夾帳棚一架單帳棚二架中哨哨長夾帳棚一架營官親兵每隊夾帳棚一架單帳棚一架正兵每隊單帳棚二架每營共用夾帳棚十七架單帳棚八十六架惟統領加大夾帳棚二架兼帶一營者減夾帳棚二架

一遴用營哨各員不必拘定綠營舊制但期得力  
不論官階本營無人卽用外營實缺無人卽用  
候補甚至本省無人調取外省總以本領操守  
可靠者爲主統領責任較重或卽用本標鎮將  
或另行選派全在臨時審擇兵丁由營官會同  
各底營本管官挑選年力精壯者帶赴統領行  
營覆挑挑定編伍挑兵之後卽挑餘丁以後兵  
有疾病事故應行更換者由餘丁內揀補仍責  
成底營汛挑送餘丁補額不得聽信哨長什長  
招募無籍游民充數

一營中器械除帳房槍礮刀矛子藥均由省局製造撥發其旗幟號衣初成軍時由各營自製核實領價一次以後非應行更換之年均於公費內動款修補

一綠營懈弛之故由於分塘坐汎散處四方非主將耳目所能周及其朝夕與處之千把外委又狃於故常不能破除情面此次練軍合五百人爲一營就適中衝要之地挖濠築牆支搭帳棚平日作息有時出入有定申嚴戒備以戢其渙散之心而作其果敢之氣訓練旣成先就所管

地面梭織巡哨坐營留人看守各鎮復令會商  
定期互相周歷往來道路以習勞苦如邊防山  
僻之地間有匪徒不靖以及通衢大道冬令巡  
防緊要均隨時撥派分駐其何日出哨何日歸  
營應由統領營官具文報查



撫標親軍二營改照練軍章程片

再臣標兵丁歷經前撫臣挑取步隊二營作爲親軍上年因陳州府所屬周家口爲商賈輻輳五方雜處之地卽派叅將王壽所帶之五百人改照練營章程前往駐紮訓練巡防並飭於陳屬附近各處隨時周歷查拏匪類副將裴政所帶之五百人分哨撥駐附省一帶衝要之所卽在省城外築壘爲營更番互調合操以肅紀律所有臣標親軍二營現均改爲練軍一切營制口糧悉令仿照辦理理合附片陳明伏乞

聖鑒謹

奏

同治十三年十一月十四日

豫庫入不敷出已將十二年漕折銀兩動應急需  
現擬另籌補解摺

奏爲豫省征餉工用異常緊迫庫款入不敷出已將  
未解十二年漕折銀兩動應急需現擬另籌補解

恭摺奏祈

聖鑒事竊准部咨議覆豫省十三年漕糧照准折解案  
內議令將十二年漕折實徵米數報部一面將尚  
應補解部庫銀兩趕緊籌齊一月內如數委解十  
三年折徵新漕於年內批解一半等因遵卽轉行  
查辦去後茲據布政使劉齊銜詳稱查十二年折

徵漕糧委因旱潦爲災民力拮据徵收未能足數核計應解部庫者共止收銀三十七萬餘兩前經四次解過銀二十萬兩下餘銀兩原期分批儘數撥解以濟京倉惟豫省歷年支應一切餉需所恃以周轉者無非丁漕雜稅及驛站裁扣建曠等款別無他款可籌司庫收少用多所入本不敷所出本年除解京協各餉暨發各標兵餉等款外因供支嵩毅兩軍月餉製備軍裝及本省練餉等銀一百四十餘萬兩且兩軍部署出關增添製造需費又復不少而河工於原撥四十七萬六千餘兩外



又以險工疊出添撥急款十一萬五千兩分投籌給均不容稍緩須臾勢處於萬不得已卽將漕折先行動用以應急需而維大局現在十二年漕折既無存款而下忙錢糧又屬寥寥卽按月兩軍正餉並本省兵練各餉及一切雜支等項尚虞不敷支發此項漕折實屬無可騰挪一時驟難補還擬請俟另籌有款與歷年欠解漕折陸續補解所有自八年起漕折已徵已解及未解民欠各數趕緊挨年造報其十三年新漕亦卽督飭趕速實力催征折解等情具詳請

奏前來臣查漕折爲部庫支放要需原擬督司儘數  
籌解第綜核司庫收支款數實在入不敷出其艱  
窘情形經臣節次臚陳仰荷

聖明洞鑒征餉固軍情緩急所繫河工尤民命安危所  
關當需款緊迫無可籌應之時勢不能不將漕折  
通融藉資挹注該司爲顧全大局起見自應准如  
所請俾紓庫力除飭將十三年新漕趕緊催收報  
解外所有征餉工用急需已將未解十二年分漕  
折銀兩動用現擬另籌補解緣由理合恭摺具  
奏伏乞

皇上聖鑒謹

奏

同治十三年十一月二十五日

金海集卷之二

三



遵

旨酌保搜捕南山匪徒出力文武各員懇予獎勵摺  
奏爲遵

旨酌保搜捕南山匪徒在事尤爲出力之文武各員籲  
懇

恩施准予獎勵以昭激勸恭摺仰祈

聖鑒事竊臣於同治十二年七月初六日具奏南汝所  
屬之裕葉西遂等處匪徒蠢動經練軍會同地方  
文武分路兜拏擒斬多名以遏亂萌一摺是月二  
十二日奉

硃批著准其酌保數員毋許冒濫欽此仰見

皇上綏靖疆圉微勞必錄之至意伏查上年裕葉境內  
小頂山牛心山一帶匪徒韓潰昌卽韓峒倉等糾  
黨乘夜放火裝旗派飯勢將盤踞南陽府知府任  
愷調度有方督飭各該縣選帶勇役會營捕拏南  
陽鎮臣趙鴻舉亦親督練軍中哨遊擊郭廣泰等  
分路入山兜捕該匪拚死奔竄由西遂毗連處所  
出山滋擾燒搶魁拉莊民寨郭廣泰馳至揮令守  
備魏全忠等率隊邀截遂平汎千總衍祥帶同鄉  
團韓允西等踵擊會合於袁莊地方轟斃匪首韓

潰昌並擒斬多名匪蹤潰散續據盤獲審明趙殿  
盈等二十一名又於何平倉等十八名內訊有甘  
心結捻者十一名均先後正法梟示旋又偵緝餘  
黨經練軍購線陸續稟獲解交地方官研審明確  
就地正法者十餘名此股匪徒絕少漏網若非掩  
捕迅速竊恐山徑叢雜之區伏莽潛滋勾結爲患  
必且勢成燎原所幸乘其初起一鼓殲除地方賴  
以救綏在事文武各員自應量予甄敘除核其勞  
績稍次者咨部給獎外所有尤爲出力之南陽府  
知府任愷擬請



賞加鹽運使銜副將銜升用叅將南陽鎮中軍游擊郭  
廣泰擬請俟補叅將後以副將補用五品頂戴藍  
翎安徽候補縣丞韓允西擬請補縣丞後以知縣  
用游擊用訥勤擬請以游擊儘先補用五品藍翎  
遂平汎干總衍祥擬請以守備儘先補用五品頂  
戴候補府經歷張金鎔擬請俟補缺後以知縣用  
六品頂戴候選縣丞王用權擬請以縣丞儘先選  
用府經歷銜朱致廣擬請以府經歷歸部選用都  
司銜候補守備魏全忠擬請以守備儘先補用合

無籲懇



天恩俯准獎勵出自

逾格鴻施所有遵

旨酌保緣由謹繕摺具

奏伏乞

皇上聖鑒訓示謹

奏

同治十三年十二月初十日

金海三才考

卷之二

請將叅將玉壽王大鵬等補叅將都司守備各缺  
摺

奏爲揀員請補叅將都司守備各員缺以實營伍恭  
摺仰祈

聖鑒事竊查汝甯營叅將柏英彰德營叅將史亭雲署  
內黃營都司河北鎮右營都司李清選彰德營中  
軍守備周希曾署河南營中軍守備衛輝營守備  
金殿試前經臣於本年閱伍案內奏請將柏英革  
職史亭雲李清選均勒令休致周希曾金殿試均  
以千總降補所開各缺並請扣留容臣另行揀員

請補奉

硃批著照所請兵部知道欽此並准兵部知照到 臣查  
定例儘先人員遇有題推缺出卽行題補又兵部  
奏定章程儘先各員均按奉

旨先後挨次補用如實在不得其人將名次在前各員  
於此缺何項不宜按名指實准將名次在後之員  
請補又推補缺出專用儘先題補缺出以二儘先  
一各項輪用等語茲所開彰德營叅將河北鎮右  
營都司兩缺均係推缺汝甯營叅將係定章後第  
一輪第一題缺彰德營中軍守備衛輝營中軍守



備係第一輪第一第二題缺均應補用儘先人員  
臣於在標候補儘先叅將都司守備各員內逐加  
遴選查有儘先叅將王壽營務熟悉緝捕認真堪  
以擬補汝甯營叅將又儘先叅將王大鵬勇敢樸  
勤帶練得力堪以擬補彰德營叅將又儘先都司  
田映傑誠實不欺能耐勞苦堪以擬補河北鎮右  
營都司又儘先守備花榮桂樸實謹飭堪以擬補  
彰德營中軍守備又儘先守備徐庭書年強差奮  
堪以擬補衛輝營中軍守備均屬人地相宜雖該  
員等儘先名次稍後與例未符惟儘先叅將名次

在玉壽王大鵬以前之胡思忠李元王莘臣李文  
全明慧王忠魁李金榜王紹烈田映唐朱萬昌儘  
先都司名次在田映傑以前之羅斌元楊得山李  
煥然趙鵬飛陳掄元袁丕基吳士秀王連三夏廷  
獻石玉書賈泰安張敦倫斌成胡國安任萬元謝  
鴻保郭振綱郁景文蕭自得史太和尹彥鏢呂廷  
連徐生印婁文斌文志寶萬祥閣士俊文華羅景  
燾周茂斗高心坦沙魁元儘先守備名次在花榮  
桂徐庭書以前之李玉成趙喜德鄒鳳傑楊得林  
王成如陳致中喬玉趙同心張應斗王得勝錢錕

張青雲王殿魁王殿韓立本毛得玉李寶盛黃占  
標王同生張朝林魏雲標阿爾綳阿賈德元周青  
選清廉李生貴寶萬選陳大慶王保國王振山李  
六德魏精一海呈瑞軒轅同春馬振彪閻紹富馮  
啟賢王秀劉振清朱鳳山朱忠全唐雷元王朝良  
夏省忠趙敬一李振崗劉孝昭劉鳳岐張紹王金  
寶等於現開各缺營務情形尚欠熟悉未便遷就  
貽誤而玉壽等均係人地實在相需例得將名次  
在前各員按名指實專摺奏請合無仰懇

皇上天恩俯准將儘先叅將玉壽補授汝甯營叅將儘



先叅將王大鵬補授彰德營叅將儘先都司田映  
傑補授河北鎮右營都司儘先守備花榮桂補授  
彰德營中軍守備儘先守備徐庭書補授衛輝營  
中軍守備實於營伍地方均有裨益除飭取各員  
履歷送部外理合恭摺具陳伏乞

皇上聖鑒訓示謹

奏

同治十三年十二月初十日



恭謝

御賜福字摺

奏爲恭謝

天恩仰祈

聖鑒事竊

臣

齋捐差弁回豫捧到

恩賞福字一方謹卽恭設香案望

闕叩頭祇領訖伏念

臣

濫膺疆寄曾乏涓酬方吹冰

律以迎韶暖回地脈渥荷

玉音之錫羨

煥啟天章欽維我

皇上恩洽熙臺

化光調幕

直聰建極邁軒運以登三

敷錫用康斂箕疇而受五

綬之多福仰以觀

文麝墨光浮知

御案香煙之新染

龍牋彩綉偕

日邊春色以遙來袞華喜

一字之榮馥穀啟三陽之泰從此錦潢玉襲永貽孫子

以繩繩更看嶽色河聲齊現吉祥之止止自

天申祉伏地寅承臣惟有益矢靖共勉酬

高厚竊效華封三祝仰徵

禔福於

皇躬長同荆豫萬家共樂

昇平之景運所有感激欣抃下忱謹繕摺恭謝

天恩伏乞

皇上聖鑒謹

奏

同治十三年十二月十三日

金海關入口稅則

卷八



查明虞城縣被風被雹夏邑等縣被蝗及被淹被  
旱各屬業經分別蠲緩來春勿庸接濟摺

奏爲查明本年虞城縣被風被雹夏邑等縣被蝗及  
被淹被旱各屬業經分別議請蠲緩新舊錢漕明  
春毋庸再請接濟恭摺覆陳仰祈

聖鑒事同治十三年十月十三日承准軍機大臣字寄

欽奉

上諭本年河南虞城縣被風被雹夏邑等縣被蝗來春  
青黃不接之時民力未免拮据著體察情形如有應  
行接濟之處據實覆奏再各屬窪地被淹應否接濟

此外有無被災地方應行調劑撫卹一併查奏候旨  
施恩等因欽此欽遵恭錄轉行確查去後茲據開封  
歸德彰德衛輝懷慶河南南陽汝甯陳州許州光  
州等府州查明核議由司詳覆前來臣復查豫省  
本年四月間虞城縣猝被風雹成災村莊先經奏  
蒙

恩准分別蠲緩錢糧其被蝗兼被水旱之夏邑等十一  
縣及被淹被旱之祥符等六十八廳州縣麥秋收  
成歉薄小民於新舊錢漕力難同時輸納亦經飭  
據司道督屬勘明準情酌議將各區應徵糧賦奏

懇

聖恩分別展緩在案察查民力已紓各屬二麥亦均播種春收有望青黃不接之時俱毋庸再請接濟所有查明虞城縣被風被雹夏邑等縣被蝗及被淹被旱各屬業經分別議請蠲緩錢漕明春毋庸再請接濟緣由理合恭摺覆陳伏乞

皇上聖鑒謹

奏

同治十三年十二月十六日





大行皇帝

龍馭上賓披瀝悲忱戀悃籲懇

聖躬節哀摺

奏爲披瀝悲忱戀悃籲懇

聖躬稍節哀情仰祈

慈鑒事竊臣接准禮部行知內閣抄出欽奉

上諭一道驚知

大行皇帝

龍馭上賓臣跪讀之下伏地呼號莫知所措欽維

大行皇帝臨御寰區垂十三禩

仁德覃敷

武功震鑠凡在中外臣民罔不同深感戴而臣仰邀

知遇洊擢封疆受

恩尤重十一年二月展覲入都荷蒙

召對兩次

訓誨周詳上年

親裁大政方期永秉

宸謨長承

怙冒不意

鑾輿晏駕無由再覲

天顏泣望

鼎湖蟻忱摧裂欽維我

皇上丕承

聖緒仰體

慈懷

一日萬幾付託至大臣惟有籲懇

皇上勤求郅治勉節哀思上答

天

祖眷畀之隆下慰臣庶瞻依之望臣現因欽遵

諭旨不敢奏請進京致曠職守惟有竭誠盡職力圖報

效以冀上慰

聖廕

臣

不勝哀痛籲懇之至爲此瀝忱具

奏伏乞

皇上垂鑒謹

奏

同治十三年十二月二十一日



懇將前借鹽漕銀兩歸軍需項下動用報銷片  
再據布政使劉齊銜詳稱豫省撥解京協各餉及  
本省支發各款爲數甚鉅司庫時形匱絀前因張  
曜宋慶兩營西征月餉無可籌措移准糧鹽道在  
鹽漕兩項內撥借銀十五萬八千兩於同治十二  
年十二月十九二十二二十八等日先後解司兌  
收以濟軍需原擬籌還歸款無如司庫入不敷出  
周轉爲難迄今無法補苴懇將前借鹽漕銀兩歸  
於軍需項下動用報銷等情呈請具

奏前來

臣

覆查無異相應奏懇

金匱要略卷之六  
二  
天恩俯准借撥動用歸於軍需項下報銷俾資周轉爲  
此附片具陳伏乞

聖鑒謹

奏

同治十三年十二月二十四日

續撥西甯豫師軍營專餉片

再豫省奉撥西甯辦事大臣豫師軍營專餉計先後撥解及抵兌過銀十六萬五百兩疊經

奏明在案茲於司庫萬分支絀之時復飭在於同治十三年丁地項下籌動銀一萬兩於十一月初三日發交委員候補通判沈宣昭領解起程前赴陝西省城西甯轉運局交收轉解應用以濟要需據藩司劉齊銜詳請具

奏前來臣覆核無異理合附片具陳伏乞

聖鑒謹

奏

同治十三年十二月二十四日



同治四年以前舊案交代無著虧項請扣廉歸補  
摺

奏爲豫省同治四年以前舊案交代內降革病故各  
員虧項無可著追者請扣各州縣養廉分限歸補  
以清庫款恭摺仰祈

聖鑒事竊照同治四年以前各屬舊案交代共七百餘  
起設局分別清釐內有降革病故各員虧短銀兩  
查明家無財產並無子孫出仕實在無可著追者  
於同治十年間經前撫臣李鶴年遵照部咨明晰  
覆奏仍請援照清查彌補章程於通省文職養廉

金匱要略卷之五十一  
一  
及州縣留支公費等款內分年接續扣補清款其  
道光二十七年以前清查尚未追補銀四十九萬  
八千餘兩時值逆氛未靖原虧各員慘遭搶掠並  
有以房屋等作抵之項均因人亡物燬轉實爲虛  
亦屬無從追繳併請續入此次清釐交代案內一  
體籌辦奉部議覆准如所奏彌補令卽查明實在  
無著之款共若干起虧短銀共若干兩並酌定籌  
補年限勒限三個月詳細造報至軍需用款同治  
三年七月以後應歸銷案者亦造冊報銷以免牽  
混等因具奏奉

旨依議欽此咨行遵照辦理在案臣抵任後節次查催總緣舊案交代官非一任款目繁多各屬查報到局已需時日由局按冊勾稽逐款釐剔其間一款未清往返駁查便羈通案致未依限造辦茲飭據交代局布政使劉齊銜督同局員將降革病故各員虧項逐一查明實在無可著追者七十七起共計虧短正雜各款銀七萬五千七百九十二兩零請先援照清查章程籌補查豫省一百七廳州縣每年應領養廉銀十三萬七千八百兩擬扣二成每年可得銀二萬七千五百六十兩以之彌補無著



虧項銀七萬五千七百九十二兩零分限兩年零  
三季卽可清完應請以光緒元年春季爲始按限  
坐扣虧數尚不甚鉅無須通扣道府以上養廉並  
各州縣留支公費至清查案內咨追勒追以及房  
屋等作抵之項原應遵照併入此次交案一體籌  
補惟款數較繁諸多輾轉驟難備查確切應俟查  
明另辦俾歸核實其清查原案無著彌補未完銀  
九萬三千餘兩錢八千五百二千零已入於  
同治九年秋撥冊內造報續完銀一萬一千五十  
兩零現在截至十三年秋季止續又完銀四萬四



千兩零俱於各年春秋撥冊內造報等情並造具各員無著虧項細數清冊詳請具

奏前來臣復查無異相應仰懇

天恩俯准將舊案交代內降革病故各員無著虧項先在各州縣養廉內分年按限扣補以清庫款所有清查案內無著各項另行查明籌辦除冊咨部並飭將有可著追之款及清查原案未完銀錢分別追完無任延宕外爲此恭摺具

奏伏乞

皇太后

皇上聖鑒訓示至軍需用款應行核銷者已歸另案挨  
次造銷合併陳明謹

奏

光緒元年正月十九日

請留大枝勁旅以作中原活兵摺

奏爲請留大枝勁旅以作中原活兵使餽運之力稍紓而拱衛之防尤密恭摺仰祈

聖鑒事竊以京師爲天下根本豫省者京師之藩籬藩籬不固則所以爲根本計者猶未周且備也近以關隴肅清白彥虎一股蜷伏新曷回部

朝廷撻伐用張出關大舉除惡務盡之義

廟謨誠屬萬全然臣之所憂則不在邊庭之攘擾而在腹地之空虛譬如醫家審證外治邪感必內固本元當此沈痼甫愈營衛臟腑之間正氣未充其觸

而卽發初若無病者然而見證或且束手今日中原之勢何以異此豫居天下之中大河環其西北實爲近畿之屏蔽所屬南汝歸陳舊爲捻蹤出沒之所伏莽堪虞自張曜宋慶兩軍奉

命西征本省遂無大兵鎮壓庫儲匱乏不能更募新兵現雖整頓練軍而馬步僅止七營祇能近捕匪徒不足遠資征剿空虛之患可爲寒心竊以用兵之道當就內外之勢權其緩急而不可使有偏重之端假令西征之兵尚不敷用則盡銳以行誠有不能兼顧之勢抑或師行糧從兵眾而食不缺則多



多益善外攘卽所以內安今日之事則又不然金  
 順張曜額爾慶額各率所部先後出關三路進規  
 烏城兵力足資分布則以兵而論旣無須乎增益  
 就糧而言肅臺採辦轉運之費旣屬不貲而哈密  
 開屯可以指墾之地正復無多若再有繼進之兵  
 萬眾嗷嗷待炊愈急不獨無添兵之利將反受其  
 害臣愚以爲不如省一軍之芻粟以供諸軍之飽  
 騰直隸督臣李鴻章與臣函議及此以爲關外祇  
 宜屯墾緩進不宜添兵大舉致虞飢潰臣之日夜  
 疚心已非一日曩猶以爲全隴肅清安插各回眾

帖然就範無復可伺之隙年前乃有河州撫回閔  
殿臣之叛幸湘軍一戰而勝又有宋慶一軍夾洮  
而陣以爲之援故能速予殲除聲威大振否則輾  
轉之間其蔓延豈復堪問就此推之中原一片平  
衍竟無一枝大軍爲之鎮撫萬一事機猝發遂成  
坐困藩籬之備旣疏根本之憂益大噬臍之悔於  
事何裨再四思維擬將宋慶所統全部調回潼關  
扼紮西可以顧秦隴北可以蔽晉燕豫省亦可恃  
以爲備臣爲拱衛京師起見芻蕘一得是否有當  
伏乞

聖裁所有請留大枝勁旅以作中原活兵紓餽運之力  
而密拱衛之防各緣由謹繕摺具陳伏乞

皇太后

皇上聖鑒訓示謹

奏

光緒元年正月二十六日

白雲山志卷之十一

十一



請以游擊孔廣思補歸德鎮左營游擊摺

奏爲揀員請補遊擊恭摺仰祈

聖鑒事竊照歸德鎮標左營遊擊呂振河升補河南城  
守營叅將所遺員缺准兵部咨歸德鎮標左營遊  
擊員缺係題補之缺按照題缺輪補章程應用儘  
先人員應令照例揀選請補等因知照到臣查兵  
部奏定章程儘先各官均按奉

旨先後挨次補用如實在不得其人或員缺緊要亦必  
將名次在先各員按名指實於此缺何項不宜准  
將名次在後之員聲明請補等語歸德鎮標左營

遊擊員缺地處衝繁緝捕巡防在在均關緊要必  
得幹練之員方克勝任臣於在標候補儘先遊擊  
各員中逐加揀選名次在先之馬克泰王連三朱  
慶福等均於此缺營務尚欠歷練人地不甚相宜  
惟查有儘先補用遊擊孔廣思整飭營務勞怨不  
辭現署歸德鎮標右營都司操防一切實能破除  
積習日有起色其於地方情形尤爲熟悉以之請  
補斯缺實堪勝任雖該員儘先名次稍後與例未  
符惟人地實在相需自應照章將名次在前各員  
不宜之處按名指實聲明請補合無仰懇

天恩俯准將儘先補用遊擊孔廣思補授歸德鎮標左  
營遊擊實於營伍地方均有裨益除飭取履歷咨  
部外理合恭摺具

奏伏乞

皇太后

皇上聖鑒訓示遵行謹

奏

光緒元年二月初六日





請以都司龔從岱補南陽鎮襄城營都司摺  
奏爲揀員請補都司恭摺仰祈

聖鑒事竊照南陽鎮標襄城營都司郭仁病故遺缺前  
經臣以遇缺卽補都司訥勤奏補同治十三年六  
月初十日奉

硃批兵部議奏欽此旋准兵部咨該員訥勤前因打仗出  
力已保以遊擊用歸應遊擊班內序補襄城營都  
司員缺應令另揀儘先合例人員請補以符定制  
等因知照到臣當於在標候補儘先都司各員內  
逐加遴選查有遇缺儘先補用都司龔從岱勇

敢樸勤能耐勞苦以之請補襄城營都司員缺洵  
堪勝任雖該員儘先名次在後與例未符惟名次  
在前之羅斌元李煥然趙鵬飛陳掄元吳士秀王  
連三夏廷獻石玉書賈泰安張敦倫斌成胡國安  
任萬元謝鴻保郭振綱忠恕郁景文蕭自得史太  
和尹彥鏢呂廷連徐生印婁文斌文志竇萬祥閻  
士俊文華羅景燾周茂斗高心坦沙魁元段玉林  
連昌永恆費殿元范國棟崔敬谷文坡周金鐸穆  
連生崔從龍吳名揚席蘭洲李平三張緒舜劉文  
俊王慶長羅鳳魁李雲標劉玉趙得蔭袁運來陳

德魁焦良桐等於此缺地方情形均欠熟悉未便  
稍事遷就致滋貽誤查兵部奏定章程儘先名次  
在先各員人地未宜准將何項不宜之處按名指  
實以名次在後之員聲明請補歷經奏准有案今  
以龔從岱請補斯缺人地實在相需相應照章按  
名聲明專摺奏請合無仰懇

天恩俯准將遇缺儘先補用都司龔從岱補授襄城  
營都司以裨營伍而重地方除飭取該員履歷送  
部外理合恭摺具

奏伏乞

皇太后

皇上聖鑒訓示謹

奏

光緒元年二月初六日



捐修滎陽縣城工請廣學額並獎敘官紳摺

奏爲捐修滎陽縣城工請加廣學額並懇將捐資出力官紳分別獎敘開單恭摺仰祈

聖鑒事竊照開封府屬滎陽縣城濱臨索河前因河水漲漫城垣間段坍塌樓座亦多傾圮由該縣官紳勘估興修約需工料錢八萬串有奇議將同治五年以前捐備團練經費用存之款撥用並以此案工程雖稟辦在軍務肅清之後而所用團練經費實係捐輸於軍務喫緊之時將來工竣請獎仍請援照有軍務省分辦理稟經前撫臣李鶴年遵章

奏明存案於同治十一年三月十二日奉

旨該部知道欽此旋准部咨行令承辦之員妥爲辦理俟  
工竣之日造具冊結報部核銷等因轉行遵辦在  
案茲據布政使劉齊銜轉據滎陽縣知縣王錫楷  
詳稱該縣城垣周圍五里三十七步原係土牆遵  
經督同營學典史暨公正紳士購料鳩工認真修  
復將土牆改爲磚城並添修月城暨攔水石壩計  
自同治十一年二月初二日開工至十二年閏六  
月二十四日一律工竣共計工料錢八萬八千九  
百三十六串三百四十文照提團練經費銀五萬

五千五百八十五兩二錢一分二釐易錢支用稟  
經飭委開歸道任道鎔驗收結報委係工堅料實  
並無草率偷減情弊應照有軍務省分請獎廣額  
擬請以捐銀劃出四萬兩加廣滎陽縣永遠文武  
學額各二名以銀一萬二千二百二兩並出力官  
紳分別獎敘下餘捐銀及其出力紳士由外給  
獎等情造具清冊圖結由司核明詳請

奏咨前來 臣查咸豐九年欽奉

上諭城垣所以衛民果能修繕完固自足以資捍衛有軍  
務省分捐資者照捐輸例議敘出力者照軍功例請獎



等因欽此又奏定章程捐輸請加學額銀數凡一廳一州一縣捐銀二萬者准加永遠文武定額一名其捐銀如已請獎不准再加學額歷奉通行遵照茲滎陽縣城被水塌損該紳等愿將同治五年以前軍務喫緊時捐存團練經費撥用興修不辭勞瘁俾城垣完固足資捍衛實屬深明大義與尋常捐輸出力者不同且已於議修之時先行奏明存案自應照案辦理查捐資出力官紳所請獎敘均係按例核計其請以銀四萬兩加廣該縣永遠文武學額各二名銀既劃分不與請獎銀兩牽混核與



定章相符所廣額數亦無浮於原額除冊結咨部  
並將捐輸較少及其次出力紳士由臣酌量給獎  
外所有捐資較多尤爲出力各員名銀數請獎階  
銜理合敬繕清單奏懇

天恩俯准敕部查案分別核獎廣額并迅賜頒發執照  
以示鼓勵爲此恭摺具

奏伏乞

皇太后

皇上聖鑒訓示謹

奏

光緒元年二月初六日

豫省本年新漕委難辦運本色仍請折銀解部摺  
奏爲豫省本年新漕體察情形委難辦運本色並司  
庫異常匱絀嵩毅兩軍西征餉項全賴借支漕折  
周轉懇

恩仍准循照成案折銀解部以顧京倉而維大局恭摺  
仰祈

聖鑒事竊照同治十三年九月二十五日接准戶部咨  
遵

旨議覆倉場侍郎延煦等奏請折漕之江西等省酌徵本  
色或籌辦採買一摺奉

上諭河南新漕著先事圖維徵運本色毋得再請折徵等因欽此行令遵照當經轉飭查辦去後茲據布政使劉齊銜糧鹽道段廣瀛詳稱查漕糧爲

天庾正供俸餉攸關極應規運本色俾京倉得以加成支放何敢再請折徵無如豫省十餘年來久未辦運楚旺漕次倉廩器具倒塌無存各幫船隻亦皆斃朽不堪應用必須重新置備則事同創始其間頭緒紛歧措理諸多掣肘至以折解之銀採買運津已示以通融辦法自當遵奉妥辦第豫省不鄰江海載運仍須幫船非若江廣等省可由商局輪



船包運之便且折解銀兩係在秋後彼時深恐糧  
缺價昂若先由司庫發款墊支而款數較鉅無從  
騰挪悉心籌計採運亦屬窒礙難行况河南雖爲  
肅清省分而歷年籌應軍需以致庫款入少出多  
萬分竭蹶近來奉撥京協各餉及河工急需有增  
無減每當湊解之際無非挪東移西顧此失彼加  
以嵩毅兩營西征月餉並製備軍裝等項每年需  
銀一百四五十萬兩按月供支仍不啻籌辦軍務  
是豫省用款與他省迥不相同其猶可恃以無誤  
者幸賴漕折通挪以資挹注倘并此挪款而無之

軍餉萬難應時接濟設有貽誤關係匪輕此漕糧驟難規復本色而又不能採運之實在情形也再四思維應懇

奏請將本年新漕仍准援案折解其折解銀兩一經徵收有項先儘二十萬分批解部無論如何爲難不稍短缺等情前來臣查漕糧爲京倉支放要需既經欽奉

諭旨辦運本色謹當實力奉行豈容以事屬爲難藉口軍需再作折徵之請惟逐項體察全局統籌欲以本色徵兌或酌辦採運煩費滋多勢難應手加以司

庫異常匱絀嵩毅兩軍西征月餉本無專款而又刻不容緩每於無可籌撥之時全賴借支漕折暫作周轉若必勉強規運不惟緩急所需一無可恃且須先期籌備漕次之用既恐於運事多所貽誤尤慮於餉事難以支持該司道等所詳委係實在情形合無仰懇

天恩俯准將光緒元年豫省新漕仍照成案折銀解部一俟軍需稍可節省卽行辦運本色規復舊制至解部銀數本不應以二十萬兩擅行劃定惟迫於時勢祇可先儘分批解運二十萬但能設法籌維



於批解二十萬以外儘力增解以顧京倉而維大局所有同治十三年漕折應解部庫銀兩現正飭催籌解其歷年欠解銀款仍視庫儲盈絀情形隨時分別酌量補解還款合併陳明是否有當理合恭摺具奏伏乞

皇太后

皇上聖鑒訓示謹

奏

光緒元年二月十五日



河臣喬松年因病出缺請

旨簡放並代遞遺摺摺

奏爲河臣因病出缺循例由驛馳陳請

旨迅賜簡放以重修防事竊河臣喬松年因南北七廳  
要工均在豫省是以常川駐紮本年二月初十日  
因病時附奏請假詎拜摺後病勢日劇服藥罔效  
瀕危之際猶伏枕哀鳴聲稱受

國厚恩不能再圖報效惟屬在工各員慎重修守勿稍  
懈弛口授遺摺令交臣處呈遞旋於十四日酉時  
出缺據署開歸道劉成忠委員將河督關防賚送

前來臣謹查照成案暫行接管現時瞬交桃汛修防均關緊要惟有督飭道廳各員實力講求不敢稍涉大意伏念該故督喬松年學邃品端廉靜寡欲曩在江北辦理糧臺及沿江團練素有聲望迨巡撫皖陝之時正值寇警紛乘籌餉籌防殫竭心力勛勞卓著遺愛在民自

簡任河督以來頻年各廳工程奇險迭出屢瀕於危該故督風雨指揮往來搶護得以保全於呼吸之間國計民生所關非細而日夜焦勞思慮傷脾其病已中於不及覺今春陡然見證委以積勞竟至不起臣

屢往看視惓惓工需無一語道及私事其嗣子聯寶現在恭逢

恩詔應得二品廕生惟年甫十齡遠在江右易簣之際並無親屬在側與從前河臣栗毓美朱襄在防出缺情形同爲悽慘深堪憫惻臣已督飭該道廳等將其身後事宜妥爲照料所有東河總督員缺緊要相應請

旨迅賜簡放以重修防並將遺摺附呈御覽爲此循例由驛具

奏伏乞

皇太后

皇上聖鑒謹

奏

光緒元年二月十五日



請將考城縣仍隸歸德府並將考城縣改爲簡缺  
光山縣改爲要缺摺

奏爲沿河縣缺改隸府屬並將缺之煩簡互相更換  
以便官民而符缺次恭摺仰祈

聖鑒事竊照衛輝府屬之考城縣原隸歸德府屬自乾  
隆四十八年間因蘭陽李六口壩工合龍將該縣  
城池移建黃河北岸改隸衛輝府管轄經前撫臣  
河臣會同奏明奉部議准七十餘年事事諸臻妥  
洽洎咸豐五年銅瓦鑲決口黃河改道北流考城  
轉居河之東南距衛郡二百四十里相隔太遠該

府勢難遙顧而府院考試士子自縣赴郡應由封邱長垣等縣境繞道渡河偶遇風狂河凍往往貽誤場期以致應試者逐漸稀少且解勘命盜等犯及遞送文報往返河干時多阻滯據該縣舉人李正修等以考城縣境與開封較近懇請改隸開封府屬呈由該府縣議詳到臣當經飭司查議去後茲據藩臬兩司詳稱考城縣治前由歸德改隸衛輝原因移建城池在於北岸自黃河改道以來該縣隔在河之東南其與開歸二府均無河阻雖相距歸德遠於開封惟開封所轄已有十六州縣歸

德僅止八屬自應將該縣仍隸歸德方昭平允現  
在該縣缺雖沿河並無修防之責政事較少亦應  
改爲地方簡缺歸部銓選查光山縣界連楚省民  
情好訟政務紛繁擬將光山縣改爲要缺揀調等  
情覆詳請

奏前來臣查縣缺改隸府屬及缺分區別繁簡原應  
視地方情形隨時變通酌辦今考城與衛輝中隔  
一河凡考試解勘及文報往來艱於濟渡則於官  
事民事均有窒礙卽該府督察稽查亦有鞭長莫  
及之勢該司等議以考城縣仍隸歸德係屬因地



制宜至該縣前因兼管河務由簡改繁現既責無  
修防仍行改簡查定例酌改繁簡應分別缺之大  
小互相更換光山縣本係繁難兼二部選中缺現  
因地處邊界民刁多訟政事殷煩甚爲難治其酌  
改要缺亦與定例更換缺額相符合無仰懇

天恩將考城縣仍隸歸德府管轄並縣缺改簡歸於地  
方由部銓選將光山縣改爲煩難兼二要缺在外  
揀調以便官民而符缺次是否有當理合恭摺具  
奏伏乞

皇太后



皇上聖鑒敕部議覆施行再此應會奏之件現在河東河道總督係臣暫管毋庸會銜合併陳明謹

奏

光緒元年二月二十七日

金匱要略卷之二十一

三十一

陳請

陛見摺

奏為微臣到任三載例應

陛見恭摺仰祈

聖鑒事竊臣於同治十年十一月初三日蒙

恩擢授河南巡撫遵卽入都恭聆

聖訓旋於十一年四月初八日到任本年四月照例請

覲屆期伏念臣自到任以來事事悉秉

宸謨幸無隕越而中州邊圉遼廓隨時調度練軍往來

巡緝未敢稍為鬆勁河工挑汎安瀾惟埽段林立

在在皆虞生險當與新任河臣遇事和衷講求修  
守至於地方吏治亦宜整頓有加自顧疏庸才輕  
任重冀仰邀乎

提命益翹切夫就瞻茲者述職屆期可否

俯准展

覲俾遂犬馬私忱如蒙

俞允臣俟河臣曾國荃抵豫後卽行束裝北上因本年

恭逢

恩科大典仍當趨回敬謹料理所有秋審事宜擬交藩  
司劉齊銜代勘葵藿積誠倍深跂戀祇候



恩旨遵行爲此恭摺具陳伏乞

皇太后

皇上聖鑒訓示謹

奏

光緒元年三月二十三日



請以汝陽縣知縣鞠捷昌調署祥符縣片

再祥符縣員缺前調安陽縣知縣鄭雲官署理今該員未及到任病故經臣恭疏

題報在案所遺祥符縣係省會首邑政務殷繁仍應揀員調署查有汝陽縣知縣鞠捷昌心地樸實辦事精到堪以調署祥符縣印務據藩臬兩司查明該員任內並無盜劫已起四叅之案與調署之例相符會詳請

奏前來際批飭檄遵並將汝陽縣篆務遴員前往接署外相應循例附片具陳伏乞

聖鑒謹

奏

光緒元年四月十四日



降調臬司興奎俟提勘秋審事畢卽飭交卸片  
再本月初十日准吏部咨降調河南按察使興奎  
前在山西歸綏道任內督催清水河未完同治六  
年米折正銀處分等因知照到臣查現值核辦秋  
審喫緊之時應令興奎一手經理俟提勘事畢卽  
飭交卸新授臬司沈秉成經江蘇撫臣奏蒙  
恩准賞假三個月到任尚需時日容由臣遴員  
奏署以重職守理合附片陳明伏乞

聖鑒謹

奏

光緒元年四月十四日

續解西甯專餉片

再豫省奉撥西甯辦事大臣豫師軍營專餉計先後撥解及抵兌過銀十七萬七百兩疊經

奏明在案茲復由臣飭司勉力設措在於光緒元年丁地項下籌動銀一萬兩於四月十九日發交委員候補知縣袁儀生領解起程前赴陝西省城西甯轉運局交收轉解應用以濟要需據藩司劉齊銜詳請具

奏前來臣覆查無異理合附片具陳伏乞

聖鑒謹

奏

光緒元年四月二十八日



兵馬錢糧奏銷撥案請緩摺

奏爲兵馬錢糧奏銷勢難隨同地丁奏銷彙題撥案  
懇請展緩恭摺仰祈

聖鑒事竊照豫省兵馬錢糧奏銷向隨地丁造冊彙報  
自軍興以來需用浩繁庫款支絀旗綠各營兵餉  
不能應時支發致有積欠查歷辦地丁奏銷時未  
能隨同地丁造報節經

奏准展緩在案茲屆光緒元年奏銷之期據布政使  
劉齊銜詳稱同治七八九三年兵餉前已發清造  
冊具

題請銷因各鎮營出師馬乾未經按年扣除奉部將冊駁還飭司移營更造核扣另行彙案辦理本年應將十年兵餉奏銷挨次接辦惟查前因舊餉尚在積欠若僅將舊欠給發則新招兵丁必待數年始行食餉是以先儘新餉發給並按季帶發舊欠以卹兵艱今十三年新餉雖經發清而十年及十一十二等年舊餉均未帶發完竣勢難隨同地丁依限造報擬請將同治十年至十三年兵馬錢糧奏銷展緩俱俟陸續籌發清楚再行挨案造報等情請

奏前來臣覆查該司所詳委係實在情形除批飭照辦外所有同治十年至十三年兵馬錢糧奏銷懇請展緩緣由理合恭摺具

奏伏乞

皇太后

皇上聖鑒訓示謹

奏

光緒元年五月初九日





覆奏襄城營都司員缺仍以龔從岱請補摺

奏爲遵

旨查明恭摺覆

奏仰祈

聖鑒事竊查南陽鎮襄城營都司員缺前經臣奏請以

遇缺儘先補用都司龔從岱補授承准軍機大

臣奉

旨兵部議奏欽此嗣准兵部咨龔從岱儘先名次在後  
雖據將名次在前各員於此缺不宜之處聲明惟  
按照部冊查核名次在前者尚有賀喜旺等十餘

員是否人地未宜漏未聲敘應令查明覆奏到日再行核辦具奏奉

旨依議欽此知照到臣查兵部奏定章程儘先名次在前各員未經到標無從按名指實其已經到標者遇請補時應按名次先後爲斷如員缺緊要人地不宜以名次在後之員請補應將在前之員按名指實等語遵辦在案襄城營都司員缺臣前因遇缺儘先補用都司龔從岱勇敢樸勤能耐勞苦請補斯缺人地實在相需當將現在到標儘先名次在前各員於此缺不宜之處按名指實專摺奏

懇

天恩俯准以龔從岱補授襄城營都司以裨營伍而重  
地方其賀喜旺等十餘員均係尚未到標照章不  
應請補人地是否未宜亦無從查考是以未經聲  
敘所有查明緣由理合恭摺覆

奏伏乞

皇太后

皇上聖鑒敕部核覆施行謹  
奏

光緒元年五月初九日





開歸道任道鎔委署臬司片

再降調河南按察使與奎前因核辦秋審經臣

奏明暫令一手經理奉

旨知道了欽此欽遵在案茲該司秋錄事竣應飭卸篆  
遴員接署以重職守查有開歸陳許道任道鎔精  
明勤實爲守兼優前曾國藩明保案內稱其遇事  
力圖整頓不避嫌怨於清釐滯獄條理尤精現值

引

見回省以之署理臬司印務實堪勝任除分檄飭遵外  
相應附片陳明伏乞

聖鑒謹

奏

光緒元年五月初九日

籌撥景廉新疆軍餉片

再豫省奉撥景廉軍營新疆軍餉及月協專餉銀兩屢准景廉咨催並迭次委員來豫迎提經臣行司籌解茲在於光緒元年丁地項下籌動銀二萬兩除撥給景廉派辦軍裝之總兵蔣富山等製造等項銀兩外飭委候補知縣馮德綬會同先後催提來員於五月初三日領解起程前赴察哈爾都統衙門交納轉解據藩司劉齊銜詳請具奏前來謹附片陳明伏乞

聖鑒謹

奏

光緒元年五月初九日



籌撥出關運費片

再豫省奉文在於積欠甘餉內提撥出關運費銀二萬兩於上年四月間解過銀一萬兩

奏明在案茲復經臣飭司在於光緒元年丁地項下籌動銀一萬兩於五月初四日發交西征糧臺催餉知縣陳倫等領解起程前赴西安省城交納所有前項奉撥銀兩業已解清據藩司劉齊銜具詳請

奏前來理合附片陳明伏乞

聖鑒謹

奏

光緒元年五月初九日

感受風熱兼患瘡瘍懇

恩賞假調理摺

奏爲微臣感受風熱兼患瘡瘍籲懇

天恩

賞假一月俾資調理恭摺仰祈

聖鑒事竊臣氣體壯實向無疾病自蒙

恩簡任河南巡撫到任以來於地方一切公事朝夕經理雖極叢煩自顧不覺勞瘁本年五月初旬偶因感受風熱火鬱上蒸頸邊結一瘡瘍腫潰作痛據醫家云若非安心靜攝難期速效合無仰懇

天恩

賞假一箇月俾資調理所有署中日行公事飭委藩司  
代拆代行遇有緊要事件仍由臣力疾經理俟調  
理平復卽行

奏請銷假所有

微臣

因病請假一月緣由理合恭摺

具陳伏乞

后

皇上聖鑒訓示謹

奏

光緒元年五月二十日



遺摺

奏爲

天恩未報臣病垂危伏枕哀鳴仰祈

聖鑒事竊臣昨以感受風熱兼患瘡瘍籲請

賞假調理在案詎發摺後氣益促逆瘍毒已成內陷之  
證漸不能支延至今日而胷膈阻絕神思昏沈諸  
醫束手難期痊愈伏念臣以書生起家軍旅迎師  
江上曾未稍裨戎機乃蒙

毅皇帝特達之知不數年洊膺疆寄撫豫以來一無報稱  
受任之始卽值嵩毅兩軍撥甘西進連年供億籌

金海三月之考正名一  
三  
餉綦難雖復於公私困竭之餘勉創練軍勸辦積  
穀並飭通省各州縣興修水利而兩河元氣未復  
物力艱難地方應辦事宜一時尚難盡舉夙夜兢  
惴正懼不能稱職無以仰答

聖主簡畀之恩不期福薄災生一病猝乘奄奄不起旦  
夕待盡負罪何窮惟有戒飭臣子等奮志讀書力  
圖上進期於生生世世勉報

皇仁仍求我

皇上蚤勤典學優禮親賢勿以海宇粗安而哂盈廷之  
交儆勿以目前無事而忽肘腋之近憂破格以求

不世之才內斷以決自強之策此則惓惓臣愚所  
昕夕在抱而垂死不忘者銜哀哽咽無任悚惶謹  
繕摺具陳伏乞

皇太后

皇上聖鑒謹

奏

光緒元年五月二十一日

金瓶梅詞話卷一

一



先敏肅公少負才譽所著詩古文詞哀然成集惜以兵  
燹散失殆半迨從軍滬濱轉餉袁江由道員簡放大名  
不數年洊膺開府一切章奏牋牘緊要節目多出心裁  
每論不孝兄弟曰受

恩深重涓糜難酬當盡其心之所安而後已故每遇政  
事博采周諮悉心籌畫求明問夜汲汲焉若不終日而  
又未嘗過事操切以求旦夕之效撫豫三年如創練軍  
興水利勸積穀諸大端凡有益於國計民生者無不殫  
精畢慮務底於成在當時官民尚習而不覺未幾先  
公棄養閱一載河南北遇旱餓孳載道而溝洫旣通之

地農田戽水灌溉猶可補種秋禾不至成災並賴諸倉積穀九十餘萬石發以賑濟全活甚眾至今頌德不衰且地連秦晉伏莽未靖而連年荒祲亂民不敢乘饑竊發未始非練軍有以鎮攝之也 先公憂勤惕厲未雨綢繆殆有先幾之哲矣奏疏諸稿舊藏篋中己卯歲湖者薄游江右手自哀次釐爲七卷循例各摺不及備刊其有關國政足資考核者付之削氏半載工竣 先公規模宏遠不孝兄弟未能窺測萬一惟手澤所存毋敢失墜覽是編者亦足覘 先公歷官之績狀云

光緒六年庚辰春三月不孝

湖者謹識